

T e s t o r o g e n



تيستروجين

شريف عبد الهادي



ٲيسٲروحيٲ

ٲاٲيف

شريف عبد الهادي



تيستروجين

تأليف:

شريف عبد الهادي

إشراف عام:

داليا محمد إبراهيم

جميع الحقوق محفوظة © لدار نهضة مصر للنشر

يحظر طبع أو نشر أو تصوير أو تخزين
أي جزء من هذا الكتاب بأية وسيلة إلكترونية أو ميكانيكية
أو بالتصوير أو خلاف ذلك إلا بإذن كتابي صريح من الناشر.

الترقيم الدولي: 978-977-14-4882-2

رقم الايداع: 2014 / 9310

الطبعة الأولى: يونيو 2014

تليضون: 02 33472864 - 33466434

فاكس: 02 33462576

خدمة العملاء: 16766

Website: www.nahdetmisr.com

E-mail: publishing@nahdetmisr.com



أسسها أحمد محمد إبراهيم سنة 1938

21 شارع أحمد عرابي -
المهندسين - الجيزة

تیسٹرو جین



للمزيد من الكتب الحصرية ، زورونا على
موقع عصير الكتب

[Www.Book-juice.com](http://www.Book-juice.com)

وننتظر ارائكم عن راايكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

المقدمة

(السينما المقروءة – أفلام مصرية على ورق)..

مشروع بدأته في عملي الأدبي الأول «كوابيس سعيدة»،
لتقرأ الأحداث وأنت تعلم مسبقاً كل شخصية في الرواية،
ومن الفنان أو الفنانة التي تؤديها، حتى تشاهد الأحداث
في خيالك بأداء وطريقة كلام النجوم، وكأن الرواية
بمثابة فيلم مقروء.

فتعالوا اليوم نستكمل تلك التجربة التي تمزج بين
الأدب وإيقاع السينما، لنقرأ رواية سينمائية، مع الفارق
أنه لا توظيف للنجوم في هذا العمل.. فأنت القارئ
والمخرج الذي يختار النجم المناسب لكل شخصية
لتشاهد الأحداث بطريقتك الخاصة، وكأننا أمام فيلم
بأكثر من نسخة، ولكل قارئ نسخة التي تختلف عن
نسخ الآخرين!



للمزيد من الكتب الحصرية ، زورنا على
موقع عصير الكتب

Www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://fb.com/groups/Book.juice)

الحب أصلاً سوء تفاهم بين اثنين،
وأول ما يفهموا بعض صح.. بيفركشوا !!



للمزيد من الكتب الحصرية ، زورونا على
موقع عصير الكتب

www.Book-juice.com

وننتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

استديو برنامج «أستروجين»

المذيعة (مروة نور الدين) تجلس على مقعد فاخر وتوجه حديثها للكاميرا بهدوء . .

من وجهها نكتشف أنها فتاة جميلة ذات ملامح هادئة جذابة . . شعرها كيرلي غير مصفف عند الكوافير، وترتدي ملابس Semi Formal ولا تضع مكياجاً على وجهها، وتقول بابتسامة رقيقة وهي تقرأ كلمات الـ Auto Q التي تظهر أمامها على الكاميرا:

تبقوا غلطانين لو افكرتوا إن الكيميا مجرد تفاعلات بين المواد والعناصر اللي في الطبيعة وبس . . الكيميا جوايا، وجواكم، وجوا كل الناس اللي حوالينا .

يبدأ باقي جسد (مروة) في الظهور قبل أن ترتدي نظارة طبية أنيقة لتوحي بجدية الحديث وهي تواصل كلامها بابتسامتها التي اتسمت بالغموض .

مروة:

فيه ناس . . من أول ما نشوفهم بنحبهم من غير سبب . . وناس تانية . . من غير ما يعملوا حاجة غلط . . مش بنطيقهم برضه من غير سبب . . العلم أثبت مؤخراً إن فيه خريطة للحب موجودة ف دماغ الإنسان . . وتحديداً ف عقله الباطن . . الخريطة دي عبارة عن مجموعة من الصفات والطباع واللامح اللي بنحبها ونفسنا نلاقيها ف الطرف الثاني . . وأول ما نقابله . . أتوماتيك بتتعلق بيه ونرتاح له . .

وساعتها.. بيفرز الجسم هرمونات إضافية وكميات كبيرة من مادة الأدرينالين اللي بتسبب إن الوش يحمر.. والإيدين تعرق.. والقلب يفضل يدق بسرعة لغاية ما نكون مش قادرين ناخذ نفسنا.. هي دي سر معادلة الحب اللي بنقع فيه فجأة وإحنا مش عارفين ليه وازاي؟.. وهو ده.. موضوع حلقتنا النهارده في برنامجكم.. «أستروجين».

هنا يتسع الكادر ونحن نسمع صوت تصفيق الجمهور الحاد الذي نكتشف أنه من النساء فقط، حيث نشاهد عددًا كبيرًا من جمهور السيدات والبنات، ذوات الأعمار المتفاوتة، ويجلسن جميعاً على مقاعد تم تصميمها بشكل مختلف عن مدرجات الجمهور في باقي برامج التوك شو؛ إذ تكون المقاعد على شكل قلوب..

الجمهور يصفق بحرارة، وتتابع حركة الكاميرا الكرين التي تستعرض الاستديو من أعلى لنشاهد ديكورات البرنامج ذات الطابع الأنثوي الأحمر والقلوب والورود التي تملأ جنبات الاستديو.



مكتب جيتام في كافييه «Emotions»

الآن نكتشف أن المشهد السابق كان مجرد مشهد يشاهده (جيتام) في التلفاز، وهو يجلس إلى مكتبه الذي يدير من خلاله الكافييه الذي يملكه واسمه (Emotions)، قبل أن يوجه الريموت كمنترول ببساطة نحو

التلفاز ويغلقه، ثم يلتفت لنا وعلى وجهه ابتسامة ساخرة، ليلق على كلام (مروة) قائلاً:

متهاكلم.. لو كان الحب كيميا بتربط البشر ببعضهم..
ماكانش معظم الحبيبة سابوا بعض لأسباب تافهة.. الحب
خطوات مكتوبة ف كتالوج سري ربنا زارعه جوا كل واحد
فيها في مكان خفي.. اللي بيعرف يلاقيه ويستعمله، يقدر
يخطف قلب اللي قدامه.. واللي ما يعرفش.. ما قداموش
غير حلين.. (يخرج من جيبه مناديل ورق ويلوح بها وهو
يتابع).. ورق الكلينيكس عشان يمسح دموعه.. (يشير إلى
نفسه ويتابع) أو إنه يعتمد عليا.

الكادر يتسع لنرى مصور فيديو يصور (جيتام) وبقواره (حسين)،
ذلك الجرسون البدين الذي يرتدي بذلة سوداء منفوخة بفعل كرشه
الضخم، ويعمل مديراً للجرسونات.

ما إن ينتهي من التصوير، حتى يقول (جيتام) بصرامة:

Stop!

ثم يلتفت (جيتام) لـ(حسين) ويتابع وهو يشير نحو المصور:

روح معاه يا حسين ونزل الفيديو على CD وهاتولي عشان
ألق أرفعه ع الجروب بتاعي ع الفيس بوك.

حسين:

تؤمرني يا جيتام بيه.

(جيتام) يوجه حديثه لـ (حسين) وهو يشير لمصور الفيديو:

ماحاسبهوش غير لما تتأكد من كواليتي الصورة.



استديو برنامج «أستروجين»

(مروة) تستمع لإحدى المتصلات بالبرنامج وعلى ملامح وجهها علامات التحفز، في حين نسمع صوت الفتاة المتصلة وهي تقول بحزن وتأثر:

بحبه من سنتين . . بعد أول سنة لاقيته بيقول لي إن فيه حاجة ناقصة . . ولما سألته إيه اللي ناقص عشان أكمله . . قال لي اللي ناقص عندي أنا مش عندك إنتي . . وإنه حاسس إن كشف نور ف وشه فجأة ومش قادر يتحمل نوره . . قالها واختفى . . وبعدين عرفت إنه خطب . . بس هو والله رجع تاني زي ما كنت حاسة . . لكن بعد شوية اختفى تاني ولسه عمالة أدور عليه . . وقبل ما تقولي انسيه زي اللي قالوا، أنا فعلاً فكرت . . لكن سألت نفسي . . يا تري لو لقيت فارس أحلام بديل هيحبنى زي ما هحبه واللا هفضل مستنية إنه يتعطف عليا ويقول لي بحبك وفي الآخر ما يقولهاش . . هو إحنا ليه ما عندناش رفاهية الاختيار؟ ليه مش من حقي أنا واللي زيي إننا لما نلاقي فارس أحلامنا نروح ونقول له كلمة بحبك وش زي ما الرجالة ببيجوا يقولوننا ع اللي

جواهم أول ما يحسوا إنهم لقونا؟ ليه مش من حقي أختار حياتي والراجل اللي هعيش معاه، بدل ما ارضى باللي يحدفه النصيب لأنني حاسة إنني لو سبيته ممكن مالاقيش غيره؟ ليه ما عنديش طول الوقت غير إنني أستنى اختيار اللي قدامي ويا عالم هيختارني ولألاً؟

مروة (بابتسامة بسيطة):

تعرفي إنك فكرتيني بكلام جدتي الله يرحمها لما خالاتي كانوا بيدعولي إن ربنا يصلح حالي وأتجوز.. كانت بتضايق أوي وتقول مين اللي قال إن صلاح الحال بالجواز؟ ما يمكن اللي هي فيه دلوقتي هو صلاح الحال.

فتاة الاتصال (بتحد):

يمكن ده كلام جدتك.. بس أنا جدتي عمرها ما قالت كده، ولا جدة صاحبتني، ولا جدة جارتني، ولا أي ست م اللي حواليا.. كل ست كبيرة حواليا دايمًا تقولي عقبال ما اشرب شرباتك يا بنتي، ودايمًا برد عليهم بصوت واضح، عقبال ما اشرب قهوتك يا طنط.. يا ريت تقولي لي حل ينفع أعمله.. مش نظريات بنقراها دايمًا في الكتب والحواديت.

مروة (بلهجة عقلانية هادئة)

مش مطلوب منك لما تلاقى فارس أحلامك غير إنك تكوني نفسك.. لو هو فهمها وقدرها يبقى الظروف والناس اللي

حواليكم هيدو بوكوا ف بعض زي ما الملعقة بتقلّب السكر في
الميه . . ولو مافهمش . . يبقى لو مليون ألف ملعقة قلبوا مع
بعض . . عمر الميه والزيت ما هيقوا حاجة واحدة .



كافيه «Emotions»

صورة بانورامية داخل كافيه «Emotions» الذي يجلس رواده من
البنين والبنات في صورة Couples ، ونرى (جيتام) يتأمل المنظر
من بعيد وهو يتمتم:

إبيبيه . . يا بخت من وفق مز ومزة في الحلال . .

(جيتام) يعطي ظهره للزبائن ويهم بالتوجه لمكتبه؛ لكن فجأة تحدث
جلبة ويمسك أحدهم في الجرسون صائحا .

الزبون:

دي مهزلة . . أنا عايز صاحب المكان فوراً .

جيتام يتجه نحو الزبون ، ويسأله:

خير يا فندم؟

الزبون (وقد أمسك بساندوتش):

أنا كنت طالب كبدة إسكدراني (يمد يده بالساندوتش نحو
جيتام ويتابع) . . اتفضل دوق بنفسك واحكم .

جيتام يأخذ الساندوتش ويقضم منه قطعة ، ثم يبصقها بقرف قائلاً
للجرسون:

إيه القرف ده؟! 100 مرة أنبه عليكم كبة الحمير اللي بنتبرع
بيها للسيرك القومي تتحط ف ديب فريزر لوحدها بعيد عن
كبة الزباين . . (جيتام ينظر لمؤخرة الزبون ويتابع) . .
عاجبك كده؟ أهو الراجل طلع له ديل وقرب ينهق!

الزبون (صائحاً):

اخرس!

جيتام يجذبه من ياقة قميصه قائلاً بصرامة:

اخرس انت يا نصاب يا عميل . . فاكرني مش عارف مين
اللي باعتك عشان تبوظ سمعة المحل ويخطف مني الزباين؟

الزبون (بقلق):

إنت بتقول إيه؟

جيتام:

بقول إن الكافيه بتاعنا مفيش في الـ menu بتاعه كبة
إسكندراني من أصله . . ساندوتشك كان فيه جمبري
إسكندراني يا غشيم .

جيتام يلتفت للجرسونات قائلاً:

رؤقوه .

الزبون (بتوسل):

أنا آسف . . استر عليا الله يستر عليك .

جيتام (ساخرًا):

استر عليك ده إيه؟! شرف الراجل زي عود الكبريت ما يولعش غير مرة واحدة .

الجرسونات تكبل حركة الرجل ، بينما يمسك أحدهم بفمه حتى يمنع من الكلام ثم يأخذونه بعيدًا عن المكان ، قبل أن يستوقف (جيتام) الجرسون (حسين) كبيرهم صائحًا فيه:
يا حسين .

حسين:

أؤمر يا فندم .

جيتام (هامسًا):

لسه ما لقبتش شيف بيعمل كبدة إسكندراني معفنة زي بتاعت العربيات؟

حسين (بخجل):

لسه يا فندم .

جيتام (هامسًا):

طب روح هات لي ساندوتشين كبدة معفين من عند زيزو بسرعة عشان في ضيوف جايبين لي . . الجروب بدأ يندع مجروحين عاطفياً .

حسين:

ثواني وهتكون عندك الساندوتشات .

(حسين) يترك (جيتام) ويهم بالانصراف ، فيصيح فيه (جيتام) أمام الزبائن:

لو مش معفنة مش هاخذها .

الزبائن تنتظر له بدهشة ، فيلاحظ ذلك قبل أن يبادلهم النظر بنظرة من يشعر بالقرف منهم قائلاً بسخرية:

إيه القرف ده؟! . . عالم مقرفة!



أمام مكتب جيتام في كافيته «Emotions»

على باب مكتب (جيتام) نشاهد لوحة معلقة مكتوباً عليها «أ. جيتام الديب صاحب كافيته Emotions» بخط غريب لكنه مبتكر وجذاب ، وتحيط بالجملة مجموعة من القلوب الحمراء اللامعة بخليط من الجليتر الذهبي والفضي . .

الآن نرى أكثر من يد تطرق الباب ، فيفتح جيتام ويرمق الحاضرين بنظرة طويلة ساخرة قبل أن يقول:

يا Welcome .



مكتب جيتام من الداخل

الآن نحن في مكتب (جيتام) الذي يقف حول رأس مائدة مايكروسوفت المبهرة «Microsoft touch table» التي تعمل باللمس، وتضيف مؤثرات بصرية مبهرة على الصور المعروضة بها، كما يمكن توصيلها بالهواتف المحمولة لتستقبل تلك المائدة الصور وملفات الفيديو الموجودة داخل الهواتف المحمولة، وتعرضها بحجم كبير جداً، وحول المائدة نشاهد ثلاثة أشخاص متفاوتي الأعمار، ما بين المراهقة، والشباب، والرجولة..

الرجل الأول يرتدي نظارة طبية، وأصلع الرأس، ذو ملامح دميمة.. ممتلئ الخدين، ويرتدي بذلة سوداء، ونلاحظ أن رابطة عنقه غير مضبوطة وتميل لليسار.

الشاب الثاني نجده يرتدي ملابس فانكي، وقد فتح أزرار قميصه ليظهر من تحتها شعر صدره الكثيف لدرجة تثبت نظرية أن الإنسان كان (أصله قرد) وتظهر من تحت القميص سلسلة ضخمة، أما شعره فقد تم تسريحه إسبايكي بعد أن سهر عند الحلاق 3 أيام!

الشاب الثالث نجد سنه أكبر قليلاً من الشاب الثاني، ونلاحظ أنه يرتدي (طقم كلاسيك) وقد ارتدى سلسلة يتدلى منها صليب ذهبي.

في مائدة مايكروسوفت التي يلتف حولها الجميع، نشاهد رسمتين.. الأولى بها شاب يداعب حبيبته التي تجلس على مرجيحة وحولهما أشجار وزهور وعصافير، والثانية بها شاب ينظر حوله برعب في صحراء مترامية الأطراف وحوله ثعابين وذئاب..

(جيتام) ينظر للرسمتين ويقول للجميع:

جيتام:

البنى أدمين زي الرسم . . منهم اللي نزل ف لوحة فيها ورد
وشجر وعصافير ملونة . . ومنهم اللي نزل ف رسمة كلها
أفاعي وديابة، في برواز مقفول عليه .

(جيتام) ينظر للرسمتين، ثم يجذب شاب الرسمة الأولى ويضعه
في لوحة الصحراء، بينما يجذب شاب لوحة الصحراء ليضعه في
لوحة الحديقة مبدلاً كلاً منهما وهو يتابع:

بس الفرق . . إن الرسام اللي حطنا ف لوح ممكن
ماتعجبناش، حط ف أدينا فرشاة وألوان عشان نغيرها
للشكل اللي يناسبنا . . لذلك أنا مقتنع إن القسمة والنصيب
اللي في السما إحنا اللي كتبناهم من قبل ما ننزل الأرض .

(جيتام) ينظر للشباب الثلاثة بنظرة مطمئنة ويقول:

انفضلوا .

كل منهم يخرج هاتفه المحمول ويضعه على مائدة مايكروسوفت،
فتخرج من الموبايلات 3 صور لثلاث بنات . .

نلاحظ أن محمول الرجل الأول ذي النظارة الطبية والشكل
المتواضع، خرجت منه صورة فتاة باهرة الجمال . . شقراء . .
بيضاء . . مشوقة القوام، تستند على سيارة فخمة أحدث موديل .

(جيتام) ينظر للصورة ثم ينظر للرجل بخضة ويرفع حاجبيه
 بدهشة، فيرفع الرجل كتفيه ويمط شفثيه في خجل للدلالة على
 أنه يعلم صعوبة الموقف، واستحالة الارتباط بها، فيقول جيتام
 ساخرًا:

إيه يا عم الصاروخ الفطيع ده؟! وريتھالي ليه بس ده أنا
 ممكن أخذها منك .

الرجل (بصدمة):

نعم؟!!

جيتام (ضاحكًا):

متخافش أوي كده . . هي آه تستاهل إني أبيعك عشانها . .
 بس سمعة الكافيه أغلي منكوا إنتو الجوز .

أما موبايل الشاب الثاني الروش الفانكي، فتخرج منه صورة فتاة
 محجبة، ترتدي «إسدالاً»، وقد وقفت أمام المسجد لترتدي حذاءها،
 وما إن يرى جيتام صورتها حتى يندهش، فيضغط على الصورة
 ليتم تكبيرها ويتأكد مما تشاهده عيناه، قبل أن ينظر للشاب الفانكي
 ويهز رأسه بعتاب يمينًا ويسارًا وهو يردد بسخرية:

خسنت!

الشاب الفانكي:

دي حتى ما بتسلمش .

جيتام (ساخرًا):

وماله.. البنبت اللي تقول لك sorry ما بسلمش
بالإيد.. بوسها من خدها وقول لها ولا أنا كمان بسلم.

محمول الشاب الثالث ذي الصليب، تخرج منه صورة لفناة ترتدي
نظارة طبية، تجلس في إحدى المكتبات تقرأ في كتاب ما بانهماك
شديد، وعلى جانبيها عمودان من الكتب، فيرفع جيتام حاجبيه
ويهز رأسه لأعلى وأسفل دلالة على اهتمامه وتركيزه وهو يمت
شفتيه، ثم يخرج موبايله الـ HTC ويضعه على مائدة مايكروسوفت
فتتحرك كل الصور وتدخل موبايله لتصبح مخزنة عليه، فيلتقط
موبايله من على المائدة، ويضعه في جيبه قبل أن ينظر في وجوههم
قائلًا:

طبعا الكل قال لكم إن ارتباطكم بفتيات أحلامكم شيء
مستحيل.

الجميع يهزون رءوسهم في وقت واحد بما معناه (نعم)

جيتام:

وطبعًا ما صدقتوش الكلام وحاولتوا أكثر من مرة لغاية ما
اكتشفتوا إن مفيش فائدة فعلاً.

الجميع يهزون رءوسهم مرة أخرى في وقت واحد بما معناه (نعم)

(جيتام) بيتسم ابتسامة واسعة ويدير وجهه للجميع وهو يقول:

ألف مبروك يا جماعة.

ثم يفتح ذراعيه عن آخرهما ويقول بلهجة مرحة عالية:

حان وقت المرح .

(جيتام) يقف مع الرجال الثلاثة على مائدة مايكروسوفت ويستعرض مجموعة من الصور لفتياتهم، ومجموعة صور لهم على أن تكون صور الرجال الثلاثة متناقضة تماماً مع صور الفتيات الثلاث، ويبدو وكأنه يتحدث معهم باهتمام . .

فالرجل الأصلع نرى له صورة وهو يأكل بطريقة مقرزة، بينما تأكل فتاته رائعة الجمال باتون ساليه برقة وفي يدها كوب نسكافيه . .

أما صورة الشاب الفانكي فتكون في الديسكو تك، بينما صورة فتاته الملتزمة تكون وهي تجلس على السلم المجاور للسيكشن وتقرأ في المصحف . .

من جانب آخر نجد صورة الشاب ذي الصليب وهو ينظر للكمبيوتر بتلثم وحيرة، وتمسك يده الماوس بشكل خاطئ، بينما تتابع فتاته العبقرية أحد مواقع الإنترنت باهتمام شديد .

كل هذه الصور نشاهدها بينما يتردد صوت (جيتام) الهادئ في الخلفية:

«قبل ما تدور على الارتباط بأي بنت لازم تشوف الأول
إيه الثوابت اللي ماينفحش تستغنى عنها في فارس أحلامها . .
ما تفكرش تقنعها بالنقص اللي فيك قد ما تحاول تقنع نفسك
بضرورة إنك تكمله . . تكمله بجد . . مش كده وكده

قدامها.. لأن اللي بيلبس قناع لازم بييجي عليه وقت
ويخلعه.. محدش بيمثل على طول».

على مائدة مايكروسوفت، يضغط (جيتام) على صورة الرجل الأول
(أبو نظارة) فتبدأ في التحرك باعتبارها ملف فيديو حتى ندخل في قلب
الصورة وتتحول الصورة إلى مشهد حي في منزله.

يتردد صوت (جيتام) في الخلفية، حين نشاهد الرجل (أبو نظارة)
يصحو من نومه بملامح ناعسة، وشعر منكوش، وعيون منتفخة، وقد
ارتدى فانلة داخلية مخرومة (وكالسون) متسخ..

الرجل يظهر أمام المرأة ببذلة قديمة وسيئة، ويحاول أن بيتسم فتبدو
ابتسامته مصطنعة، قبل أن يخلع البذلة القديمة ويبقى بالفانلة المخرومة
والكالسون المتسخ، ثم يتجه لدولاب ملابسه ويخرج منه بذلة شيك
ينظر لها بإعجاب.

الآن نشاهد (أبو نظارة) وقد ارتدى البذلة الشيك ويقف بأناقة أمام
المرأة..

فجأة يشعر أن شيئاً ما ناقصاً فنشاهده يخلع بذلته، حتى يبقى بالفانلة
المخرومة والكالسون المتسخ ثم يغادر الكادر، وبعدها نرى الفانلة
المخرومة تطير في الهواء، وكذا الكالسون المتسخ، قبل أن يعود
الرجل في الكادر ويقف أمام المرأة وقد ارتدى فانلة داخلية نظيفة
وبوكسر شيك، وينظر للمرأة بإعجاب قبل أن يلقي بقبلة في الهواء نحو
المرأة ثم يغادر الكادر.



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

الآن عاد الرجل للكادر وقد ارتدى البذلة الشيك ، ثم يقوم بتلميع حذائه قبل أن يرتدي ساعة أنيقة ثم يعدل من هندامه أمام المرأة ، ويقوم برش برفان على ملابسه ، ثم يرتدي نظارة شمسية شيك ويغادر شقته المتواضعة .

الرجل ينزل على السلم فيمر بجوار رجل وزوجته ينزلان السلم ، فتحرك الزوجة أنفها وقد أعجبها البرفان بينما ينظر زوجها بدهشة للرجل (أبو نظارة) وقد شعر أنه تغير تماماً .

الرجل (أبو نظارة) يدخل شركته ويمر بجوار فتاته رائعة الجمال دون أن يكثر لها أو ينظر إليها ، فتنظر هي إليه بدهشة شديدة .

بينما يتردد صوت (جيتام) في الخلفية:

«لو كان لبسك مش على مزاجها بس شايف إن ذوقها هو ذوق معظم الناس يبقى العيب فعلاً في لبسك . . عشان كده لازم تقنع نفسك من جواك إن الشياكة والأناقة أوبشن ضروري ف حياتك من غيره هتفضل حاجة ناقصاك في عيون اللي حواليك . . وخذ بالك . . الشياكة الحقيقية بتكون من بره وجوه . . حتى اللي عيون الناس مش شايفاه روحهم دايمًا بتحس بيه . . ده غير إن اللي عارف من جواه إن فيه حاجة ناقصاه دايمًا بيتصرف تصرفات الناس الناقصة . . واللي واثق إنه تمام . . كل الناس بتشوفه تمام» .





للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

مكتب جيتام في كافيته «Emotions»

عودة لمكتب (جيتام) الذي يقف مع الشبان الثلاثة على مائدة مايكروسوفت حساسة اللمس ، إذ نرى آخر صورة لفتاة الرجل (أبو نظارة) وهي تنظر له بدهشة وقد تجمدت الصورة عند هذا المشهد ، بينما ينظر جيتام لصورة الشاب الفانكي وهو يتجه إلى مسجد الجامعة فيضغط عليها لتتحول من مجرد صورة إلى ملف فيديو يعمل على كلام (جيتام) ونشاهد في ملف الفيديو المشهد التالي:



مسجد الجامعة

الشاب الفانكي يصلي في المسجد ، ثم يخرج ويرتدي حذاءه ويربط رباطه وهو ينظر لفتاة أحلامه الملتزمة التي خرجت هي أيضاً من المكان المخصص للنساء ، بينما تنظر هي إليه نظرة خاطفة قبل أن تعطيه ظهرها وتنصرف .

الشاب الفانكي يرتدي نظارة شمسية ، ويضع الهاند فري في أذنيه ، ويجري مكالمة فيديو مع فتاة جميلة ، ثم يبدو أنه يتذكر شيئاً ما فيغلق الهاتف فجأة قبل أن يفتح الجاليري ويستعرض عدة صور له مع فتيات جميلات ويمسح كل صورة يستعرضها!

الشاب الفانكي يعود للمسجد ويعيد صلاته بخشوع

بينما يتردد صوت (جيتام) في الخفية:

«ولو كانت حبيبتك متدينة وانت شقي وما بتركعهاش . .
إوعى تخلي التدين مدخل مؤقت ليها وانت ناوي من جواك
ترجع لأصلك بعد ما تظبطها . . اقع نفسك إن حبك ليها
هيغيرك وهيخلي المكسب مكسبين . . الأول إنك هترجع
لربنا اللي بعدت عنه . . والثاني إنك هتفوز بإنسانة غير كل
اللي عرفتهم في شقاوتك ولعبك بديك . . وماتنساش كلام
ربنا . . الطيبون للطيبات . . والخبيثون للخبيثات» .

مع نهاية كلام (جيتام) وانتهاء المشهد تتجمد آخر صورة
للشاب الفانكي وهو يصلي ، قبل أن يضغط (جيتام) على
صورة جديدة للفتاة العبقرية التي تخص الشاب ذا الصليب ،
وهي تجلس في المكتبة بين عمودين من الكتب ، لتتحول
الصورة بمجرد ضغطته إلى ملف فيديو .



مكتبة مصر العامة بالدقي

الفتاة العبقرية تجلس بين عمودين من الكتب وتقرأ كتاباً
تمسكه بين يديها بانهاك ، بينما يسير الشاب ذو الصليب
بجوار المكتب الذي تجلس عليه الفتاة وفي يده كتاب يقرؤه

وهو سائر ، فيصطدم بأحد عمودي الكتب بعمد يبدو لها غير مقصود لتسقط الكتب أرضاً ..

الفتاة تنهض مفزوعة ، بينما يرفع الشاب يده باعتذار ، قبل أن يجلس على الأرض ويضع الكتاب الذي كان في يده بين الكتب الملقاة ، ويقوم بجمعها ووضعها على المكتب مثلما كانت تماماً ، بينما يأخذ كتاباً آخر غير الذي كان يقرؤه ويهم بالانصراف ..

يتصنع الشاب أنه لاحظ أن الكتاب الذي أخذه ليس كتابه ، فيعود للفتاة ويستأذنها أن يأخذ كتابه من بين عمود الكتب الذي قام برصه للتو ، فتشير له دون اكتراث وهي تواصل القراءة .

الشاب يفحص عمود الكتب الذي قام برصه حتى يعثر على كتابه فيلنقطه ويراعي أن يُظهر غلافه للفتاة وهو يأخذه ثم يشكرها .

الفتاة تترك الكتاب الذي كانت تقرأه وتنظر باهتمام للكتاب الذي يمسك به الشاب ، ونلاحظ أنه كتاب مهم جداً للغاية بالنسبة لها ، حتى إنها تستوقف الشاب وتأخذه منه بابتسامة مقتضية ، وتفر صفحاته وهي تدقق فيها ، ثم يدور بينهما حوار لا يخلو من الابتسامات الرقيقة .

الشاب يجلس على جهاز الكمبيوتر في قاعة المالتيميديا بالمكتبة وقد فتح أحد المواقع العلمية ، وينظر لساعته في

ضجر ، ثم ينظر لباب القاعة حتى يلمحها وهي قادمة فيلنفت بسرعة لشاشة الكمبيوتر ويمثل أنه يتابع الموقع المفتوح على جهازه بانهماك .

الفتاة تجلس على الجهاز المجاور له وتسلم عليه بابتسامة رقيقة ، ثم تلاحظ الموقع الذي يجلس عليه فتنتظر له بفرحة شديدة ويدور بينهما حوار حميمي .

الشاب والفتاة في أحد المعامل وقد ارتدى كل منهما بالطو أبيض وتلتقط الفتاة أنبوبة اختبار بها سائل معين تضيفه إلى أنبوبة اختبار أخرى بها سائل لونه مختلف ، فيحدث تفاعل بسيط وتفرح وهي تشير للتفاعل وتحدث مع الشاب بحميمية ، فيلنقط الشاب أنبوبة اختبار ثالثة ويتطوع بوضعها على الأنبوبة الثانية بطريقة من يعلم ما يفعله ، فيحدث انفجار!

بينما يتردد صوت (جيتام) في الخلفية:

«أما لو كانت حبيبتك Genius أو عبقرينو ومش قادر تجاريتها ف عبقريتها . . فعلى الأقل لازم يبقى عندك فكرة عن الحاجة اللي هي عبقرية فيها . . لو عبقرية في الكمبيوتر يبقى لازم تكون بتعرف تنزل ويندوز وتتدخل ع النت . . لو جامدة في الكيمياء . . يبقى لازم تعرف إن الميه بتتكون من الأوكسجين والهيدروجين . . لو خبرة في الأحياء يبقى لازم تكون فاهم إن عملية البناء الضوئي . . النبات بيستنشق فيها ثاني أكسيد الكربون ويطلع أوكسجين ، والوطواط مش

طائر لأنه من الثدييات .. ملاحظتها إنك بتهتم بقراءة
نفس الكتب اللي بتحبها هيحسها إن سخرية الناس منها
راجعة لجهلهم .. وهتفرح جداً من جواها إن فيه على
الأقل واحد من الشباب ليه نفس الاهتمامات .. وخذ بالك ..
كل كتاب هتمسكه هيتحسب عليك .. وعلى كل حال .. العلم
نور برضه .. أأأ .. بس مش دايماً (تتزامن الجملة الأخيرة
مع الانفجار)».



مكتب جيتام في كافيته «Emotions»

الرجل أبو نظارة والشاب الفانكي ينظران لمائدة مايكروسوفت
ويضحكان على صورة الشاب ذي الصليب وقد تفحم وجهه، ووقف
شعره في المعمل، وكذا فئاته العبقرية في مشهد كوميدي للغاية ..

الشاب ذو الصليب ينظر لهما غاضباً، بينما ينظر لهما (جيتام) ساخرًا
قبل أن يضغط على صورتين أخريين صغيرتين للغاية ويفردهما بحجم
كبير، فنجدهما صورتين عبارة عن ملفي فيديو متحرك للرجل أبو
نظارة وهو يسرع الخطى نحو فئاته الجميلة في الشارع وهي تسير
وعلى وجهها ابتسامة عريضة نحو سيارة شاب آخر ينتظرها أمام
الشركة ويفتح ذراعيه في استقبالها، بينما نجد في الصورة الثانية الفتاة
المتدبنة وهي تقف مع أحد ضباط حرس الجامعة وتشير نحو الشاب
الفانكي الذي يسرع محاولاً الهرب ثم يتوقف الفيديو عند هذا الحد ..

الشاب ذو الصليب هو الذي يضحك وكلاهما متجهم بينما يقول
(جيتام):

كلكم وقعتوا ف نفس الغلطة .. أنا قولت تقنعوهم إن عندكم
نفس الثوابت اللي هما مؤمنين بيها .. مش تبفوا نسخة منهم
وما قولتش كمان تدلقوا نفسكم .

ثم يتردد صوت (جيتام) في الخلفية ، بينما نرى عدة مشاهد متتالية
لكل شاب منهم مع حبيبته

«زي ما في المغناطيس لازم يكون القطبين مختلفين عشان
ينجذبوا لبعض .. البنات بتعشق الولد المختلف عنها .. بس
الاختلاف اللي يكمل نقص ف شخصيتها .. مش يخوفها
منه .. او عى تحاول تحسسها إنك Copy و Paste منها ..
وإياك تلمح لها إنك غيرت نفسك علشانها .. خليك انت زي
ما انت .. وخلي تغييرك اللي اتغيرته ببيان إنه مش تغيير
ولا حاجة .. حسسها إنك كده من زمان بس هي اللي ما
كانتش واخدة بالها ، وده ف حد ذاته كفيلا إنها تبدأ تعيد
حساباتها وتقيم نظرتها ليك من أول وجديد» .

الرجل أبو نظارة يضع برفان قبل أن يدخل البارتيشن الذي يعمل به ،
بكامل أنافته وشياكته فيلنفت له الجميع ، وفي يده كيس ساندوتشات
فول وطعمية و على وجهه ابتسامة رقيقة مهذبة .

ويبدو أن بعض زميلاته قد أعجبهن البرفان ، في الوقت الذي ينظر له
الجميع قبل أن يخرج ساندوتشات من الكيس ويوزعها عليهم وهو يبادلهم

الضحك وتبدو السعادة والرقّة على وجوههم، في حين يقترب من مكتب فتاته الجميلة وينظر إلى عينيها مباشرة ويقول **بابتسامة رقيقة:**

SORRY إنني ما عملت حسابك في الساندوتشات . . بس عارف إنك مالكيش في الفول والطعمية . . عشان كده مش هقول لك انفضلي!

ثم يمسك بساندوتش ويقضم منه قطعة كبيرة وهو يتركها وينصرف، دون أن يهتم بالبحث عن أي موضوع يجاريها فيه مثلما كان يفعل، فتنظر له بدهشة.

أما الشاب الفانكي، فبعد أن يخرج من المسجد ويرى فتاته المتدينية هي الأخرى تهم بمغادرة الجامع، يجد شلة من أصدقائه يستمعون لأغنية جميلة على موبايل أحدهم فيدخل عليهم ويسلم بمرح:

الشاب الفانكي:

هاي Guys . . جامدة جداً الأغنية دي . . أنا هفتح البلوتوث يا عمر . . ابعتها لي.

صديقه عمر (ينظر له بدهشة قائلاً):

إيه يا ابني . . إنت مش كنت اتدروشت؟ . . إيه اللي رماك ع الأغاني من ثاني؟

الشاب الفانكي:

وَأولاً اسمها التزمت مش اتدروشت . . ثانيًا الدين الصح

ما يبجر مكش من السعادة . . إدي لربنا حقه وفروضه وخذ
من الدنيا اللي يبسطك بس ما يغضبهاوش .

الفتاة الملتزمة ترمق الموقف بطرف عينا قبل أن تصطدم فجأة كرة
سريعة برأسها، فتصرخ وتنظر للمتسبب في ذلك فتجده شاباً عابثاً يجري
خلف الكرة للحاق بها، دون حتى أن ينظر لها ويعتذر فتصرخ فيه:
حاسب يا حيوان .

**الشاب العايب (بتاع الكرة) ينظر لها بغضب ويقول بسخرية ممتزجة
بالضيق:**

كله من ذوقك يا ست الشيخة . . ما هي دي أخلاق الملتزمين .

الفتاة الملتزمة (صارخة):

وانت أمثالك يعرفوا إيه عن الملتزمين عشان تتكلم؟

الشاب الفانكي يدخل بينهما بهدوء ويشارك في الحوار .

الشاب الفانكي:

صلوا ع النبي يا جماعة واخزوا الشيطان .

ينظر الشاب الفانكي للشاب الذي شاط الكرة ويتابع:

أولاً إنت غلطان، وكان أولى بيك تعتذر لأنك أكيد ما
ترضاش كده لأختك .

ثم ينظر الشاب الفانكي لفتاته الملتزمة ويتابع:

وانتي المفروض كنتي ما تشتميش . . القوي الحق من يملك

نفسه عند الغضب زي ما الرسول عليه الصلاة والسلام
يقول .. والمؤمن الحق ليس بلعان ولا طعان ولا فاحش
ولا بذيء .

الشاب العايب الذي شاط الكرة يشعر بالحرج فيقول:

عموماً أنا آسف وبعتر الشتيمة اللي سمعتها مش موجهة ليا .

الشاب العايب يأخذ كرتة وينصرف ، بينما ينظر الشاب الفانكي للفتاة
الملتزمة ويتابع وهو ينظر لعينيها بحب:

لما تيجي تكلمي واحد مستهتر مش عارف معنى الالتزام
خليكي أبسط من كده واستحملي جهله .. ربنا سبحانه وتعالى
يقول « ادع إلى سبيل ربك بالحكمة والموعظة الحسنة
وجادلهم بالتتي هي أحسن » .

ثم بيتسم ابتسامة رقيقة وينصرف فجأة ، وقد بدأت الدهشة والإعجاب
يتسللان إلى وجه فتاته .

الشاب ذو الصليب يجلس على أحد أجهزة الكمبيوتر في ساير المكتبة
وبجواره فتاته العبقرينو ، التي تترك الموقع العلمي الذي تتصفحه على
جهازها ، وهي تنظر لشاشة الجهاز الذي يجلس عليه الشاب وهو يشاهد
فيلم كارتون ويضحك بشدة ، وقد اندمج للغاية مع الفيلم وظهرت
روحه الطفولية التي تشاهدها فيه لأول مرة!

الآن نشاهد جيتام يلتف مع الثلاثة حول المائدة وهو منهمك في رسم
خطوط معينة مع حركات من يديه تدل أنه يخطط ويجهز ، ويتخلل
ذلك أنه يرفع وجهه ويتطلع لوجوههم ما بين لحظة وأخرى ، وقد

أنصت الجميع له في اهتمام وتركيز شديد، بينما لا يزال صوته يتردد
في الخلفية:

«و ف عز ما كل واحد فيكم هيلاقى حبيبته مش باين عليها
أي تغيير.. يقدر يعتبر كل كلمة لأ معناها آه.. وأي كلمة
حاضر معناها صبرك عليا.. والله لأ أوريك.. ويوم ما
تديك ضهرها اعرف إنها شايفاك من قفاها بطريقة
ماتفهمهاش غير بنت زيها.. وساعتها.. يبجي معاد العلامة
الفارقة اللي هتغير شكل علاقتكم ببعض تماماً.. لما تكتشف
فيك أهم حاجة كانت غايبة عن عنينا من يوم ما عرفتك
وما لاقتهاش ف حد غيرك.»



أمام شركة الرجل أبو نظارة

الفتاة الجميلة تغادر الشركة وتجد في انتظارها الشاب الذي انتظرها من
قبل في سيارته، وما إن يراها حتى يغادر سيارته ويفتح لها الباب
فيبدو على وجهها الحرج والتردد، وخلفها الرجل أبو نظارة الذي
يحبها وقد أمسك بعلبة عصير.

نشاهد (جيتام) وقد أمسك بكلب ضخم مخيف بإحدى يديه، ويسير به
في اتجاه الفتاة الجميلة بينما في يده الأخرى موبايل يضعه على أذنه
ويتحدث فيه.

فجأة الموبايل يسقط من يد (جيتام) فيترك كلبه وينحني لالتقاط الموبايل
بينما نلاحظ أنه يهمس في أذن الكلب بصوت هامس:

هشك عليها

الكلب ينقض بصوته المرعب وجسده الضخم على الفتاة فتصرخ
في رعب وتسقط أرضاً، بينما يجري الشاب الذي كان في انتظارها
بعيداً، وهنا يتدخل الرجل أبو نظارة وينقض على الكلب
ويمسك به قبل أن يصل للفتاة التي سقطت على الأرض بلحظة واحدة،
فيمسك فمه ويربت عليه ليهدهءه، فنجد الكلب قد هدأ تماماً قبل أن
يسير مبتعداً!

الناس تتجمع، ومن بين التجمع نرى الرجل أبو نظارة يمسك بيد الفتاة
بكل الحب والحنان ويساعدها على النهوض.

ما إن تنهض الفتاة حتى يخرج أبو نظارة منديلاً من جيبه ويعطيه لها،
ثم يعطيها علبة العصير وهو يقول في طيبة قلب مفرطة:

متخافيش واهدي خالص.. أنا مشيته خالص.

يمد يده الممسكة بعلبة العصير ويناولها لها متابعاً:

خدي اشربي عشان تضيعي الخضة.

الفتاة تنظر له وقد سالت الدموع من عينيها ويبدو في نظراتها الامتان
والخجل من نفسها على ما فعلته معه، دون أن ترد عليه أو تشرب
العصير، فيستطرد مبتسماً:

ياستي لو بتقرفي أنا لسه ما شربتش منها.

الفتاة تأخذ العلبة وتبدأ في الشرب وهي مازالت تتطلع له دون أن تنبس
بينت شفة، بينما يأتي رجل الـ Security الخاص بالشركة ويسأل بلهفة:

خير في إيه؟

الرجل أبو نظارة (ساخرًا):

لا مفيش .. أصلها عضت كلب بوليسي وضميرها مأنبها ..
إنت لسه فاكر؟

الرجل الـ Security ينظر حوله ويسأل:

هو فين الكلب ده؟ .. بتاع مين؟

الجميع ينظرون حولهم فلا يجدون أدنى أثر لـ (جيتام) أو الكلب .



أمام الجامعة

الفتاة الملتزمة تخرج من الجامعة مع بعض زميلاتها الملتزمات .

الفتاة تسلم على زميلاتها ثم تهتم بأن تعبر الشارع إلى الرصيف
المقابل، وفجأة تظهر سيارة تتجه نحوها بسرعة شديدة وقد أطلق
محركها صوتاً مرعباً .

الفتاة تتسمر في مكانها وقد ارتسم الرعب والهلع على ملامحها .

فجأة تجذبها يد الشاب الفانكي بقوة قبل أن تلمسها السيارة في
اللحظة الأخيرة .

الآن نرى (جيتام) داخل السيارة وهو ينظر نظرة ساخرة في المرأة الأمامية، ومنها نرى Zoom in على المشهد الخلفي للشاب والفتاة، حيث نرى الفتاة تنظر للشاب في امتنان، قبل أن يوقف لها الشاب الفانكي تاكس ويركبه كلاهما، بينما يغمز (جيتام) بعينه قائلاً:

والنبي لا يقين على بعض



في السايبر الملحق بالمكتبة

الفتاة العبقرينو تصرخ فجأة وتبكي بانهايار وعلى وجهها الرعب والهلع أمام جهاز الكمبيوتر الذي تجلس عليه وهي تردد:
لأ مش ممكن .

الشاب ذو الصليب يصوب الكاميرا الويب كام الملحقة بجهازه نحو الفتاة العبقرينو، ثم ينهض من مكانه ويتجه نحوها ويسألها باهتمام
في إيه؟

الفتاة عبقرينو (بانهايار):

إيميلي المتسجل عليه كل الإيميلات المهمة والكتب والدراسات بتاعتي اتسرق .. ده غير أصحابي ومعارفي اللي عرفتهم على مستوى العالم ومش هعرف أجيبهم ثاني .

الشاب (يطمننها):

طب اهدي . . كل مشكلة ولها حل إن شاء الله .

الفتاة عبقرينو (بانهيأر أكثر):

إلا المشكلة دي . . حتى الإيميل الثاني اللي المفروض
أستقبل عليه كلمة سر الإيميل الأولاني هو كمان اتسرق
ومقاش فيه أي حاجة ممكن توصلني بيه . . أنا ضعت
خلاص .

الشاب يجلس على جهازها ويعبث بأزرار الكيبورد .

في مكتبه يجلس (جيتام) أمام جهاز كمبيوتر، ويتابع المشهد من على
بعد عبر كاميرا الويب الملحقة بجهاز الشاب، قبل أن يخرج (جيتام)
هاتفه المحمول ويكتب رسالة قصيرة وفي عينيه نظرة ساخرة .

الموبايل الخاص بالشاب يعطي رنيناً يفيد بتلقيه صوت رسالة قصيرة،
يفتح الشاب الرسالة التي تقول كلماتها: 123456789 . . ده الـ Password
الجديد اللي عملته لإيميلاتنا اللي سرقتها . . رجع الإيميلات وقول لها
تغير الـ Password قبل ما الحرامي يسيطر ع الإيميل ثاني، وربنا
يكفيها شر ولاد الحرام .

شبح ابتسامة يرتسم على وجه الشاب وهو يقرأ الرسالة، قبل أن يجلس
على جهاز الفتاة، ويبدأ في ضرب أزراره بسرعة وانهماك شديد
يوجي باحترافه، وبذله للمجهود .

الشاب (ملتفتاً إليها بسعادة):

عملت هاك على اللي سارقه وخذت الباسوورد.

ثم يتابع بثقة ممتزجة بالفرحة:

ثانية واحدة بقي أغير Password إيميلك عشان مايعرفش يدخل عليه تاني .

الفتاة تقف خلفه وتمسك كتفيه بسعادة وحب دون أن تشعر وهي تراقب عمله ، وعلى وجهها ابتسامة رقيقة .



كافيه «Emotions»

صورة بانورامية داخل كافيه «Emotions» للشباب الثلاثة؛ إذ يجلس كل منهما مع حبيبته في حب وهيام ، لكننا نلاحظ أن الشاب الفانكي قد بدأ في تربية ذقنه بشكل خفيف وأنيق للدلالة على أنه يجمع بين الدين والدنيا ، بينما يجلس الشاب ذو الصليب مع حبيبته العبقرينو بعد أن خلعت نظارتها الطبية وصارت أكثر جمالاً واهتماماً بنفسها ، في حين ارتدى الرجل أبو نظارة طقم كاجوال شيك زاهي الألوان ، ويعطيه سناً غير سنه ، وهو يجلس مع فتاته رائعة الجمال .

ومن مسافة قريبة نسبياً ، وقف (جيتام) يتأمل المنظر بسعادة ، وما إن يعطي ظهره ، ويهم بالدخول لمكتبه حتى تشعر الفتاة بارعة الجمال المرتبطة بالرجل الأصلع أبو نظارة ، أنها تتشبه عليه فتتأدي عليه

بصرامة قائلة:

لو سمحت .

(جيتام) يقف وينتفت لها ، فتتظر له بتركيز وتتابع:

أنا شوفتك فين قبل كده؟

جيتام:

مش حضرتك المزة اللي كان فيه كلب هيعضها من قيمة كام يوم ،
والأستاذ ده أنفذك وإداكي إزازة عصير؟

الرجل أبو نظارة يتلعثم ويبدو على وجهه الارتباك بينما تنظر الفتاة
بتحفز لـ(جيتام) وتسأله

الفتاة الجميلة (بتحفز وغضب):

إنت صاحب الكلب؟

جيتام (ساخرًا):

لا أنا إزازة العصير .

الفتاة الجميلة:

نعم؟

جيتام (يداري على الموقف):

شوف الدنيا الصغيرة إزاي ، ده أنا كنت دابخ عليكى .

الفتاة الجميلة (بدهشة):

ليه؟



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

جيتام:

أصلي كان عليا رهن .

الفتاة تبتسم ويضحك الرجل أبو نظارة ثم يحدث fading للكلام ، وتبتعد الكاميرا ونحن نرى كل من في الكافية يضحكون بشدة ، و(جيتام) يواصل كلامه مع الجميع وكأنه يدايعهم أو يقول كلامًا مضحكًا ، بينما يواصل الشاب الفانكي حديثه الرومانسي لفتاته الملتزمة ، وكذا الشاب القبطي مع فتاته العبقرينو . .

الكادر يتسع ويبتعد فنجد (حسين) مدير الكافية يقف في زاوية خفية مع مصور الفيديو ويقول له هامسًا:

حسين:

إنت متأكد إنك صورت التلات قصص من بدايتها لغاية اللحظة دي واللا هتعملنا مشكلة مع جيتام بيه؟

مصور الفيديو:

ما تقلقش يا باشا . . ماتحاسبونيش غير لما تتأكدوا إن كله متصور وجاهز للعرض في أي وقت .



داخل أحد سكاشن الدراسة بالجامعة الأمريكية

(شريف) المعيد بكلية الـ Business Administration بالجامعة الأمريكية ، يبدأ محاضراته في السيكشن المخصص للدراسة ، وقد ارتدى بذلة أنيقة

قائلاً بابتسامة مرحة ، وهو يتجول بين المقاعد ويشرح بشكل مسرحي ،
ونلاحظ أن في السيكشن يوجد طالب يجلس بجوار طالبة وينظر لها
حبباً ، قبل أن يمد يديه من أسفل المقعد للإمساك بيديها في انسجام .

شريف:

Good morning everybody.. We gonna talking today about
two of the most important concepts in the science of
economy.. Supply and demand.. Or

العرض والطلب

(شريف) يلمح المشهد الرومانسي بين الشاب والفتاة أثناء
الشرح ، فيقترب منهما بهدوء وخبث وهو يواصل الشرح دون أن
يلفت نظرهما .

شريف:

وعشان مصطلح العرض والطلب هيقابلنا كتير في علم
الاقتصاد ، خلوني أبدأ الموضوع بسؤال بسيط جداً يقول:
يعني إيه عرض وطلب؟

فجأة يمد (شريف) يده ويقبض على قبضتي الشاب والفتاة المتشابكتين
ويجذبهما ليقفا ، فينظر لهما طلاب السيكشن ، وقد ارتسم على وجهيهما
الخجل والحرص بينما يضحك باقي الطلاب و(شريف) يتابع ببساطة
وتلقائية:

ده العرض

أحد الطلبة (ساخرًا):

Cut والللا Uncut ؟

الطلبة تضحك ، بينما يبتسم (شريف) ويقاطع الشاب الساخر
بطريقة مرحة:

Oh no no no . . نركز في موضوعنا وما اسمعش أي
تعليقات جانبية Please

الشاب والفتاة يحاولان التملص ، لكن قبضة (شريف) القوية تحول
دون ذلك ، قبل أن يشير (شريف) لهما متابعًا:

إنتوا مالكم مرتبكين كده ليه؟ هو إنتوا بتعملوا حاجة غلط؟ . .
(ينظر لباقي الطلبة ويتابع الشرح) This Guy ييحب
الـ This Mozza . . كلنا ندعي لهم ربنا يوفقهم .

طلبة السيكشن (في آن واحد):

ربنا يوفقهم .

شريف:

So . . لما يروح يتقدم لباهاها (ينظر للشاب ويسأله) . . مش
برضه ناوي تروح تتقدم وللا ناوي تفلسح؟

الشاب (وقد بدأ يتشجع):

لا هروح إن شاء الله .

شريف:

That's great . . لما هيتقدم إن شاء الله ويقول الأسطوانة

اللي كلنا عارفينها وبتبدأ بـ: يا عمو يشرفني أطلب إيد بنتك . .
ويرد باباها كالعادة بنفس الأسئلة اللي بتبدأ بـ: يا ابني
احنا بنشتري رجالة، إلى آخره من الأسئلة . . هينتهي
الاتفاق بشوية شروط بسيطة من باباها - اللي كان من شوية
بيشتري رجالة - لغاية ما في الآخر هيلبس اخونا الغلبان في
حوالي 200، 300 ألف جنيه عشان الجواز تتم .

الطالبة كلها تضحك بينما يواصل (شريف) شرحه بطريقته الكوميديّة:

Imagine معايا يا جماعة إن أو نكل اتقدم له عريس تاني
أغنى من صاحبنا و عرض عليه إنه يتجوز بنته بـ Options
أفضل توصل لبتاع 500 ألف جنيه .

أحد الطالبة:

أخونا الأولاني هيتفلسع وش .

إحدى الطالبات:

البنت هتغير رقمها عشان ما يعرفش يكلمها تاني .

شاب آخر (ساخرًا):

باباها هيعمل حادي بادي .

شريف:

Nice . . هو ده العرض والطلب . . كل ما زاد الطلب على
موزة . . أو سلعة . . زاد سعرها . . يبقى إذن في علاقة تناسب
طردي بين الطلب والسعر . . وكل ما زاد عرض الموزة أو السلع

كل ما رخص سعرها عشان ساعتها هتبقى مرمية وعلى قفا من
يشيل . . يبقى فيه علاقة تناسب عكسي بين العرض والسعر .

الطالبة جيرمين (بلامح رقيقة وابتسامه رومانسية):

طب والقسمه والنصيب يا مستر شريف . . فين دورهم؟

شريف:

موجودين طبعًا . . بس عند أم جيهان الخاطبة . . مش في
علم الاقتصاد .

جيرمين تضحك بخجل ، فيبتسم شريف ويقول لها بلهجة رقيقة
(وكأنه يعتذر لها):

على فكرة أنا زبون عند أم جيهان لأنني مؤمن جدًا بالقسمه
والنصيب . . بس الموزز هي اللي مؤمنة بأسعار السوق .



مكتب عميد الكلية

(مرورة) تجلس مع عميد الكلية في مكتبه، وقد ارتدت ملابس
Semi Formal دون أن تفارقها نظارتها الطبية، وقد سرحت شعرها
بطريقة الكيرلي المميزة، في حين تقول بسعادة:

رغم إنني قولت الكلام ده قبل كده كتير بس هافضل أكرره
كل شوية يا فندم . . قمة الشرف بالنسبة لي إن الجامعة
تتدبني لتدريس مادة الـ Promotion . . رغم إنني مش دكتورة
ولا حتى محاضرة دراسات عليا .

المدير (بابتسامة وقور):

أحياناً بتكون النماذج الناجحة في المجتمع ما بتقلش في أهميتها عن الأساتذة الجامعيين . . وإنتي بسم الله ما شاء الله مصر كلها بتتفرج على برنامجك . . شدي حيلك معانا عشان النجاح اللي حقتيه في الميديا تحققيه مع ولادنا وبناتنا يا أنسة مروة . . مش أنسة برضه؟

مروة (بابتسامة متحفزة):

طبعا (ثم تميل ناحيته وتتابع بثقة) and I'm Proud to be single



في إحدى الطرقات داخل الجامعة الأمريكية

على موسيقى مرحة مناسبة، وفي مشهد سلو موشن، نشاهد (شريف) يخرج من السيكشن مرتدياً نظارة شمسية أنيقة، ويسير في اتجاه اليمين، بينما نرى (مروة) تسير في الاتجاه المضاد نحوه لتتلاقى نظراتهما . .

الإعجاب يرتسم على ملامح (شريف) الذي يدقق النظر في ملامح (مروة)، ثم يخلع نظارته، بينما تنظر هي إليه نظرة حاولت أن تبدو طبيعية، وإن بدت عيناها غير ذلك . .

ثم نرى الضيق على ملامح وجه الطالبة (جيرمين) التي شعرت بالغیظ والغيرة . .



خارج الجامعة الأمريكية

(شريف) يسير مع زميله (أكرم) متجهاً نحو سيارته، بينما يقول
(أكرم) بدهشة:

مين كان يصدق إن إنت وجيتام تجتمعوا في بيت واحد بعد
كل اللي كان بينكم في فترة الدراسة.. ده إنتوا ما كنتوش
بتطبقوا بعض.

شريف:

أديك قولتها.. كنا.. وبعدين إحنا على آخر شهر في السنة
الأخيرة بقينا أصحاب جداً أكثر من اللي كانوا مأنتمين
طول الأربع سنين.. خصوصاً إنه عايش لوحده
ومارضيش يسافر دبي مع باباه وأخته.. وأنا زي ما أنت
عارف، مستقل عن ماما من زمان من بعد ما بابا الله
يرحمه توفي.

أكرم:

تصدق إنك خسرتني رهان رهنته مع عمر إن مفيش حد في
الدفة هيقدر يصلح بينكم ويخليكوا يعدي عليكم أسبوع من
غير خناق.

شريف (بدهشة)

كنتوا متراهنين على كام؟

أكرم:

One hundred dollar

شريف (ساخرًا):

يا ابن اللعيبه يا عمر .

أكرم:

اشمعي؟

شريف:

أصله عمل قعدة صلح بيني وبين جيتام قال فيها إننا لو
اتصالحنا وعدى علينا أسبوع واحد بس من غير خناق هيدينا
50 دولار .

أكرم (بغيط ممتزج بالمرح):

يعني إداكوا 50 دولار وأخذ زيهم مني من غير أي مجهود .

شريف:

وحياتك أخذ الـ 100 دولار كلهم .

أكرم:

إزاي؟

شريف:

أصله آخر يوم في الأسبوع راهنا على 50 دولار إننا مش
هنتخانق تاني حتى لو الناس وقعت بينا . . ساعتها أنا وجيتام

حاولنا نعمل تمثيلية إننا بنتخانق عشان ناخذ منه الرهان بس
إكتشفنا إن شاهي اتخطبت .

أكرم:

وما اتخانقتوش فعلاً من بعدها؟

شريف:

بقول لك شاهي اتخطبت .

أكرم:

صدق من قال يا أخي .. فتش عن المرأة .

شريف (بابتسامة حزينة):

كل شيء قسمة ونصيب يا مان .

أكرم (بلهجة مرحة):

بمناسبة النصيب صحيح ، أحب أقول لك إن نصيبك طلع
لوز .

شريف (ساخرًا):

أنا آخري لوز مش لوز .. ومش بعيد بواسير .

أكرم:

لما تشوفها هتغير رأيك .

شريف:

البواسير؟

أكرم:

لأ القمراية اللي انتدبوها عشان تدرس معاك . . بنت أمورة
ومتقفة وما فيهاش غلطة .

الآن (شريف) يصل إلى سيارته ، فيضغط على السنتر لوك لفتح
الأبواب ، قبل أن يجلس (أكرم) إلى المقعد المجاور لمقعد القائد ، في
حين يدلف (شريف) للسيارة ويجلس ، وهو يردد بلهجة ساخرة:
شوقتها يا معلم . . (يغمز بعينه متابعاً) حاجة كده زي
زغزغة الببيس في زورك وقت الصيف . . هيببيبيح .



منزل مروة

منى والدة مروة تجلس مع قدرية قارئة الفنجان ، وقد أخذت قدرية
تقرأ الفنجان بتمعن ، ونلاحظ أن والدة مروة مهتمة للغاية حتى إنها
تكاد تضع رأسها داخل الفنجان ، قبل أن تصيح قدرية فجأة بحماس:

إيه ده؟

منى (بحماس مماثل):

إيه؟

قدرية (بحماس أكبر):

الله أكبر الله أكبر

منى (بحماس أكبر مماثل):

في إيه؟

قدرية تنظر لها بخبث وتلاعب حاجبيها وهي تقول بدهاء:

والنبي ما انطق بحرف واحد غير لما أخذ الحلاوة . . هو ده
أي خبر .

منى تخرج ورقة مالية فئة العشرين جنيهاً وتناولها لها بدون تفكير
وهي تقول بإلحاح

منى:

انظقي بسرعة .

قدريّة:

هتخلعه يا دكتورة منى وهيغور ف 60 داهية .

منى:

تخلع مين يا ولية . . إذا كنت أنا جايباكي عشان تشوفي حظها
المنحس اللي خلاها لغاية دلوقت ما تتجوزش . . عايزاها
تخلعه قبل ما تتجوزه؟!

قدرية تهيد بيدها على صدرها وهي تقول بتلعثم .

قدريّة:

يوه . . لامؤاخذة يا ست منى . . ده أنا كنت بقري فنجاني أنا . .
هي تلاقبها البت عطيات بنتي . . أصلها حلمت من كام يوم

بحلم أسود على دماغها ودماغ اللي خلفوها قال إيه ياختي ..
منى تسلمها فنجانها لتقرأه وهي تقاطعها قائلة بنفاد صبر .

منى:

خدي فنجاني أقريه الأول يا قدريه وبعدين نبقي نشوف
حكاية بنتك عطيات وحلمها المنيل .

قدريه تلتقط الفنجان وهي تردد .

قدريه:

منيل على دماغها ودماغ اللي خلفوها .

منى (بنفاد صبر)

ألف مرة .. اقري فنجاني بقي وخلصينا .

مني تعود للجلوس بينما تمسك قدريه الفنجان وتدقق فيه النظر ثم
تصيح فجأة

قدريه (بحماس)

إيه ده؟

منى (بحماس مماثل)

إيه؟

قدريه (بحماس أكبر)

الله أكبر الله أكبر

منى (بحماس أكبر مماثل)

في إيه؟

قدرية تنظر لها بخبث وتلاعب حاجبيها وهي تقول بدهاء:

الخبر ده بقى ليه حلوة تانية.. ده أنا هشرح قلبك الحزين .

منى تخرج ورقة مالبة فئة العشرين جنيهاً وتناولها لها بدون تفكير
وهي تقول بنفاد صبر:

اللهم طولك يا روح .

قدريّة:

هتوقّعه أخيراً يا أم مروة والنهاردة كمان .

فجأة جرس باب الشقة يدق ، فتهرول منى نحو الباب بلا وعي وما إن فتحتّه
حتى تحتضنها مروة وتعانقها بفرحة وسعادة الدنيا قائلة بحب وحماس

وقّعتّه يا ماما وقّعتّه

قدرية تنهض من مكانها وتطلق زغرودة قوية بينما تسأل منى مروة
بلهفة ومرح طفولي:

طب أوصفيهولي .. أوصفيهولي بسرعة

مروة (تهرش رأسها بخفة ظل وهي تفكر):

أمممم .. أبيض .. وعريض .. وآخر شياكة

منى:

وعرفتيه إزاي؟

مروة (بدهشة):

عادي يعني .. صاحبتني جابتهولي

منى:

وهييجي يقابلني إمتي؟

مروة (باستغراب شديد):

يقالك ده إيه؟ مانا لابساه ف رجلي أهو .

منى (بصدمة شديدة):

هو إيه ده؟

مروة:

الشوز الجديد .. (تنظر لحدائها بمرح وفرحة وتتابع):

ماركة كريستيان ديور وبسعر مش هتصدقيه .

قدرية قارئة الفنجان تهم بالانصراف وقد شعرت بالحرج وتقول بخجل:

طب استأذن أنا بقى يا دكتورة منى .

منى تنقض عليها وهي تمسكها من كتفيها بقوة وتصيح فيها

بعنف:

تستأذني ده إيه؟ هو دخول الحمام زي خروجه؟

مروة (بدهشة):

مين دي يا ماما؟!

منى:

دي خالتك قدرية المبروكة بتاعة الفنجان .. سرها باتع
ومفاسه 39 برباط .. (تلنت لقدرية وتصرخ فيها) إيدك يا
وليه على الحلاوة اللي خديتها حار ونار في جنتك .

قدرية (محاولة المراوغة):

ليه بس يا دكتورة منى .. النهاردة برباط بكرة يبقى بابيونة .

منى (بسخرية غاضبة):

بابيونة يا نصابة؟

قدرية:

لا والنبي ما نصابة .. أنا قولت هتوقعه وهي وقعته وبعدين
أول الخيش قطرة .

منى تضغط على عنقها بعنف وهي تقول بغضب:

أول الخيش قطرة يا نصابة يا جاهلة .. طلعي الفلوس بدل ما
هخلص عليك .

مروة تنظر للموقف بفرع وتحاول تهدئة والدتها .

مروة:

خلاص يا ماما الست هتموت في إيدك .

قدرية تخرج الفلوس من جيبتها فتأخذها منى بالكامل ، **بينما تقول**
قدرية:

أنا خدت منك 40 جنيه ودول 60 .

منى:

الباقى هاخده حلاوة خلع بنتك عطيات لجوزها . . (تدفعها نحو الباب وهي تقلدها) هو ده برضه أي خبر؟

قدرية تنصرف ، وما إن تغلق منى الباب خلفها بغضب حتى **تضحك**
مروة قائلة:

مش عيب تبقي دكتورة جامعية وتسلمي دماغك للكلام
الأهبل ده . . بجد مش مصدقة .

منى تجلس على الكرسي وكأنها تسقط عليه وتقول بحزن:

أنا خلاص قدمت استقالتى . . وبعدين أنا اللي مش مصدقة إزاي
بنتي المذبة الجميلة المتففة اللي مش ناقصها حاجة تقعد من
غير جواز لحد دلوقت .

مروة تحتضنها من خلفها وتقول برقة:

عدم الجواز مش عيب يا أمى . . إنتي عارفة بنفسك إني لو
كنت عايزة أتجوز وخلاص زي اللي بيتجوزوا على نفسهم
كان زمانك بقيتي جدة .

نرى الحنين واللهفة على وجه منى بمجرد ذكر كلمة (جدة) حتى إنها
تغمض عينيها وتتذوقها وهي تقول:

الله . . نفسى أبقى جدة فعلاً . . أدفع نص عمري وأسمعها
من ولادك .

مروة (تستدير وتواجه أمها بغضب):

ممكن من بكرة تسمعيها لو عايزة .. بس ممكن بعدها تسمعي
إن بنتك مطلقة .

ملاح مروة تلين وهي تبتم وتتابع:

وعمومًا ما تقلقش .. فيه موز جديد ظهر .

منى تنتفض وهي تلتفت لها قائلة بفرحة:

بجد؟

مروة:

بجد، وفيه خبر تاني كمان هيسطك .

منى:

إيه؟

مروة (مقلدة قدرية):

والنبي ما أنطق بحرف واحد غير لما آخذ الحلاوة .. هو ده
برضه أي خبر .



منزل جيتام وشريف

شريف يدخل المنزل الأنيق الفخم، بينما نسمع صوت جيتام منبعثاً من
داخل غرفته

ص . جيتام:

وووووو . . الله عليك يا جوجو وإننت مظبط قلوب الحبيبية
ومدوّبهم ف بعض دوب . . والليلة دوب ولازم نرضى بالمكتوب
الفيمتو ثانية . .

شريف يتجه لغرفة جيتام ويفتح بابها؛ حيث نرى على جدرانها
بوسترات لاعبي المصارعة العالميين ، في حين تبعثرت ملابس جيتام
بإهمال في جنبات الغرفة، بينما نجد جيتام جالسًا على جهاز الكمبيوتر
الخاص به في انهماك وجواره كلبه الضخم .

جيتام (يتابع بسعادة وفخر):

الجروب بتاعي ع الفيس بوك وصل المشتركين فيه لـ 150
ألف Member تعالى شوف عمك .

شريف (بدهشة):

150 ألف Member مش عارفين يظبطوا موزهم وسايبيك
تخطط لهم؟

جيتام (بتفاخر):

تخيل؟

شريف:

أخيرًا هنحل أزمة اللحمة الضاني ف مصر . .

جيتام:

اشمعنى؟

شريف (ساخرًا)

بقي عندنا 150 ألف خروف .

ثم نسمع صوت جرس الباب يضرب فينتجه شريف لفتح الباب .



الطريقة الموجودة خارج منزل جيتام وشريف

ما إن يفتح شريف الباب حتى يظهر عم (فكري) جارهما المريض نفسيًا ، الذي يسكن في الطابق الأسفل من شقتيهما ، وقد ارتدى طاقة ، وقميصًا بحمالات ، ويبدو من مظهره كما لو كان في حقبة الستينيات والسبعينيات ، بسوالفه العريضة وبنطلونه القماش الشارلستون ، وقميصه ذي الإستايل القديم بطريقة تضي عليه الشياكة القديمة ذات المظهر الكوميدي . .

وما إن نطالع وجهه حتى يقول بلهجة كوميدية:

القطعة عضت رجلها . . جابت المصيبة لنفسها .

شريف (وهو يربت على كتفه ليأخذه على قد عقله):

طب اهدى يا عم فكري . . كله هيتحل إن شاء الله .

عم فكري (بعصبية كوميدية):

شششششش . . إيش فهمك إنت . . بقولك القطعة عضت رجلها

جابت المصيبة لنفسها يا مؤمن .

شريف (ساخرًا وهو يبتسم):

معلش يا عم فكري أنا أصلي مخي على قدي .

عم فكري (بخيلاء وعظمة):

طبعاً على قدك .. دي ريني قطتي الأنتم .. محدش هيحس بيها
زيي .. عشان كده انا طالع أقولك ما تعملش حسابك تحاول
تحل المشكلة دي .. أنا هعرف أحلها بطريقتي .. See you
عم فكري يولي ظهره وينصرف ، بينما يضحك شريف وهو
يضرب كفاً بكف ثم يغلق الباب .



منزل جيتام وشريف / غرفة السفارة

الآن نرى جيتام يجلس على المائدة ليتناول الطعام
(ساندوتشات تيك أواي) ويجلس شريف على ركبتيه
على الكرسي مصدرًا مؤخرته للخلف بشكل كوميدي ..

شريف يستدير ليتناول ملعقة من السلطة فيصدر مؤخرته لجيتام قائلاً:
إلا قول لي يا جيتام .

جيتام يوقف الملعقة التي يأكل بها في فمه ناظرًا لمؤخرة شريف بغضب
وامتعاض ، قبل أن يقول بغیظ:

لأ كده اسمها غير لي يا جيتام .. شطفني يا جيتام .. مش
معقولة كده ، هتكرهني ف الكبدة الإسكندراني اللي باكلها

شريف بعد أن أخذ السلطة يستدير ليعود مؤخرته عن جيتام قائلاً:
Sorry .. بس أنا فعلاً مش قادر أفهم إيه سر اهتمامك بدور

مرسال الغرام اللي عمال تلعبه طول الوقت ده ومكرس له وقتك وجهدك من غير أي مقابل .

جيتام يتوقف عن الأكل ، ثم يرفع عينه لشريف قائلاً بصرامة:

كل راجل أو شاب بساعده بضمن إنه بقى زبون مستديم في الكافيه بتاعي ، وده اللي بيخلي الناس تتخانق شهور عشان بس تعرف تحجز عندي قعدة مدتها نص ساعة .. أنا الـ Waiting list عندي محجوز لسنة قدام .

شريف يمسك بالساندوتش ويقربه من فمه قائلاً بابتسامة خبيثة:

ما ده شيء بديهي أقدر أفهمه لوحدي .. بس يا ترى ده السبب الوحيد؟

جيتام يواصل الأكل وهو يقول بلا مبالاة:

وأنا هعوز إيه تاني؟

شريف يواصل الأكل قائلاً بلهجة مستنفة:

يعني .. تثبت لنفسك حاجة مثلاً .. أو تعوض شيء ناقصك .

جيتام يتوقف عن قضم الساندوتش ويرفع عينه ليمعن النظر في وجه شريف لبرهة من الوقت قبل أن ترتسم ابتسامة ساخرة على وجهه **قائلاً:**

ياريتني أعرف أعمل كده .. كنت عوضت الحاجات اللي ناقصاني وأنا بأكملها فيك .

شريف (بمروح):

لا ياخويا أبوس إيدك خليني بعيد عن شغل البهلوانات
بتاعك ده .. أنا اهون عندي أفضل ف ألف قصة حب
ولا أحكم على قلبي بحب ليه مدة صلاحية هتخلص لما أبان
على حقيقتي .

جيتام:

عمري ما علّمت حد بيان بحقيقة غير حقيقته .. أنا كل اللي
بعلمه لزابيني إنهم يكتشفوا حقيقتهم المستخبية جواهم
بس هما ما يعرفوهاش .. ممكن تكون خايف م العوم
لكن لو حد زقك ف البحر هتوصل للبر الثاني أحسن من
أجدع عويم ..

جيتام يمعن النظر في وجه شريف وكأنه يقصده بالكلام مستطرّداً:

بس ده ما يمنعش إن فيه ناس تانية ما بحاولش آجي ناحيتها
عشان ببقى عارف اني لو زقيتهم هيغرقوا ف شبر ميه .

شريف (بيبتسم وقد أدرك المعنى):

ماتنساش إن أنا وإنّ شربنا من نفس الكاس يا عم الخبرة .

جيتام (ساخرًا):

بس أنا أتعلّمت من أخطائي لكن إنت لسه عايش ف زمن
الجامعة .. متهيألي لو حبيت بنت هتقولها: ممكن تسلفيني
كشكول محاضراتك؟

شريف:

عارف يا جيتام أنا الحب بالنسبة لي إيه؟

جيتام:

إيه؟

شريف (ينظر لعيني جيتام مباشرة):

لحظة تضحية بتضحى فيها بحياتك عشان حبيبتيك ..

جيتام (ساخراً):

وبعد ما تنقذها وتموت تتجوز هي واحد تاني!

شريف (برومانسية مفرطة):

لو جهون عليها إنها ترتبط بواحد غيري بعد ما أموت مش هلومها .. لأن حياتي نفسها حتهون عليا عشان خاطرها .. أنا الحب عندي مش بس كلمة بحبك ، ولا إله إلا الله محمد رسول الله ف آخر كل مكالمة .. الحب يعني حياة كاملة بديها لحبيبتى .. روح وقلب ودم برميهم تحت رجليها من غير ما انتظر منها أي مقابل .. أوقات كتير بحلم إن حبيبتى بتقع من مكان عالي وأنا من غير تردد برمي نفسي وراها عشان أحضنها وأخليها فوقيا قبل ما اخبط الأرض بدالها وانا بحميها من الوقعة .. وساعات تانية عربية بتجري ناحيتها زي الصاروخ وقبل ما تلمسها بطير عليها وأزقها بعيد وأتلقى مكانها الخبطة وما احشش بوجعها لأنى يكون فرحان

ومبتسم . . وساعات تانية جيش كامل جاي يهجم عليها بكل
معداته وأنا بحاربهم من غير ما يرمش لي جفن عشان
محدث يلمس شعرة واحدة منها .

جيتام:

جيش إيه ومعدات إيه اللي جاي يهجم على حبيبتك . . إنت
عايز تتجوز بن لادن؟ واللاناوي بعد ما تتجوزها تبلغ عنها
وتقبض مكافأة من أمريكا؟

شريف (بغضب):

عمرك ما هتفهمني . . للأسف أنا وإننت متشابهين ف كل
حاجة إلا الحب!

جيتام (ساخرًا):

ده انا لو كنت شبهك كنت اتبريت مني . . وبعدين إذا كان
ع التضحية والأكشن اللي نفسك تعملهم مع حبيبتك فأنا ممكن
اعمل لك كل ده من غير ما تموت يا أخي . . إيه تستعمل
رصاص حقيقي لما فيه رصاص فشتك؟

شريف (بجدية):

عموما القسمة والنصيب لما ييجوا ما بيحتاجوش الرصاص
الفشك بتاعك .

جيتام (باهتمام):

القسمة والنصيب إحنا المسؤولين عنهم باختياراتنا
وقراراتنا . . مفيش حاجة ظهرت قدامك؟

شريف (يضحك ساخرًا):

تفتكر لو فيه أنا ممكن أحكي لك بوشك الحلو عليا وبركاتك
اللي مغرقاني . . إن ما فيه موضوع حكيتهواك وكمل على
خير . . حتى اللي كنت هخطبها خلاص طلع عندها اضطراب
في الهرمونات وحولت ولد . .

جيتام:

ما إنت عشان واطي وما عندكش إخلاص سيبتها . . كان
المفروض ماتتخلاش عنها .

شريف:

بقول لك بقت ولدا!

جيتام:

اقلب إنت يا أخي واحنا هنغلب . . ده حتى تحويلك أسهل
بكتير ومش محتاج غير مقص .

شريف:

يا عم خلاص بقى غير السيرة دي . . (مواصلًا الأكل)
عملت إيه في الأسهم اللي شاريتها في البورصة؟

جيتام:

تمام الحمد لله . . من إمبارح للنهاردة كسبت 1500 جنيه .
فجأة موبايل جيتام يرن رنة خاصة ، فيانقطه بلهفة ويعبث بأزراره
وهو ينظر لشاشته بانهماك وتركيز قبل أن يرفع عينيه ببطء نحو
شريف ويضغط على الحروف قائلًا بلهجة ذات مغزى:

قصدي كنت كسبان 1500 جنيه . . يا وش السعد يا أبو شريف . .
يا بركة .

شريف (مازحًا):

تقريبًا كده والله أعلم العيب فينا إحنا الاتنين مع بعض . .
ماتيجي نهرب بره البلد .

جيتام (بسخرية مماثلة):

ده إحنا لو هربنا بري عشان ننجي من الطيارات والمراكب . .
الأتوبيس هيعرق بينا في الأسفلت . . إحنا Hopeless case
يابني ماتحاولش .

جيتام ينهي الأكل قبل أن ينهض وهو يحمل ما تبقى متجهًا نحو المطبخ صائمًا:

مين صحيح اللي خبَط علينا من شوية؟

شريف يدخل المطبخ حاملاً بعض الأطباق وهو يجيب:

ده عم فكري المجنون . . كان طالع يتحفنا بلسعة جديدة من
لسعته بس أنا خدته على قد عقله .

جيتام:

كان نفسي يقع ف إيدي .

شريف (ضاحكًا):

مش كفاية عليك اللي بتعمله فيه؟ والله مش بعيد الرجل ده
يعقل من كتر عمالك .

جيتام:

هي الجوازة اللي اتجوزتها من شهرين دي كانت الكام؟

شريف (وهو يلقي بواقي الطعام في الزبالة):

من بعد الجوازة الحداشر بطلت أعد وراها .

جيتام:

يا نهار زي وشها . . دي على كده عملت توب سكور!

شريف بيتسم بحزن وهو يمस्क أحد الأطباق المتسخة ثم يقول بلهجة
من يحاول تغيير الحديث وهو يلوح بالطبق

شريف:

خد بالك النهاردة الدور عليك ف تنضيف المواعين يا سي
فالانتينو .

جيتام يفتح صنبور الماء ويمسك بأحد الأطباق ليضعه تحت الصنبور
ويرد ساخرًا

جيتام:

عيب عليك أنا دايمًا . . .

شريف (مقاطعًا وهو يقلده):

بعمل اللي عليا . . وأول ما يجيلك ايميل بتخلع .

فجأة يصدر الكمبيوتر صوتًا يفيد تلقي جيتام إيميل جديدًا ، فينصرف
جيتام من المطبخ مسرعًا .

شريف (بغضب):

شوفت يا عم؟ أديك بتخلع أهو زي عوايدك يا بارد.

جيتام يتجه لجهاز الكمبيوتر في غرفته قائلاً بسخرية:

عيب عليك . . ده أنا بثبت لك إن رأيك فيا صح . . يرضيك

يعني أخليك تشتمني من غير ما أعمل بالشتيمة؟

صوت شريف يأتيه من المطبخ:

بيقى إنت اللي هتغسل يوم الجمعة.

جيتام:

كله إلا الجمعة . . إنت عارف إن اليوم ده بالذات أنا بكون

فيه Off .

ص . شريف:

برضه مش ناوي تقول لي بتعمل فيه إيه؟

جيتام يمسك بالماوس وهو ينظر للشاشة قائلاً في سخرية:

بصلي الجمعة .

جيتام ينظر للشاشة بتركيز ثم يعقد حاجبيه في دهشة . .

جيتام يسيطر الغضب الشديد على ملامحه ، وهو يشاهد ملف فيديو على

الجهاز وقد عقد ساعده الأيسر على صدره ، بينما وضع ذقنه بين

أصبعي الإبهام والسبابة ليده اليمنى التي تتعامد على ذراعه اليسرى ،

في حين يدخل عليه شريف الذي يلاحظ أن هناك شيئاً ما قد حدث .

شريف:

إيه يا ابني في إيه؟

جيتام لا يرد وقد ظل على نفس ملامحه الغاضبة بنفس الوضع كتمثال
مجمد فيقترب منه شريف قائلاً بنبرة أعلى:

جيتام.

جيتام يضغط زر مسطرة المسافات ليقف فيديو كان يشاهده، قبل أن
يلتفت لشريف قائلاً في لهجة بدت كأنها استجواب:

إنت اديت اللاب توب بتاعك لحد؟

ما انت عارف يا جوجو إني بعتبر اللاب توب بتاعي زي
مراتي . . ما ينفعش أسلفه لحد.

جيتام يشير نحو شاشة الكمبيوتر قائلاً في تساؤل:

أومال مقطع الفيديو ده وصل لحد غريب إزاي؟

شريف يقترب من الشاشة وينظر لها، ليشاهد مقطع الفيديو . .

في مقطع الفيديو نشاهد (جيتام) بلامح تبدو أصغر في السن، حيث
يقف في منتصف ساحة الكلية وقت أن كان طالباً ويصيح في كل الطلبة
بطريقة من فقد أعصابه:

Come on everybody . . الكل لازم يعرف . . أنا ما عنديش
حاجة أتكسف منها .

تبدأ الطلبة في التجمع حول جيتام وتزايد أعدادهم بينما يمسك أحدهم
جيتام ويحاول أن يهدئه ويتعد به .

أحدهم:

بس يا جيتام .. تعالى معايا نقعد في الكافيتريا نشرب حاجة .

جيتام ينزل يد زميله بعنف قائلاً:

كافيتريا؟ ليه؟ متقدم لك مين إنت كمان وعايز توريه إنك جامد وكل الشباب بيجروا وراك وبيعزموك .. وكيل نيابة واللاظابط شرطة واللابن رجل أعمال ناصب على نص بنوك مصر؟

زميل جيتام ينظر حوله بإحراج بينما يضحك الطلبة وترتسم على وجوه بعضهم ابتسامة ساخرة ، بينما يتابع جيتام وقد فلتت أعصابه أكثر:
أي واحدة يا جماعة عايزة تغيظ حبيبها بيا أنا في الخدمة .

ينظر لإحدى الواقيات ويقول لها:

ممكن أنا وإنتي نروح نقعد في الكافيتريا وتخلي صاحبتك الأنتيم تفتن عليك لصاحبك .. خليها تجيبه يطب علينا عشان يشوفنا ويتعاط ويهتم بيكي .. ومش بعيد يخطبك .

جيتام يترك الفتاة التي حدثها وينظر لشاب آخر قد أطال شعره وارتدى ملابس مستفزة ويقول له ساخراً:

وانت كمان .. لو صاحبك سابك وراح لقطة غيرك ومش عارف تجيبه على ملى وشه إزاي ، ممكن نظبط قدامه لغاية ما يعرف قيمتك .. (يتحسس شعر الفتى ويتابع) هو يعني هيلاقى زيك فين .. حمار وحلاوة زي ما بيقول الكتاب .

ثم يقوم الشخص الذي يصور مقطع الفيديو بتسليط الكاميرا على وجه
(شريف) الذي يضحك للكاميرا بسخرية!

نعود لغرفة (جيتام) التي يشاهد فيها مقطع الفيديو، بينما تقفز يد
(شريف) على مسطرة المسافات بالكمبيوتر ليوقف ملف الفيديو قائلاً
في إحراج وتوتر:

كفاية يا جيتام .

(جيتام) ينظر له غاضباً ويتابع ساخرًا:

جيتام:

لا ياراجل؟ .. كفاية بعد ما خلص؟

شريف يضحك رغمًا عنه ويقول بمزيج من الحرج والسخرية:

أصله بصراحة فكري بالذي مضى .

جيتام:

مين تاني صورّ الموقف ده بالموبايل وقتها؟

شريف:

معرفش .. بس أنا متهيأ لي محدش صور غير عمر .. وأنا
بعد ما خدته منه بالبلوتوث مسحه قدام عيني .

جيتام:

إنت لسه محتفظ بيه على اللاب توب؟

شريف:

مش أنا لما وريت هولك قبل كده وجيت أمسحه قولت لي سيبه
 ما تمسحوش وأصريت على كلامك . . إيه اللي جدّ يا جيتام؟
 جيتام يمسك ماوس الكمبيوتر ويظهر صفحة جروب على الفيس بوك
 عنوانها (احترسوا من نصاب الغرام) وبجوار اسم الجروب صورة
 ساخرة كاريكاتورية لجيتام وهو يحني ظهره وإحدى الفتيات تضربه
 على قفاه الذي تورم بشدة ثم يقول جيتام وهو يشير للشاشة:
 اللي جد إن حد عمل ضدي جروب ع الفيس قال فيه
 إني فاشل ونصاب وحمار وحط مقطع الفيديو ده عشان
 يشرّد لي .

جيتام ينظر لوصف الجروب قائلاً وهو يشير للشاشة:

شوف كاتبين عليا إيه؟!

شريف ينحني نحو الشاشة ويقرأ المكتوب بصوت مسموع:

حاسب لا تلبس في الغرام على إيد غشيم غاوي منظره . .
 كل البنات ضحكت عليه وطلع له ديل من ورا . . عامل فتك
 أوي يا سلام وهو أكبر مسخرة .

شريف (يضحك مندهشاً ويتابع):

جامد أوي البوق ده . . مين ابن اللعية اللي كتبه؟

جيتام ينهض بعنف ويقول بغضب شديد:

ابن لعيبة؟ قول بنت كلب . . إنت مالك فرحان أوي

ومستسهل الموضوع كده ليه؟ أنا بجروب زي ده ممكن أفقد مصداقيني وسُمعتي .

شريف:

وإنت ليه مديه أهمية؟ ما كل الميمبرز في الجروب بتاعك عارفين إنك اتبهذلت في الحب لغاية ما خدت الخبرة دي كلها .

جيتام:

بس مش عارفين أدق التفاصيل .

شريف يفك رابطة عنقه ويتجه نحو غرفة نومه ويدخلها قائلاً **منها دون أن نراه:**

ياعم سيبك . . بقى هتقارن جروب مشترك فيه 15 عضو بجروب فيه 150 ألف؟ . . تلاقيها واحدة معجبة عايزة تستفزك عشان تحس بيها .

جيتام يجلس مرة أخرى على الكمبيوتر مواصلاً فحص الجروب المعمول ضده ، فيجد لينك فيديو مرتبطاً بموقع الـ «Youtube» الشهير ، فيضغط عليه ليعمل الفيديو ونكتشف أنه مقطع مسجل من برنامج «أستروجين» ، حيث تظهر في الفيديو (مرورة) مقدمة البرنامج وهي تتلقى اتصالاً تليفونياً من أحد جماهير البرنامج .

مرورة:

ومعانا اتصال تليفوني من جيرمين . . اتفضلي

ص . جيرمين:

هاي مروة إزيك . . هو ليه البنات بتحب الولد الجامد اللي
مقطع السمكة وديلها زي ما بيقولوا . . أنا شخصياً مش
عارفة ليه . . لكن زي زي أي بنت الولد اللي بحبه فطيع
وكل البنات بتموت فيه واسمه جيتام الديب ، ومش عارفة
أعمل ايه عشان يحس بيا . . أنا واثقة إنه مش هيحس بالسعادة
ولا الحب غير معايا عشان لو لف الدنيا كلها مش هيلاقى حد
يحبه قدي . . قولي لي أعمل ايه؟

مروة (وهي تضحك بشقاوة):

ولو إنك ماكانتش ينفع تقولي اسمه كده ع الهوا بس ما
علينا . . مش كل البنات على فكرة بتحب الولد اللي مقطع
السمكة وديلها ولو أني ما انكرش إن معظمهم كده . . مشكلتك
سهلة جداً يا جيرمين . . لو كان هو من جواه حاسس بيكي . .
كل المطلوب منك إنك تستفزيه جداً وتختفي شوية بعيد
عنه . . ساعتها هينسى كل البنات اللي حواليه ومش هيشوف
غيرك وبيبدأ يفكر إنتي ليه عملتي كده . . ودي هتكون أول
خطوة تقربكوا لبعض وبعدها . .

جيتام يضغط على زر مسطرة المسافات ليوقف استمرار عرض
المقطع ، ثم يهب واقفاً في مكانه ممسكاً بشاشة الكمبيوتر وهو يصيح
بغضب هادر:

يا بنت اللذينة . . يا بنت اللذينة!

شريف يدخل عليه مسرعاً ، وقد ارتدى فائلة حمالات وفردة واحدة فقط من فردتي بنطلون الترينج بينما نرى رجه الأخرى خارج البنطلون ونراه يحجل بسرعة وهو يقترب من جيتام في قلق صائحا فيه

شريف:

في إيه يا جيتام؟

جيتام:

كله من المذبة الهيلة بتاعت برنامج أسبرين . .

شريف (بقلق وتوتر):

قصدك مروة اللي بتقدم برنامج أستروجين؟

جيتام:

ما يهمش اسمه . . أهو برنامج نافه وخلاص بيقول كلام كله هبل في هبل . . تسمح تقول لي يعني إيه أستروجين؟

شريف:

يعني هرمونات الأنوثة .

جيتام:

أنوثة؟ ودي إيه علاقتها بالأنوثة أصلاً . . دي ذكر يا عم .
شريف يترك البنطلون الذي يرتدي إحدى فردتيه فيسقط البنطلون أرضاً ويقول وهو يجذب جيتام نحو كنبه الريسبشن .

شريف:

طب تعالى نقعد بس ونتفاهم براحة .

يجلس جيتام بينما يرفع شريف البنطلون ويلبسه متسائلاً بتوتر:

شريف:

إيه اللي حصل؟

جيتام:

المذيعة الهبلة بتاعت البرنامج إدت نصيحة غلط لبنت معجبة
بيا فالبت سمعت كلامها وعملت ضدي جروب عشان
تستفزني .. وحياة أمي لأربي البنت والمذيعة مع بعض ..
هو البرنامج ده ببيجي دلوقت مش كده؟

شريف (بقلق):

مش فاكر .. يا عم خلاص بقى كبر مخك .

جيتام:

أبدأ .. والله لعرفهم هما الاتنين أنا أبقى مين .. إستنى أما
أفتح وأشوف .. تبقى أمها داعية عليها لو لقيتها .

جيتام يمسك الريموت كمنترول ويصوبه نحو التلفاز في غضب فتظهر
مروة على شاشته، حيث تطل بملامح متجهمة، وتقول بلهجة حزينة
وهي تقرأ من الـ Auto Q

مروة:

وبعد ما البننت تسلم له شخصيتها عشان يغير فيها ويبرمجها



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

زي ما هو عايز . . بتتحول مع الوقت لواحدة تانية هي مش عارفاها . . ما بتعرفشي تتكلم غير بطريقته . . ما بتعرفش تختار غير بدماغه . . ولو اكتشفت إنه بيخونها بتضطر تسامحه . . لأنها بتبقى حاسة إنها من غيره ولا حاجة . . المصيبة الأكبر إنه ممكن يغدر بيها ويسيبها بعد كل ده ويروح يعيش حياته مع واحدة تانية ليها شخصيتها المستقلة ودماغها اللي بتشاركه في القرار والتخطيط . . والغريبة إنه بيبقى مرحب جداً بده مع البنت التانية اللي اختارها . . من غير ما يفكر لحظة واحدة ف صاحبتنا القديمة اللي وهبته كل ما تملك عشان ترضيه . . ويوم ما يفكرها ما بيحسش بالندم إنه سابها ، لأنه بيبقى شايف إنها عديمة الشخصية والتفكير ، مع إنه هو اللي خلاها كده! (الدموع تلمع في عين مروة وتتابع)

وتحاول صاحبتنا الضحية إنها ترجع زي ما كانت قبل ما تعرفه فتكتشف إنها نسيت شخصيتها القديمة . . وتعيش باقي عمرها مسخ .

وتضيع البنت المسكينة وكل اللي حوالها يلوموها عشان هي اللي عملت كده ف نفسها . . ده غير ناس تانية ما عندهاش ضمير ولا رحمة ممكن يمثلوا عليها إنهم متعاطفين معاها وهما طمعانيين فيها باعتبارها صيدة سهلة وحاجة ببلاش كده . . (تختفي لمعة الدموع وتستعيد جأشها وهي تشير بسبابتها بصرامة نحو المشاهدين) عشان كده وانتي بتدي لحبيبيك قلبك ومشاعرك اوعي تفكري إنك تسلميه عقلك فوق

البيعة . . خلي دايمًا دماغك ملكية خاصة هو مالوش نصيب فيها . . حتى لو انتوا الاتنين بقيتوا واحد .

جمهور الاستديو يصفق ، بينما تتوقف مروة عن الكلام ويبدو عليها التركيز وهي تضع يدها على الأيربيز وكأنها تستمع لما يقوله لها المخرج عبر السماعة المدفونة في أذنها ، ثم تبتسم وهي تقول مداعبة

مروة:

حتى وائل مخرج البرنامج بيثجيني أهو ومؤيد كلامي مع إنه راجل . . مش إنت راجل برضه يا وائل واللا غيرت رأيك لما اشتغلت معايا!؟

مروة تضحك وكأنها تلقت ردًا كوميدياً منه ، ثم تضع يدها على سماعة الأيربيز المدفوسة في أذنها ويبدو عليها التركيز لوهلة قبل أن تقول:

مروة:

ومعانا تليفون من . . (بدهشة) somebody . . هو قال إن اسمه كده . . افضل يا somebody

ص . جيتام:

إنتي بقى شايقة إن الولد اللي مقطع السمكة وديلهما أسلم طريقة عشان نلقت نظره إننا نستفزه مش كده؟

مروة (وقد بدأت تشعر بالتحدي):

مش أنا اللي شايقة . . سيكولوجية الولد وطبيعته الشخصية هي اللي بتخليه كده .

ص . جيتام (يضحك ساخرًا):

ويا ترى بقى حضرتك دارسة ايه عن الولاد عشان تفتي
بالشكل ده؟

مروة (بتحد غاضب):

والله أنا مش مخصصة وقت الحلقة الثمين عشان أتكلم عن
نفسي .. لكن حضرتك لو بتعرف تدخل ع النت تقدر تدخل
على جوجل وتكتب اسمي وانت تعرف عني كل حاجة .

ص . جيتام:

من غير ما أعمل سيرش أحب أقول لك إنك قارية كتب عفي
عليها الزمن .. أحسن لك تبليها وتشربي ميتها .

مروة (ساخرة):

ميرسي كثير لذوقك .. وأنا يشرفني أتعلم من حضرتك
الدراسات والكتب الحديثة اللي ما تتبلش وتتشرب ميتها .

ص . جيتام (بتقة):

هو كتاب واحد بكل الكتب .. اسمه مدرسة الحياة .

مروة (ساخرة):

ده كتاب رائع .. كل الناس اللي قاعدين بيفتوا ع القهاوي
قروه وبيتكلموا منه .

ص . جيتام (بتحد):

أنا براهنك ع الهوا إنك غلط .. وإن بتوع القهاوي اللي مش
عاجبينك بيفهموا عنك ومستعد انفذ من دلوقت .

مرورة (تضحك بسخرية أكثر):

ههههههههه . . هو فيه أكثر من كده تنفيذ . . ده إنت أفحمتني
يا راجل . . أرجوك ماتقفلش وسيب السادة المشاهدين
يتابعوا بنفسهم نموذج عملي وواقعي بيلخص كل أنواع
الرجالة اللي اتكلمت عنهم في الحلقات اللي فاتت .

جمهور البرنامج يضحك بشدة ويصفق ، بينما يحمر وجه جيتام ويقارب
على الانفجار من شدة الغضب ، وهو ينظر لشاشة التلفاز ، فيما يتابع
شريف الموقف بحيرة وقلق ، قبل أن يأخذ جيتام نفساً عميقاً ثم يقول

جيتام:

أنا بتحداكي إن الحب مش كيميا وبس زي ما بتقولي . . وإن
الخطط هي الأساس . . وأكبر دليل على كده إنني براهنك إنني
هخليكي تحبيني . . وبعدها . . هسيبك ومش هرتبط بيكي .

مرورة (ساخرة):

لحظة يا مستر Somebody . . إزاي إنت بتراهني وإنت حتى
مش قادر تقول اسمك الحقيقي وتعرفنا بنفسك . . مش شايف
إن انت اللي مش قد كلامك مش أنا؟

جيتام:

هعرفك بنفسي ع الهوا وقدام كل المشاهدين بعد 4 شهور من
دلوقت وانتي بتخسري الرهان . . وساعتها هيكون أكرم لك
تقدمي استقالتك .

مرورة (بتحدِ ساخر):

وأنا موافقة.. بس لو إنت اللي خسرت هتقدم إيه؟ طلب
وظيفة؟

جمهور البرنامج يضحك ، بينما يجب جيتام بثقة:

لا وإنتي الصادقة.. ساعتها هاجي بنفسي هنا في البرنامج
وهعلن خسارتي على الملاء.. وهرضى بأي حكم تحكميه عليا.

مرورة:

OK يا مستر Somebody.. بس يا ريت لما تخسر ما تجيش
بنفسك وكفاية عليا أوي مكالمة من حضرتك.. عارف ليه؟

ص. جيتام:

ليه؟

مرورة:

عشان استديو البرنامج للسيدات فقط يا فندم .
الجمهور يضحك بشدة ويصفق ، بينما ينهي جيتام المكالمة ،
ثم يمسك الريموت ويغلق التلفاز في غضب قائلاً في حدة

جيتام:

وديني.. لأخلي عم فكري أعقل منك .

ونلاحظ أن شريف ينظر له في ضيق



مكتب جيتام في الكافيه

جيتام يجلس في مكتبه يشاهد حلقات برنامج «أستروجين» ،
عبر شاشة تلفاز ضخمة تحتل جدران الحائط .

مرورة:

وبعد ما خلصنا موضوعنا تعالوا نستقبل تليفوناتكم ومعانا
تليفون من أبرار . . انفضلي .

ص . أبرار:

مروة الحقيني

مرورة:

خير يا أبرار في إيه؟

ص . أبرار:

تخيلي إنه بعد سنتين كان بيطاردني فيهم ف كل حنة
بروحها . . لدرجة إنه كان ناقص يطلع لي م الشنطة . . وفي
الآخر ارتبطت بيه!؟

مروة (ضاحكة):

يا شيخة خضتيني . . طريقة كلامك حسستني إنه بعد سنتين
هو اللي رجع ف كلامه .

ص . أبرار:

لا أنا اللي بفكر أرجع .

مرورة (بصدمة)

ليه ؟

ص. أبران:

اكتشفت إن حبيبي عمل حيلة مع واحد عامل نفسه خبير عاطفي عشان يخيليني أقع ف حبه . . وبعد ما عرفت الحقيقة بدأت أسأل نفسي . . يا ترى أنا وافقت ارتبط بيه عشان حبيته بجد . . واللّا عشان هو ضحك عليا وأوهمني أنني بحبه . . لما فكرت بعقلي خدت بالي لأول مرة من كل ديفوهاتة واكتشفت إنني ماكانش ينفع أحبه . . بس لما حاولت أبعد عنه لقيتني لسه محتاجاه ومش قادرة أبعد عنه . . دليني يا مرورة . . أنا بحبه واللّا ما بحبوش ؟

جمهور الاستديو يضحك ، بينما ترسم ابتسامة ساخرة على وجه مرورة ، قبل أن تقول بتحد:

شوفي يا بيرو . . زي ما قلت قبل كده وهفضل أقول . . الحب مفيش فيه حيل وخطط . . وما دام إنتي مش قادرة تبعدي عن حبيبك يبقى إنتي كنتي بتحبيه وفيه بينكم كيميا من الأول . . جايز يكون استعان بحد نصاب أوهمه إنه هو اللي ليه الفضل ف نجاح حبكم لكن ده يحسب له لأنه اجتهد عشان يوصل لك . . او عي تبعدي عنه .

جيتام يلتقط الريموت كمنترول ويصوبه نحو التلفاز ليغلقه قبل أن يلتفت بمقعده نحو جهاز الكمبيوتر الذي يظهر عليه جروب جيتام على موقع الفيس بوك ويكتب على حائط الجروب قائلاً:

مذيعة برنامج أستروجين بتقول الحب مش بييجي بالتخطيط
وبتتهمني إني نصاب . . ينفع؟
جيتام ينظر للشاشة بضع ثوانٍ قبل أن تنهال الردود التالية على الحائط:

Noooooo..she's stupid

ولا يهملك يا جو تلاقىها خطت لقصة حب وفشلت .

أنا لو منك أعلقها وبعدين أقول لها أنا كنت بخط كده وكده
ههههههههه .

جيتام يضحك ويقهقه مع التعليق الأخير ، قبل أن يسمع صوت طرقات
رقيقة على الباب ، فيقوم بتنزيل الشاشة Minimize لتظهر خلفية
ال Desktop عبارة عن صورة لجيتام مبتسماً بثقة في منتصف قلب كبير
أحمر وحوله عدد من القلوب الحمراء وقد كتب أعلى الشاشة:

- How to get your girl's heart in a few minutes BY ME.

فتعاد الخطبات على الباب بينما يعدل جيتام ياقة قميصه قائلاً بابتسامة
ساخرة:

جيتام:

اخرج .

فيفتح الباب رجل رقيق الملامح بشكل يعطيك الانطباع بأنه شاذ ، وقد
ارتدى قميصاً مليئاً بالقلوب وينظرون جينز ضيق وهو طقم لا يتناسب
مع سنوات عمره التي تتم على أنه في الأربعينيات ، وفي يده كيس بلاستيك
صغير (به ساندوتشات) ، ويقول بابتسامة خجول وصوت رقيق .

الرجل:

هو حضرتك قولت ادخل والا اخرج؟

جيتام ينظر للرجل بتوجس قائلاً بريبة وقلق:

اخرج

الرجل يقترب من المكتب بخطوات أنثوية وكأنه يحاول إغراء جيتام
قائلاً في دلال:

يعني أمشي؟

جيتام:

إحم.. لا ده أنا كنت بقول للشيطان.. أصله كان عايز
يكون تالتنا.

الرجل يضحك ضحكة مستفزة تدل أنه ليس على ما يرام قبل أن
يجلس على المقعد المقابل لمكتب جيتام، بينما يأتي حسين كبير
الجرسونات ليغلق الباب فيصيح فيه **جيتام:**

محدث يقلل الباب.. وابقى تعالى كل شوية شقر عليا يا حسين
عشان الشيطان شاطر.

الرجل يخرج سيجاراً ويضعه في فمه قبل أن يقترب من **جيتام قائلاً**
في دلال:

تسمح تولع لي؟

جيتام (مصدوماً):

تاني إنت؟ ده أنا ما صدقت وزعت الشيطان.

الرجل يصف شعره بيديه وهو يقول بتهيدة حارة:

ما دخل خلاص .

جيتام ينهض مفزوعاً وهو يلتصق في الحائط الخلفي له مبتعداً عن

الرجل وهو يقول بفزع:

هو إيه ده؟

الرجل (بتهيدة):

الشیطان

جيتام (بعصبية):

إنت مين يا جدع إنت ، وعايز إيه؟

الراجل:

أنا رسمي

جيتام:

ما هو باين

رسمي:

باين إن اسمي رسمي؟

جيتام:

لأ باين إنك اسم على مسمى . . أو مرني .

الرجل (يضع كيس الساندوتشات على المكتب):

أنا بحب حب من طرف واحد ونفسي الطرف الثاني يحس ،

بس الشيطان دخل بينا . . عشان كده ماقداميش غيرك . .
اتفصل كل وانت بتسمعي

جيتام (يلتقط الكيس بريبة):

إيه ده؟

رسمي (غامزًا):

كبة إسكدراني

جيتام (يأخذ نفسًا عميقًا بسعادة ثم يهب واقفًا وهو يصيح بلهفة مقلدًا
طريقة تهامي في إعلانات ميلودي):

أخيرًا فهمتني يا رسمي . . أيوه كده قلقتني عليك يا راجل . . مش
تقول م الأول إنك طبيعي كده وبتحب زينا وعايز تظبط . .
(ينظر للساندوتشات داخل الكيس ويتابع) . . هي المشكلة إن
الساندوتشات باين من ريحتها إنها نضيفة شوية وأنا ماكلش
غير الكبة المعفنة . . بس ما يهمش . . أنا تحت أمرك .

رسمي:

مش عارف أخطط له إزاي عشان يقع .

جيتام (يأكل ويقول بحماس):

أنا أوقعهولك .

رسمي:

مش عارف أحسسه .



جيتام (يواصل الأكل ويتابع بحماس أكبر):

أنا أحسسهولك .

رسمي:

عم عبده البواب .

جيتام (يلقي الساندوتش ويصفع الرجل على قفاه بيده اليمنى):

أنا ماليش في الخشن .

رسمي (مفزوعًا بعد أن تلقى الصفعة):

ليه بس كده؟ ده أنا كنت جايب لك أتو .

جيتام (بدهشة):

يطلع إيه الأتو ده؟

الرجل (باستغلاب):

حاجة حلوة للي بياخدوه .

جيتام (يلقي في وجهه كيس الساندوتشات ويتابع بنفاد صبر):

خليهولك هو وساندوتشات الكبدة بتاعتك . . أنا من أول ما

لاقيتها نضيفة وانا حاسس إن فيه حاجة مش طبيعية . . حاكم

الراجل بيبان من كبדתه . . (ينادي على مدير المحل)

حسين . . يا حسبييين .

حسين يدخل المكتب بتحفز وتوتر صائحًا:

أؤمر يا فندم .

جيتام:

خد الكلب عدو الله ده وارميه برة هو وساندوتشاته النضيفة
اللي تقرف .. (ينظر للرجل ويتابع في احتقار ساخر) يا
عجلة يا بتاع الأتو .

حسين يهم أن يحمل الرجل بقوة فيزيحه رسمي وهو يردد بصرامة:
إوعى حد يقرب .. أي حركة هصوت وأشق هدومي واقول
اغتصبتوني .. مش كل الطير اللي يتاكل لحمه يا حبيبي إنت وهو .

حسين (بغضب):

تصدق أنا هـ . . .

جيتام (مقاطعاً):

ما هو ده اللي نفسه فيه يا حسين .. أوعى تكملها لا يشبث
فيك أكثر .. سييه يغور ف داهية بدل ما يتحسب
علينا راجل .

رسمي ينصرف وهو يردد في غضب كوميدي

رسمي:

قال وأنا اللي فاكر كوا Open mind .. حسبنا الله ونعم الوكيل
فيكوا .. عالم ما عندهاش قلب .

حسين ينصرف بعده وهو يغلق الباب خلفه فينظر جيتام للباب في ذهول
ثم يغلق صفحة الفيس بوك المفتوحة على جهازه قائلاً:

توب علينا يا رب من الفيس بوك وبلاويه واللي بيجرى فيه . .
قال أتو قال .

جيتام ينظر ليدته اليمنى التي ضربت الرجل في قرف واشمئزاز منادياً
في حسين:

هات لي ديتول وقطن يا حسين لحسن إيدي هتبدأ تاكلني .

الباب يطرق فيقول جيتام:

تعالى يا حسين .

الباب يفتح وتطل فتاة رقيقة رائعة الجمال . . إنها جيرمين .

جيتام ينظر لها بانبهار ويقف مشدوفاً وهو يردد:

يا ريته بييجي تاني . . أنا إيه بس اللي خلاني أوزعه؟!!

جيرمين تعقد حاجبيها الجميلين في تساؤل وهي تقترب من مكتب جيتام
قائلة برقة وأنوثة:

هو مين ده اللي وزعته؟

جيتام (مبتسماً):

الشیطان

جيرمين تبتسم في رقة قبل أن تمد يدها للمصافحة في مودة قائلة:

أنا جيرمين .

جيتام يمد يده اليمنى ثم ينتبه أنها مطرح الرجل ، فيمد يده

اليسرى لتمسك بيده اليمنى وكأنه ينفذ جيرمين من يده اليمنى

قبل أن يمد يده اليسرى لمصافحتها قائلاً:

وأنا جيتام .

جيرمين تسلّم على جيتام قائلةً بابتسامةٍ ممتزجةٍ بالدهشة:
أه طبعاً غني عن التعريف.. (ثم تنظر ليده اليسرى التي
تسلم عليها بتساؤل) إنت أشول؟

جيتام (مبتسماً في حرج):

لا ده مؤقتاً بس عقبال ما أتخلص من أثر الأتو.

جيرمين:

نعم؟

جيتام:

لا ما تاخدش ف بالك.. القطن والديتول زمانهم جايين
وهبقى كويس.. أو مريني.

جيرمين تجلس على المقعد المقابل لمكتب جيتام ثم تسأله

جيرمين (مبتسمة):

إنت شايفني؟

جيتام (ساخراً):

هزعل أوي لو طلعتي عفريته بعد كل ده.

جيرمين تضحك بركة قبل أن تأخذ نفساً عميقاً ثم تميل نحو جيتام
وتتطلع في عينيه بخجل:

مش قصدي.. أنا أقصد يعني إنت شايف إني أنتى وأستحق
الرحمة لو غلطت، مش كده؟



جيتام:

أكيد

جيرمين:

توعدني لو دخلت في الموضوع على طول واعترفت
اعتراف خطير انك هتسامحني؟

جيتام يغوص أكثر في مقعده وهو يتطلع لها في تركيز
واهتمام **قائلاً:**

أوعدك .

جيرمين (بخجل):

أنا من زباين الكافيه من زمان ، وكنت معجبة ببيك جداً ، وكان
نفسي ألفت نظرك ليا . . بصراحة كلام مروة أفنعني وقولت
أجرب استفزك . . عشان كده عملت ضدك جروب وحطيت
فيه فيديو قديم ليك . . واعفيني مش هقدر أقول جبت الفيديو
بتاعك منين . . بس بعد ما عملت كده استصغرت نفسي
أوي . . والأهم إنني اكتشفت إنني مش بحبك . . وخلاص
هتخطب قريب . . وعشان ربنا يوفقني ف حياتي اللي جاية
كان لازم آجي اعترف لك واطلب منك إنك تسامحني .

جيتام (بغضب):

نفسي أعمل فيكي دلوقت حاجات كتير . . لكن أنا وعدتك . . بس
أحب أقولك إنني كنت هجيبك ومكنتش هرحمك . . إنتي محظوظة
عشان لحقتي نفسك . . لكن فيه ناس غيرك هتدفع التمن .

حسين يدخل ومعه القطن والديتول .

حسين:

القطن والديتول يا مستر جيتام .

جيتام ينهض لياًخذهم من حسين الذي يعطيهم له ثم ينصرف ، بينما
يميل جيتام على أذن جيرمين من خلفها ويتابع في برود:

جم ف وقتهم يا حسين . . عشان عايزين ننصّف

جيرمين تنهض بإحراج متجهة نحو الباب قبل أن تستدير نحو جيتام
مجدداً وفي عينيها الحزن .

جيرمين:

أنا آسفة .

ثم تغادر المكان



مكتب رئيس القناة

باب مكتب رئيس القناة ينفتح وتدلف منه مروة قائلة بتحفز:

حضرتك طلبتني يا أستاذ سمير؟

سمير مدير القناة ينظر لها نظرة طويلة وكأنه يفحصها قبل أن يشير
إليها بالجلوس قائلاً بنبرة غامضة:

اقعدي يا مروة .

مروة تجلس على المقعد المقابل لمكتبه وقد شعرت بأن هناك أمرًا ما
بينما يقول رئيس القناة بلهجة غامضة وقد ارتسمت ابتسامة بسيطة
على وجهه:

عاملة إيه؟

مروة:

تمام الحمد لله.

سمير:

وماما عاملة إيه؟

مروة:

بخير.

سمير:

بتتابع البرنامج بتاعك؟

مروة:

أكيد.

سمير:

وإيه رأيها؟

مروة (ضاحكة):

بتقول لي إنتي هتعنسي كل اللي ببشوفوكي ، والمتجوزين
هيتطلقوا على إديكي .

سمير يأخذ سيجارة من علبة السجائر الموجودة أمامه على المكتب ويشعلها ثم يأخذ نفساً عميقاً ويخرجه في هدوء وتلذذ قبل أن يقول وهو ينظر إلى السقف:

وإنتي رديك إيه؟

مروة (بتحدّ):

بقول لها أحسن ما يعيشوا جوارى .

سمير يعتدل في جلسته وينظر لعينها مباشرة وهو يباغتها بسؤال:

مين تاني بينتقدك غير مامتك؟

مروة تسرح محاولة أن تفكر وتحصي الذين ينتقدونها قبل أن تنظر له بحيرة وهي تهز كتفيها قائلة:

يعني . . بعض الجمهور اللي بيشفوني في الشارع والنادي . . بس نقدهم ما بيفرقش معايا عشان معظمهم بنات متدلعين وسوري يعني ليهم في المُحن . . حاكم في بنات من كتر المحن بتحس إنها بتصحى الصبح تقول Good morning بدل Good morning.

سمير:

وصاحباتك الأنتيم؟

مروة:

ماليش صاحبة أنتيم بعينها .



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

سمير (ياخذ نفساً آخر):

Why?

مروة (ضاحكة):

كلهم متجوزين .

سمير:

عندك فكرة عدد اللي انتقدوكي كام واحد؟

مروة (بتحدّ):

لو فكرت أعدهم يبقى هسيب شغلي الأساسي وأفضى لهم ..
أنا بتعامل مع الجمهور بمبدأ الميه والصخرة .. أول
نقطة بتطرطش ع الفاضي من غير ما تأثر .. لكن مع الوقت
الصخرة بتتفتت .

سمير (وهو يميل نحوها قائلاً بمكر):

ولو حد قفل المحبس مفيش ميا هتنزل على الصخر .

مروة (بتوتر):

ويا ترى مين اللي عايز يقفل المحبس؟

سمير يلتقط ملفاً موجوداً أمامه على المكتب ويسلمه لمروة قائلاً بهدوء:
عدد مش قليل من الجمهور

مروة تتسلم الملف وتطالعه في حين يتابع رئيس القناة:

لما يجيلنا في يوم واحد وبشكل مفاجئ أكثر من 10 آلاف

إيميل بيستم في البرنامج وبيطالب القناة إنها توقف عرضه
يبقى أكيد في حاجة مش طبيعية!

مروة ترفع رأسها وتنظر لرئيس القناة بصدمة في حين يخرج رئيس
القناة من درج مكتبه سي دي يسلمه لها قائلاً:

ده السي دي بتاع الحلقة الأخيرة اللي عملت أزمة . .
إنفرجي عليه كويس وخدي معاكي الإيميلات اللي وصلتنا
واقريها كلمة كلمة وخشي بالمرّة على الفيس بوك وشوفي
ال Groups اللي اتعملت ضدك .

مروة (بدهشة):

هما كمان عملوا ضدي Groups ع الفيس بوك؟

سمير (مبتسمًا بدهاء):

ما تستهونيش بالموضوع . . واضح إنك عملتي بلوة من غير
ما تقصدي . . ادرسي الموضوع ومستني ردك .

مروة تهز رأسها بحزن ممتزج بالغضب وتنصرف ، وما إن تفتح باب
المكتب حتى يستوقفها سмир:

مروة .

مروة (ملتفتة نحوه بحزن):

أيوه يا فندم .

سمير (ساخرًا):

إبقي شوفي مامتك مشتركة في ال Groups اللي ضدك دي
ولا لأ .

مروة (بسخرية مماثلة):

ده لو ماكانتش هي اللي عاملاها أصلاً!!



منزل مروة - في حجرة نومها

مروة تجلس على مكتبها وقد ارتدت تريننج سوت شيك ، ونظارة طبية ، وقد تركت شعرها المغسول بطريقة الكيرلي وأمامها اللاب توب الذي يشغل تسجيل الحلقة الماضية ، بينما انهمكت في فحص الملف الموجود فيه الإيميلات التي وصلت للقناة ضدها ، وقد تركت الحلقة كخلفية تستمع لها وهي تفحص الإيميلات حيث نسمع المقطع التالي .

ص . مروة:

شوفي يا بيرو . . زي ما قلت قبل كده وهفضل أقول الحب مفيش فيه حيل وخطط . . ومادام إنتي مش قادرة تبعدي عن حبييك يبقى إنتي كنتي بتحبيه وفيه بينكم كيميا من الأول . . جايز يكون استعان بحد نصاب أوهمه إنه هو اللي ليه الفضل في نجاح حبكم لكن ده يحسب له لأنه اجتهد عشان يوصل لك . .

ما إن تصل مروة للجملة الأخيرة حتى تجذب الجملة انتباهها فتتوقف عن مطالعة الإيميلات وتمسك بالماوس وهي تلتفت للكمبيوتر لتعيد سماع الجملة الأخيرة مرة أخرى:

ص . مروة:

«بحد نصاب أو همه إنه هو اللي ليه الفضل في نجاح حبكم»
وما إن تسمعها مرة ثانية حتى تضغط زر إيقاف الحلقة وقد انعقد
حاجباها وهي تنظر للشاشة في شرود لتغرق في التفكير . .
باب غرفتها يفتح مرة واحدة لتطل الأم بنظرة حنون تجمع بين الحب
والمرح وهي تقول بطيبة شديدة .

مدام منى:

أخيرًا عرفنا السهر والسرحان . . الموز الجديد عامل معاكي
شغل مش كده؟
مروة تقفل مفصل اللاب توب ، وتغلق الملف وهي تلتفت لأمها وتقول
بابتسامه ساخرة:

دايمًا كاشفاني يا ماما . . نفسي مرة واحدة أعرف أخبي عليكى .
الأم تقترب من مكتب مروة وتجذب الكرسي المقابل له وتعد وهي
تقول بمرح:

تخبي عليا ده إيه . . يا بت ده أنا كنت داخلة أعمل بي بي كده
فجبنتك بالمره . . يعني مهما كبرتى واشتهرتى هتفضلى
ف نظرى حنة بي بي لا راحت ولا جت .

مروة تضحك بشدة قبل أن تقول بمرح:

الله عليكى وعلى تشبيهاك اللي تفتح النفس . . إنتى متأكدة
يا ماما إنك خدتى جايزة الأم المثالية زي ما حكيتى لى؟

منى (بفخر):

4 مرات .

مروة (ساخرة):

طب شوفتي البي بي نفحك إزاي؟

منى (تربت على بطنها بتفاخر وتتابع بمرح):

الرك ع البطن اللي جابته .

مروة:

طب يا ريت نشد السيْفون ع السيرة دي بقى عشان عندي
شغل ضروري للقناة لازم يخلص الليلة .

منى تنهض قائلة:

إذا كان ع الشغل فأنا مش هعطلك . . أخوكي حسام عايزني
أحضر له العشا وأنا لسه ما صلتش العشاء . . بس اعلمي حسابك
مش هنتامي غير لما تيجي تحكي لي . . قشطة؟

مروة (ضاحكة):

قشطة .

الأم تتجه لمغادرة الحجرة ثم تغلق الباب خلفها فتطلق مروة زفرة
قوية، قبل أن تمسك الموبايل لتتصل بمدير القناة، وما إن يأتيها صوته
حتى تقول:

مساء الخير يا أستاذ سمير . . أرجو إنني أكون اتصلت
ف وقت مناسب .

سمير (ببرود):

أنا متاح في الـ 24 ساعة يا مروة .. خير؟

مروة:

أنا اتفرجت ع الحلقة تاني وتابعت الإيميلات والـ Groups
اللي اتعملت ع الفيس بوك وعرفت السبب .

سمير (بنفس البرود):

إيه بقى؟

مروة:

مفيش .. مجرد واحد نصاب غاوي شهرة عامل نفسه رسول
الحب والغرام وضاحك على 150 ألف عبيط وعبيطه ومفهمهم
إنه رجل المستحيل اللي مفيش قصة غرامية تستعصي عليه ..
وأنا شتمته من غير ما أقصد في رد على مداخلة تليفونية .

سمير:

وبعدين؟

مروة:

ولا قبلين .. هو ضح الموقف في الحلقة الجاية .

سمير:

من بين السطور يا مروة .. ما تتكلميش عنه شخصياً بس
قولي كلام يوضح موقفك بطريقة شيك .

مرورة:

ما هو ده اللي كنت ناوية أعمله بالضبط .

سمير:

OK

مرورة:

OK يا فندم مع الس... .

قبل أن تكمل حروف كلمتها الأخيرة تسمع صوت غلق المكالمة فتعقد حاجبها في ضيق وتغمغم غاضبة:

يا برودك يا أخي... ده انت مقرف .

أمها تفتح الباب فجأة وهي تسألها:

هو مين ده؟

مرورة (بغضب ساخر):

البي بي

قبل أن يرن هاتفها المحمول مجددًا، لتلتقطه وتتأمل رقم المتصل بدهشة ثم تضعه على أذنها وتقول:

آلو



في الشارع - أمام برج جيتام وشريف

شريف يقف بسيارته أمام البرج الذي يسكن فيه مع جيتام ثم يغادرها وتظهر البذلة الفاخرة التي يرتديها متجهًا لمدخل البرج الذي يجلس عنده البواب ، وما إن يشاهد البواب شريف حتى ينهض من المصطبة رافعًا يده بمحاذاة رأسه على طريقة التحية العسكرية قائلاً في تفخيم:

البواب:

حمد الله ع السلامة يا دكتور

شريف يصعد السلالم التي تسبق مدخل البرج وهو يقول بلهجة من اعتاد ذلك:

شريف:

الله يسلمك يا عم محروس خليك قاعد

شريف يدخل البرج ، ويسير في المدخل حتى يصل للأسانسير ثم يضغط زر الاستدعاء وينتظره لثوان معدودة قبل أن ينزل الأسانسير وما إن يفتحه شريف ليدخل حتى يجد عم فكري داخله وقد ارتدى فانلة حمالات وشورت وعلى وجهه ملامح الغضب وهو يقول غاضبًا

فكري:

إيه ده يا بني آدم . . مش تخبط قبل ما تدخل

شريف يمد رأسه داخل الأسانسير ليجد فوطة معلقة فيقول بدهشة:

أخبط إيه واستأذن مين . . إنت بتستحمى في الأسانسير يا عم فكري؟

فكري (غاضبًا):

فيه برضه حد بيستحمى في الأسانسير يا مجنون؟

شريف:

أنا؟

فكري:

أمال أنا؟

شريف (ضاربًا كفاً بكف):

لا، العفو... معلىش خدني على قد عقلي وفهمني بتعمل إيه!

فكري:

دي أمور شخصية مالكش دعوة بيها... إيه العالم
الحشرية دي.

شريف:

خلاص حقك عليا... اتفضل اخرج عشان اطلع.

فكري:

لا أنا مش خارج.

شريف (ساخرًا):

هنا آخر الخط.

فكري (بتعالٍ وكبرياء):

هاخذ لفة كمان.

شريف يضحك غير مصدق نفسه ثم يدلّف للأسانسير قائلاً بلهجة
ساخرة لكنها تبدو جدية:

طب اربط بقى الحزام عشان ما تتأخذش مخالفة.

ثم يجذب شريف باب الأسانسير ويغلقه . .

الأسانسير يصعد بشريف وفكري بينما نجد فكري ينهج وقد تصيب
وجهه بالعرق قبل أن يمسك بالفوطة لينشف بها وجهه وشريف ينظر
له بدهشة ويسأله بلهجة قلقة:

برضه مش عايز تقوللي بتعمل إيه يا عم فكري .

فكري (يلتفت له وهو ينهج):

المشاية الكهربا بتاعتي اللي كنت بعمل عليها تمارين قبل
النوم باظت . . فبطلع وأنزل بالأسانسير عشان أعوض . .
أنا من غير رياضة ممكن أتخن وتجي لي السمنة والبدانة
ويضيع مستقبلي .

شريف (ينفجر ضاحكاً):

وإنت لسه بتدور ع المستقبل يا عم فكري؟ . . كفاية عليك
الماضي يا راجل، ده إنت تاريخ .

فجأة يضغط فكري زر الـ Stop فيتوقف الأسانسير أمام الحائط مطلقاً
رجة عنيفة، فيقول له شريف بقلق وتوتر:

الله الله الله . . ليه كده يا عم فكري؟

فكري (وهو ما زال ينهج وقد أحنى ظهره للأمام):

بريح شوية عشان تعبت م التمرين

شريف ينظر له بدهشة ويحملك فيه .



أمام مقر القناة التي تعمل بها مروة

جيتام يجلس في سيارته يسمع أغنية «alors on danse» وقد أمسك في يديه كاميرا فيديو منتظرًا خروج مروة من القناة ، ما إن تخرج حتى يصوب الكاميرا عليها ضاغطًا على زر الزوم فنرى صورتها في عدسة كاميرته ، وهي تسير في ثقة . . تبتسم في وجه كل من تقابلهم وتسلم عليهم بمرح وخفة ظل ، قبل أن تشير للسائس الذي يأتي إليها مهرولاً مشيرًا لسيارتها التي تبرق في رونق ، ونلاحظ أن سيارتها ذات شكل بناتي جذاب جدًا .

بحركات وإيماءات من السائس نفهم أنه قام بتنظيفها ، فتنظر مروة لسيارتها نظرة رضا قبل أن تخرج من حقيبتها مبلغًا ماليًا تنقده له فيحنى لها باحترام وهي تركب السيارة ، بينما يدعو لها السائق وهي تنطلق بالسيارة . .

جيتام يضع الكاميرا على المقعد المجاور له قبل أن يتحرك بسيارته خلفها ونلاحظ أن سيارته هو الآخر لها استايل يناسب شخصيته .



داخل أحد الكافيهات الشهيرة

نرى مروة تجلس بمفردها في أحد الكافيهات الشهيرة وقد وضعت أمامها اللاب توب الذي تنظر إلى شاشته في اهتمام وهي مرتدية نظارتها الطبية، بينما ترشف رشفة من كوب الإسبريسو الموجود إلى جوارها ما بين الحين والآخر، ثم نرى زوم على الصفحة التي تتصفحها مروة.. إنها الويب سايت الشخصي لها على شبكة الإنترنت، ثم نرى مروة تغلق الصفحة لتتصفح صفحة أخرى باللغة الإنجليزية لأحد مواقع الصحة النفسية..

الصفحة أعجبت مروة فقامت بتسييفها على الجهاز..

مروة تغلق اللاب توب وتنادي الجارسون

مروة:

الشيك لو سمحت.

الصورة تظلم فجأة..

الآن نكتشف أن الصورة السابقة التي كنا نشاهدها، كانت صورة حية تلتقطها كاميرا اللاب توب الذي يجلس عليه جيتام في مقعد مجاور لمروة ليراقبها من خلاله ويلتقط جميع التفاصيل التي تقوم بها..

جيتام بعد أن أغلق الكاميرا واللاب توب، يدفع النقود ويضعها مع الشيك في العلبة التي جاء فيها ثم ينهض وينصرف سابقاً مروة.



أمام عيادة أحد الأطباء البيطريين

مروءة تغادر سيارتها وقد شارفت الشمس على المغيب، ثم تنظر لأعلى نحو البناية التي ركنت سيارتها إلى جوارها..

مع تطلعها لأعلى نشاهد لوحة مكتوباً عليها «عيادة د. طارق الجهيني للطب البيطري»..

مروءة تتجه نحو مدخل البناية وتمر بجوارها سيدة تحمل جرّواً سمياً كثيف الشعر ثم تخفي كلتاهما داخل البناية..

الآن نرى جيتام يغادر سيارته متنكراً، وقد ارتدى جاكيت مختلفاً عن الذي ظهر به في المشهد السابق، وآيس كاب ونظارة ذات عدسات زرقاء تخفي معظم ملامحه، واسكارف..

جيتام يدخل المبنى..



داخل عيادة الطبيب البيطري

مروءة تدخل العيادة حيث يجلس عدد من الرواد الذين يحملون حيواناتهم المختلفة ما بين قطط وكلاب، وتتجه نحو موظف الحجز الذي ينهض فور رؤيتها في احترام وتوقير قائلاً في سعادة:

يا أهلاً وسهلاً بمذيعتنا الجميلة المتألقة..

مروة (بابتسامة رقيقة شابهها الخجل):

إزيك يا أستاذ حسن .

حسن:

تمام يا فندم الحمد لله . . إزيك انتي وازاي زيتا .

مروة (برقة ممتزجة بالحزن):

أنا تمام بس زيتا مش عاجباني .

حسن:

ليه بس كفى الله الشر؟

مروة:

مانا جاية احجز عشان اعرف .

حسن يمسك بدفتر الحجز ويلتقط القلم قائلاً وهو يكتب في
الدفتر .

حسن:

تحت أمرك .

على باب العيادة نلاحظ أن جيتام يقف يتابع الموقف وقد وضع
الموبايل على أذنه للتصويره ، وما إن تنهي مروة الحجز وتهم بالخروج
حتى يعطيها ظهره وهو يتحدث في الموبايل حتى لا تلاحظه ، وما إن
تغادر حتى يدخل العيادة .



أمام كافيہ Emotions

مروة تقف بسيارتها أمام كافيہ Emotions الذي يملكه جيتام ، ومن سيارته يشاهدها جيتام وهي تغادر سيارتها وتهم بدخول الكافيہ فيعقد حاجبيه ويفغمم ساخرًا:

إيه ده؟ وكمان جاية لي بنفسك؟ .. تعالي يا حبيبيتي على حجر عمو .

جيتام يغادر سيارته في حماس



داخل كافيہ Emotions

مروة تدخل الكافيہ الذي نسمع داخله أغنية «Yolanda be cool» وما إن تدخل حتى تخرج من حقيبتها جهاز MP5 وتضغط على زر التسجيل ثم تضعه في حقيبتها ..

من خلفها يلح جيتام ذلك ويعقد حاجبيه متممًا:

ودي ناوية تسجل إيه دي؟ .. ماشي يا مستر كرومبو .. لما نشوف آخرتها .

مروة تتجه لحسين مدير المكان وتسأله باهتمام:

لو سمحت ..

حسین:

تحت أمرک یا فندم .

مروة:

كنت عايزة أقابل مستر جيتام الدير صاحب الكافيه .

يأتيها صوت جيتام من خلفها بنبرته الساخرة:

You are welcome يا سنيوريتا .

مروة تلتفت نحوه في تحفز قائلة في صرامة:

إنت جيتام؟

جيتام (بابتسامه ساخرة):

لو ماكانش عندك مانع .

مروة (ترمقه بنظرة طويلة):

عايزاك على انفراد لمدة 5 دقائق ف موضوع ضروري

لو سمحت .

جيتام (بابتسامه متحديه):

أسف والله وقتي مش هيسمح . . حضرتك تقدري تحددي

معاد مع أستاذ حسين وأنا تحت أمرک .

مروة تقترب منه وتهمس في أذنيه بنبرة نفيض بالتحدي:

لو ماكلمتنيش على انفراد هتكلم على الملاء وده مش من

مصلحتك . . نصيحة أخوية خد من وقتك الـ 5 دقائق بس

عشان شكلك ما ييقاش وحش قدام حسين .

جيتام بيتسم ساخرًا وينظر لحسين ويقول بنبرة ساخرة:

طب عشان خاطر ك انت بس يا حسين أنا هقابل الأستاذة
لمدة 5 دقائق . . بس خد بالك طلباتك كترت أوي . .
ماتخليش العشم ياخذك بقى ها؟ (يلتفت لمروة ويتابع)
إنفصلي يا سنيوريتا .

جيتام يصطحب مروة إلى مكتبه بينما ينظر لهما حسين بدهشة وعدم فهم .



مكتب جيتام داخل كافييه Emotions

جيتام يدخل مكتبه ، ويشعل الإضاءة ثم يتجه لمكتبه الشخصي ويجلس
على مقعده ، بينما تجلس مروة على المقعد المقابل له واضعة ساقيها فوق
ساق بثقة تميل إلى الغرور فيسألها مبتسمًا:

تشربي إيه يا سنيوريتا؟

مروة تتأمل المكتب قبل أن تميل نحوه وتقول بتحدٍّ وصرامة وقد
تجاهلت سؤاله:

أنا قدامك اهو . . وريني بقى هتخليني أحبك ازاي .

جيتام ينظر إليها بدهشة لا يستطيع أن يخفيها وهو يتراجع ليسند
ظهره إلى مكتبه ، ويشبك أصابع يديه أمامه دون أن ينبس ببنت
شفة فتقول مروة:

مش قادرة افهم ازاي واحد كبير وعاقل وعنده كافييه زي

ده يفكر انه يراهن مذيعة محترمة ع الهوا وقدام جمهورها
إنه هيوقعها ف هواه . . للدرجة دي مشاعر الناس وقلوبها
بقت لعبة مسلية بالنسبة لك؟

جيتام يعقد حاجبيه في ضيق وهي تتابع

مرورة:

عيب . . بجد عيب . . ليه كل ده؟ وانا اللي كنت ناوية أطلع
اعتذر لك ع الهوا عشان ارضيك وارضى أتباعك التافهين
اللي شتموني وعلوا جروبس ضدي بيهزقوني فيها؟ مكنتش
متخيلة إن انت اللي كلمني وراهنى رهان سخيف زي ده
قبل ما ربنا يكشفك ويعرفني عنك كل حاجة .

جيتام يأخذ نفساً عميقاً قبل أن يقول بتحدّ:

الخمس دقائق بتوعك خلصوا يا أنسة مرورة . . بس للأسف
انتي ضيعتيم في عتاب واحد تاني غير اللي كلمك لأنى ما
اعملش تصرفات زي دي .

مرورة:

تيجي نتراهن تاني؟ أنا ف لحظة أقدر أثبت لك انك كداب .

جيتام (ساخراً):

للأسف مش هقدر اراهنك عشان الرهان حرام .

مرورة (بانفعال):

والكذب حرام اكثر . . إنت اللي اتصلت يا أستاذ وانا متأكدة

وعرفت بطريقتي وذكائي اللي انت استهونت بيه . . (تنهض
قائلة) وفي الحلقة الجاية هعرف كل الجمهور إن الشخص
التافه اللي اتصل خسر الرهان .

مروة تولي ظهرها لجيتام منصرفه فينهض من مكانه ويمسك حقيبتها
ليستوقفها قائلاً:

جيتام:

هتسمّعهم الحوار اللي دار بيني وبينك؟

مروة تلتفت إليه وهو يمسك بحقيبتها لتسأله بارتباك:

حوار إيه؟

جيتام:

الحوار اللي انتي بتسجليه دلوقت بالـ MP5 اللي ف شنتك .

مروة تنظر لعينه الصارمتين ونظرته الواثقة فتقول بارتباك:

بطل تخريف . . عن إيدك .

مروة توليه ظهرها منصرفه فيقبض جيتام بيده على حقيبتها بقوة أكبر
قائلاً بصرامة:

أنا اللي براهنك دلوقت انك كدابة .

جيتام يجذب حقيبتها بعنف ويفتح السوستة وهي تحاول أن تجذب منه
الشنطة صائحة فيه:

سيب الشنطة بدل ما هوديك ف 60 داهية .

جيتام يجذب الـ MP5 ويضغط أحد أزراره وهو يقول ساخرًا:

هتصوتي وتقولني خطفتك ف مكتبي اللي انتي اتحايلتي علياً
عشان تنفردي بيأ فيه؟ .. ولا هتقولني اني أخذت الـ MP5
اللي بتسجلي لي بيه من غير إذني؟

مروة تنظر للموقف في قلق بينما يلوح جيتام بالـ MP5 قائلاً
في سخرية:

Sorry يا سنيوريتا . . مش هتعرفي تثبتي لجمهورك حاجة
في الحلقة الجاية . . بس أنا بعرض عليك عرض أعتقد انه
هيعجبك أوي .

جيتام يقرب الـ MP5 من فمه ويضغط زر التسجيل قائلاً:

أقر أنا جيتام الـ الديب اللي اتصل بالإعلامية مروة نور الدين
من 4 شهور في برنامج أستروجين . . وراهنها إنه هيخليها
تحبه . . إنني خسرت الرهان وعلى استعداد لتقبل أي حكم
يصدر منها هي والجمهور .

جيتام يضغط زر إيقاف التسجيل وهو ينظر لعيني مروة مباشرة بنحد
فتبدو الدهشة على ملامحها، قبل أن تسأله:

إنت عملت إيه؟

جيتام بيتسم ساخرًا ويكمل بغموض:

بعترف اني خسرت الرهان . . بس بمزاجي مش غصب
عني . . أصلي ما اتعودتش أبداً إن حد يلوي دراعي . .
إتفضلي جهازك .

يمد يده بالـ MP5 فتمد يدها لتأخذه فيسحب يده مرة أخرى متابعًا:

مش تسمعي العرض الأول؟

مروة (بغضب):

عرض إيه؟

جيتام:

أنا هديكي الـ MP5 . . بس هاخذ منك كلمة شرف إنك ما تديعيش الاعتراف إلا في نهاية الرهان . . أظنك لاحظتي إن كلامي ف زمن الماضي وكإننا عدى علينا 4 شهور فعلاً .

مروة تنظر له بدهشة وتتطلع إلى عينيه اللتين تبدوان لها وكأنهما اتسعنا، وظهرت بهما صرامة وتحداً للدنيا كلها فتعقد حاجبها وتسأله بريئة:

ليه؟

جيتام:

لما اخسر بعد 4 شهور غير لما اخسر بعد يوم . . أرجوكي راعي إنني ليا جمهوري ومعجبيني زيك بالظبط ده لو ماكانش أكثر .

مروة تنظر له في شك ثم تقول بتحد وثقة:

. . O.K . . بس أحب اعرفك إن الحكم اللي هحكمه عليك ساعتها . . إنك تقفل الجروب بتاعك وتعزل النصب ده .

جيتام بيتسم ساخرًا وهو يناولها الـ MP5 قائلاً:

ميروك عليكي الـ MP5 . . فلوسك حلال .

مروة تأخذ الـ MP5 وتضعه في حقيبتها بسرعة فيقول لها:

بس حتى وانتى كسبانة أحب أعرفك حاجة مهمة. . إنتي بتعلمي بناتك إزاي يمسخوا دموعهم. . أما أنا بعلم رجالي إزاي ما يعيطوش من أصله.

مروة تنظر له ساخرة قبل أن تعطيه ظهرها وتنصرف.

ما إن تغلق الباب خلفها حتى ينظر جيتام إلى لوحة مراقبة تتابع الكافيه كله، موجودة في مكتبه، ثم ينظر لكاميرا موجودة في سقف مكتبه وينهض واقفاً أمامها، بينما نحن (المشاهدين) نتابعه من خلال لوحة المراقبة التي نراه يقف فيها أمام الكاميرا ملوحاً بسبابته أمام الكاميرا في تحدٍّ قائلاً:

كده المكسب بقى شبه مستحيل. . وده اللي هيخلي اللعبة أجمل.



أمام باب مكتب جيتام في كافيه Emotions

جيتام يخرج من مكتبه وهو يرتدي الجاكيث وفي إحدى يديه C.D فيجد حسين أمامه فيقول له

جيتام:

عايز اطلب منك طلب لو غاطت فيه مش هنكمل مع بعض. .

حسين (بقلق):

خير يا فندم؟

جيتام:

كمان 4 شهور إلا يومين من النهار ده فكرني بالـ C.D بتاعي
وأنا مفهم كل حاجة.

حسين يتراجع في خوف قائلاً:

يا نهار اسود.. إنت كمان ليك C.D يا فندم؟

جيتام يهز كتفيه قائلاً في بساطة:

آه وفيها إيه؟

حسين يبعد يده ويتراجع في رعب قائلاً:

أبوس إيدك اقبل استقالتني.. مش عايز نهاية خدمة.. مش
عايز تأمينات.. بس سيب الناس تقول علياً بعد ما اموت
الراجل ده عاش تمام ومات تمام.

جيتام (وقد قبض على حسين من كتفيه):

وأنا أتم منك.. واللانسيت أنا عملت إيه ف الراجل بتاع
الأتو يا حسين؟

حسين:

مانا برضه مستغرب إزاي لحقت تتغير.. إنفلونزا السيديهات
طالتك واللإيه يا فندم؟

جيتام:

إخرس .. ده C.D ثقافي مع الأنسة اللي كانت هنا من شوية ..

حسين يطلق شهقة برعب وفرع فيتابع جيتام:

قصدي Project يا غبي .. مشروع علمي بنّاء يعني ..
ناويين نطور الكبة الإسكدراني بإذن الله .

حسين يطلق زفرة حارة ويقول بفرحة وهو يعانق جيتام:

الحمد لله يا فندم .. ده انا الدنيا مش سايعاني م الفرحة .

جيتام يعانقه بفرحة مماثلة وهو يقول بسعادة

وأنا كمان .. ألف مبروك يا حسين (يربت على كتف حسين
متابعاً) أخيراً أتأكدت من رجولتك .. مش أي حد على فكرة
بينجح ف الاختبار ده .

جيتام يترك حسين وينصرف وهو يغمغم

جيتام:

صحيح .. إن بعض الظن إثم .

حسين ينظر له بدهشة وعدم فهم ، بينما يمط جيتام شفثيه بشكل كوميدي
ويلقي قبلة في الهواء لحسين قبل أن ينصرف ، بينما ما تزال الدهشة
مرتسمة على وجه حسين .



مكتب شريف ومروة في الجامعة الأمريكية

شريف ومروة يضحكان في مكتبهما الخاص بأعضاء هيئة التدريس ،
حيث يجلسان كلاهما على مكتبين متجاورين ، وتقول مروة بحماس:

بجد أنا مهما حكيت لك وشه اتصدم ازاي وانا بواجهه
بالحقيقة وبقوله إنت خسرت الرهان . . مش هتخيل المنظر
كان عامل ازاي . . فظيبييع .

شريف (مبتسمًا بخبث):

لا ، مانا ياما شوفته وهو بيتصدم قبل كده . . تلاقي كتافه كده
طلعت لفوق ومناخيره جت على جنب مش عارف ازاي ،
وعينه عمالة تلف ف مكانها زي مغامرات توم وجيري .

مروة تضحك على هذا التشبيه قبل أن تنظر لشريف بابتسامة رقيقة
وتقول بامتنان:

مروة:

استغربت لما لقيتك بتتصل بيا بالليل ومكنتش متخيلة إنك
هتقدم لي الخدمة دي . . ميرسي يا شريف أوي .

شريف (برقة ورومانسية):

لا ، ميرسي دي تقوليها للأوفيس بوي لما يعمل لك
الإسبريسو بناعتك بضمير . . لكن بيئاً وبين بعض مفيش
ميرسي . . ثم أنا اللي المفروض اشكرك مش انتي . .

مروة (تتظر له بتساؤل):

ليه؟

شريف:

عشان الكلام الحلو اللي قولتیه ف حقي من كام يوم للطلبة بتوعك .

(مروة) بابتسامه يملؤها الحماس:

أولاً همّا مش الطلبة بتوعي لوحدي . . ثانياً أنا بجد عاجباني جداً
طريقة تدريسيك ، وبقيت اقلدك في طريقة الشرح المبسطة ،
وضربت صحوبية معاهم لغاية ما بقوا يحبوني زيك بالضبط .

شريف (ناظراً لعينيها بابتسامه رقيقة):

بس انا بحب أكثر منهم .

مروة (تتصنع الصرامة وعدم الفهم):

بتحب إيه؟

شريف (بارتباك وإحراج):

إحم . . طريقة التدريس .

شريف ينظر لجهاز اللاب توب ليداري احمرار وجهه
وخلجه ، فتنظر هي بدورها إلى كتاب مفتوح أمامها ثم
تسرق نظرة جانبية سريعة نحو شريف وعلى وجهها يرسم
شبح ابتسامه سرعان ما يختفي .



منزل مروة - حجرة نومها

مروة تنام على صدر والدتها التي تمسح شعرها بحب وحنان وقد جلست كلتاها على السرير، وتقول مروة بلهجة من ينهي حدوتة انتهى من سردها للتو:

بس يا ستي . . آدي كل الحكاية.

منى:

طب وإيه اللي خلاه يعمل كده ف صاحبه اللي عايش معاه من سنين ويعرفه قبل منك؟

مروة (بابتسامه خبيثة):

السبب اللي قالهولي إنه نفسه يفوق جيتام من اللي هو فيه، بدل ما هو مقتنع إن الحب ممكن يبجي بالحوارات والتخطيط.

منى (بابتسامه خبيثة مماثلة):

والسبب الحقيقي اللي ما قالهوش؟

مروة (تتسع ابتسامتها الخبيثة وتزداد خبثاً):

إنه خايف على زميلته الجديدة ف نفس القسم.

منى:

زميلته برضه؟

مروة (بحيرة وغموض):

لحد دلوقت زمالة . . وممكن تستمر زمالة على طول.

أمها ترفع رأسها وتزيحه عن صدرها بعنف وتنتظر لعينيها بغضب .
منى (بغضب):

والله إنتي ما راجعة غير لما تمرضيني أو تموتيني ناقصة عمر .
مروة (بغضب):

شفتي بقى .. أهو عشان حركاتك دي أنا مبحش أحكي لك حاجة .
منى:

ماهو انتي اللي عمرك ما كملتي حكاية حلوة لحد آخرها ..
من ساعة الزفت اللي كنتي مخطوبة له 5 سنين وف الآخر
سابق وانت عايشة لي ف دور المعقدة .
مروة (بغضب وضيق):

أنا مش معقدة يا ماما .. أنا فاهمة الدنيا والرجال أكثر منك ..
عشان كده مش هسمح لحد يكسرنى تاني أو يخدعني أو اكتشف
إنه كان متجوز علياً بعد ما يموت زي ما بابا خدعك .
الأم تنظر لها بصدمة وتتمتم ..

منى:

نفسى أعرف بس إنتي عايزة إيه؟

تلمع الدموع في عيني مروة وهي تسرح وتقول وكأنها تحدث الكون كله ..
مروة:

نفسى أرجع لأيام ما كان الحب هو حضنك .. ولما كان

كف أبويا هو أعلى مكان في الأرض .. (تجلس على الكنبه وتستمر في سرحانها وهي تتابع) لما كنت بنام في أي حته وبصحى الأقي نفسي على سريري .. ولما كانت الحاجات الوحيدة اللي بتتكسر في حياتي هي اللعب والعرايس .. ولما كانت كلمة باي معناها هشفوك ثاني بكرة .. تنسال دمعة ساخنة رقيقة على خدها وهي تقول بصوت مبجوح باك: دلوقت اللي بيروح ما بيرجعش .

بعدها نسمع صوتًا يأتي من خارج الغرفة .. إنه حسام شقيق مروة الذي يقول بلهجة ناعسة ساخرة قبل أن نراه ..

ص . حسام:

نفسى مرة ما اصحاش على صوت خناكم ..

الأم ومروة تنظران بخجل لحسام وهو يدخل الغرفة متابعًا:

حسام:

امتى بقى الواحد يتجوز ويرتاح من الوش ده؟ إنتوا إيه ..
دماغكو فيها صراصير؟

مروة (بلهجة مرحة وهي تمسح دموعها):

والنبي يا خويا خليك ف جوازتك اللي عمال تذلنا بيها بقالك
3 سنين ومفيش ملي واحد اتقدمته .

حسام يتمتع وهو يتتأعب قائلاً:

عيب عليكي .. هيجصل إن شاء الله على آخر ديسمبر
الجاى .. هو صحيح ديسمبر 30 ولأ 31 يوم؟

مروة (ساخرة):

إنت وحظك بقى .. حسب الهلال!



الطريقة المواجهة لمكتب رئيس القناة

مروة تسيير متجهة نحو مكتب رئيس القناة ويمر بجوارها شخص يقول في الموبايل ..

الشخص:

خلاص أنا حجزت مونتاج من 5 لـ 11، هات الماتيريال وتعالى حالاً.

بينما تقف فتاة مع شخص آخر على جنب وتقول له بصرامة ..

الفتاة:

بعد بكرة عيد ميلاد يسرا .. اعمل حسابك إن انت اللي هتطلع الأوردر ده وعايزاه يتمنتج ف نفس اليوم.

الشخص الذي تتحدث إليه الفتاة:

ماينفعش .. أنا عندي أوردر تاني لكواليس مسلسل جمال سليمان الجديد.

الفتاة (بصرامة):

خلي حد يطلعك غيرك واطلع انت أوردر يسرا.

ما إن تصل مروة إلى الباب المكتوب عليه «مكتب رئيس القناة» حتى ينفتح الباب من الداخل ويخرج جيتام الذي ينظر لها بسخرية بينما تنظر هي له بصدمة فيقول في مرح ساخر . .

جيتام:

مش معقول . . مروة؟ . . وفي القناة اللي أنا بشتغل فيها؟ . .
لالالا بجد صدفه بمليون جنيه . . ابقى خليها تتكرر ثاني بقی
ها؟

سمير رئيس القناة يطل برأسه وقد وقف على عتبة باب مكتبه متابعًا الموقف، فينظر له جيتام بابتسامة ساخرة ويقول وهو ينصرف . .

جيتام:

خلي بالك منها يا مستر سمير . . البنت دي تخصني .
جيتام يعطيها ظهره ويلوح بيده بما معناه (باي) فتنظر
مروة على ظهره بمقت وقرف وتمط شفتيها وهي تتمتم
بكلمات في سرها فيقول جيتام دون أن ينظر لهما:
شايك يا مروة . . عيب كده إنني كبيرة ع الحركات دي .
جيتام الآن وصل لنهاية الطريقة فيلنفت ويلوح لكليهما قائلاً
بمرح ساخر . .

جيتام:

بااااااي .



مكتب رئيس القناة

مرودة تجلس على مقعدها المقابل لمكتب رئيس القناة قائلة في حدة وغيظ .

يعني إيه الكلام ده يا فندم؟

سمير يأخذ نفساً عميقاً من سيجاره ويطلق دخانه في سماء الحجرة وهو ينظر للسقف قائلاً بلهجته الباردة وملامحه الجامدة:

زي ما سمعتي يا مرودة . . لازم تحسّني علاقتك بيه عشان
من هنا ورايح هيبقي زميلك . . كلها كام يوم ودورة البرامج
الجديدة هتبدأ وهيقدم برنامج زيك بالطبط .

مرودة تقول بلهجة عصبية دون أن تستطيع كتمان مشاعرها
وانفعالاتها:

بعد كل اللي حكيتھولك عنه؟

سمير يعتدل في جلسته ويتطلع إلى عينيها مباشرة قائلاً في مكر:
موقف وعدى يا مرودة . . خلينا في اللي جاي .

مرودة (بحدة):

إزاي بس يا فندم؟

سمير (بصرامة):

ممکن تهدي؟

مرودة تأخذ نفساً عميقاً وتظل تهز رجليها في توتر وعصبية، فيستمر
سمير في النظر إليها قائلاً:

قبل ما أقعد ع الكرسي ده أنا اشتغلت مذيع 15 سنة مع ناس
مش بس كانوا بيكرهوني .. دول كانوا بيخططوا الموتى ..
النهارده أنا رئيس قناة وهما مالهمش وجود ع الخريطة ..
هي دي الدنيا .. اتعلمي تتبسمي ف وشس عدوك قبل
حببيك .. وبعدين إنتي قلقانة كده ليه؟ .. إنتي خايفة منه؟

مروة (بحدة):

ولا منه ولا الأجعص منه .. أنا بس مستغربة إزاي القناة تتعاون
مع نصاب زي ده!

سمير (يضحك بمكر):

وهو مين بيتكلم عن الحب ومثس نصاب .. المهم إنه ليه
Fans عدددهم 150 ألف واحد، ده غير إنه جاب
للبرنامج هنكسب من وراه 2 مليون جنيهه .. ركزي ف
البرنامج بتاعك يا مروة وسيبي كل واحد ياخذ فرصته ..
الدورة البرامجية مدتها 3 شهور يا يثبت نفسه فيهم ويكدّب
ظنك يا ينطرد في الشارع لو برنامجه فشل.



استديو برنامج «تيستيسترون»

جيتام يقف في منتصف استديو البرنامج الذي يوحى ديكوره باللمحة
الذكورية، سواء صور الموديلز الرجال التي تملأ جنباته، وتتنوع
صور الرجال ما بين رجال على قدر هائل من الوسامة، وآخرين

يتمتعون بأجساد ضخمة قوية، وتتسم ألوان الاستديو بأنها ألوان صريحة ما بين الأسود والبنّي والرمادي . .

جمهور البرنامج كلهم من الذكور متفاوتي السن والعمر والأجسام جيتام ينظر لجمهور البرنامج ويقول بثقة تشوبها خفة الظل: خريطة الهرمونات جوا كل واحد فينا حصل فيها زلزال جاب عاليها واطيها .

جيتام ينظر للكاميرا ويقرأ من الـ Auto Q وكأنه يحدث المشاهدين ويتابع في خفة ظل

جيتام:

في برنامجنا «تيسيتيرون» أو هرمونات الذكورة . . هنرجع كل حاجة زي ما كانت . . مش هنتكلم كلام علمي كبير محدش بيّفهمه . . ولا هنتضيف متخصصين لابسين بدلة وكرافتة وبيقولوا نفس الكلام اللي بنسمعه في كل البرامج . . كل اللي هنعمله . . إننا هنقعد في الكافيه بناعي . . وهنشوف مع بعض قصص حيكم اللي مفيش منها رجا وهي بتتحول من حلم لحقيقة . . وساعتها . . ليكوا منا هدية، بدلة عريس وستان عروسة . . والمشاريب على حسابنا . . وكمان تكاليف الفرح علينا من أول أجرة المأذون لغاية بوفيه المعازيم . . ف تيسيتيرون جرح القلوب كان موضه وانتهت . جمهور البرنامج يصفق بشدة وبعضهم يطلق الصفافير .



منزل مروة

مروة تجلس في ريسيشن منزلها تشاهد على شاشة التلفاز برنامج «تيسيتيرون» الذي يقدمه جيتام حيث يذيع البرنامج نهاية مشهد الكافية الذي تعرفت فيه فتاة الرجل أبو نظارة على شخص جيتام في بلازما موجودة داخل الاستديو ليشاهد فيها جمهور البرنامج التقرير المصور .

الفتاة رائعة الجمال لجيتام:

إنت صاحب الكلب؟

جيتام:

لا أنا إزاة العصير . .

وفي الاستديو تسطع الأضواء وهي تتسلط على ملامح الفتاة رائعة الجمال وهي ترتدي الفستان الأبيض وقد أصبحت عروسة تجلس في مدرج الجمهور وجوارها الرجل أبو نظارة وهو يرتدي بذلة الفرح البيضاء، حيث تنظر الفتاة رائعة الجمال للرجل أبو نظارة ضاحكة، بينما نرى جمهور الاستديو يضحك ويصفق بشدة، وجيتام يقف في منتصف الاستديو فاردًا ذراعيه بطريقة مسرحية والكل يصفق له، ثم ينظر لمدرج الجمهور بابتسامة واثقة ويشير بيده للشاب الفانكي الذي طال ذقنه وقد ارتدى بذلة سوداء فينهض هو وعروسته الملتزمة التي ارتدت فستان زفاف محتشماً وأنيقاً، فينهض كلاهما ويغادران مدرج الجمهور متجهين

لأسفل ، وكذا يفعل الرجل أبو نظارة والفتاة الجميلة ، ثم ينضم لهم الشاب ذو الصليب وهو يتأبط ذراع فتاته العبقرينو حتى يصبح الشبان الثلاثة مع فتياتهم في زي العروسة والعريس ، فتدخل فرقة المزمارة وأهل كل عروسين في الاستديو حيث نسمع صوت زغاريد وطبل وزمر في زفة على الهواء مباشرة .

مروة توجه الريموت نحو التلفاز لتغلقه في غضب وتهب واقفة وهي تقول في حدة:

نصااااااب .. كل ده نصب .. نصب .

والدتها التي كانت تجلس تشاهد الحلقة على الكنبه تقول غاضبة

منى:

إيه شغل الجنان ده؟ .. مش فيه بني آدمة قاعدة بنتفرج على التليفزيون معاكي؟

مروة تلتفت لها في دهشة غاضبة وتقول:

إنتي عاجبك النصب اللي شغال ده يا ماما؟!!

منى (بجدية وحماس):

هو فين ده النصب؟ .. الولد كتر خيره جوز ف حلقة واحدة 3 شباب زي الفل .. وكسر دماغ البنات الهبله اللي ماكانوش مقدرين قيمتهم .. يا ريت بس ربع البرامج تعمل زيه .. (تنهض مغادرة وهي تغمغم بتلقيح كلام) كان ناس صحابنا عقدتهم اتحلت من زمان .

مرّوة تنظر بغيط شديد لوالدها التي أعطتها ظهرها وانصرفت ، ثم تمسك الموبايل وتضغط أزراره في عصبية ثم تضعه على أذنها وما إن يأتيها الرد حتى تقول في عصبية:

أيوه يا شريف .. عايزة أشوفك ضروري .



في أحد الكافيهات

شريف يجلس مع مرّوة في أحد الكافيهات حيث نجد أمامها فنجان إسبريسو بينما أمامه لانيه فرايبه ويقول ساخرًا:

بقي هو ده السبب اللي جايباني عشانه على ملاً وشي؟ ..
يا شيخة افكرتك عايزاني ف ميعاد غرامي .

مرّوة تضحك ضحكة رقيقة ثم تقول بمرح:

يا راجل ما تفولش على نفسك .. بعد الشر عليك مني

شريف يميل نحوها ويقول بمرح مماثل:

ده انتي لو مرض هصلي ليل نهار وادعي ربنا بيتليني بيكي .
مرّوة تمسك بفنجان الاسبريسو وترشف منه رشفة وهي تقول بلهجة من يغير الموضوع:

أنا بجد محتاجة أعرف منك كل حاجة الشخص ده قالها علياً ..
الموضوع وصل للعند والتحدي ف الشغل يا شريف .. معلش

استحملني لو ثقلت عليك ، بس بجد أول ما لقيت نفسي
مخنوقة إنت أول واحد فكرت فيه .

شريف ينظر لها بفرحة ورومانسية وما إن تنفرج شفاته
للكلام حتى تدوي ضحكة خليعة فيترجع في قلق وينظر إلى
جواره لمعرفة مصدر الضحكة فيجدها من امرأة بدينة
ترتدي ملابس لا تتناسب مع بدانتها وتضع الموبايل على
أذنها وهي تقول في خلاعة

المرأة البدينة:

مفاجأة مش متوقعة .

شريف يلتفت لمروة ويميل نحوها وهو يبتسم في رومانسية قائلاً:

من ناحية إنها مفاجأة مش متوقعة فهي فعلاً مش متوقعة خالص .

صوت الضحكة الخليعة يدوي مرة أخرى فيترجع شريف منزعجاً
ويقول في توتر ساخرًا:

ما تيجي نمشي من هنا قبل ما بوليس الآداب يطب علينا .

مروة تضحك في رقة وتقول:

طب استنى بس ربع ساعة نتكلم فيها عن صاحبك . . (تنظر
للمرأة وتبتسم في سخرية وهي تميل نحوه وتهمس)
ما تخافش إجراءات الضبط والإحضار بتأخذ وقت .

صوت الضحكة الخليعة يدوي مرة أخرى بعنف أكثر فتنهض مروة
وتلتقط شنطتها وهي تقول:

لا ده كده فعلاً لازم يحصل كيسة .



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

شريف ينهض بدوره وينادي على الجرسون

شريف:

الشيك لو سمحت .

فجأة نسمع صوت سارينة النجدة فتنهض المرأة في هلع، إلا أن شريف يربت على كتفها ويخرج موبايله من جيبه وهو يلوح به أمامها قائلاً
في لهجة ساخرة:

رايحة فين متخافيش . . دي رنة الموبايل بتاعي .

المرأة تضع يدها على قلبها وتأخذ نفساً عميقاً وهي تغمض عينيها في طمأنينة، في الوقت الذي يأتي فيه الجرسون ويسلم شريف الشيك قائلاً:

الجرسون:

الشيك يا فندم .

شريف يقول للجرسون وهو يشير للمرأة ساخرًا

شريف:

لا ده المدام عازمانا حلاوة ما ربنا نجاها . . مش كده
يا طاهرة؟

مروة تنظر للأرض في محاولة لتداري ضحكتها بينما المرأة البدينة تضحك نفس ضحكتها الخليعة .



في مكان مفتوح به مساحات خضراء

شريف ومرودة يسيران ونجد الغضب على وجه مرودة وهي تقول
بحدة وعصبية

مرودة:

ده فعلاً إنسان ما عندوش ذوق ولا أخلاق .. إزاي يقول
علياً كلام زي ده؟

شريف (بحزن):

أنا لو كنت أعرف إنك هتزع علي كده مكنتش قولت لك .

مرودة (بحرج لأن شريف لاحظ أن الكلام أثر فيها):

لا لا عادي أنا مش متضايقه .. كمل لو سمحت .. عايزة أعرف
كل كلمة قالها علياً .

شريف:

يعني .. هو من وجهة نظره إنك عمرك ما هتتجوزي ومش
هتلاقي اللي بيص لك ، وقال إيه أهلك نفسهم يجوزوكي
ومش عارفين .. (ينظر لها برومانسية ويتابع) مغفل طبعاً
لأن ألف من يتمناكي .

مرودة تصمت في وجوم فيتابع شريف الذي شعر بالحرص لأنها تجاهلت
جملته الأخيرة:

طبعاً أنا ساعتها ما سكتلوش .. بس هو قال إن تحليله

لشخصيتك بيؤكد إنك مسترجلة وما بتعرفيش تتعامل مع
الجنس الخشن . . عشان جواكي عقدة من قصة حب فاشلة،
وإنك بتحاولي تعملي نفسك قوية عشان تداري ضعف
فظيع جواكي .

مروة تسرح وتلتمع الدموع في عينيها فينظر شريف لها بحرج شديد
ويقول:

شريف:

كفاية بقى كلام في السيرة دي وخلينا فيكي شوية .
مروة تظل على سرحانها وتسير كالمشدوهة فينادي شريف عليها:
مروة . .
مروة تنظر له بارتباك وتقول:
نعم . .

شريف:

وصلتي لحد فين؟

مروة:

يعني إيه؟

شريف:

يعني الكلام اللي حكيت هولاك خلاكي تسرحي وتبقي ولا إنتي
هنا . . وبعدين مش ملاحظة إننا من ساعة ما خرجنا مفيش
غير سيرة جيتام؟



مكتب رئيس القناة

سمير رئيس القناة يريح ظهره على مقعده وينظر لجيتام نظرة ثعلبية وهو يقول بابتسامة ماكرة

سمير:

باستثناء كام ملحوظة صغيرين أحب أقول لك مبروك يا جيتام ..
البرنامج سمع وعجب الناس عشان كده حبيت أذكرك ..

جيتام:

من إيه يا سمير بيه؟

سمير:

من التكرار .. (ثم يميل نحو جيتام ويقول بحزم) معظم
برامج الحب اللي بتعيده بتزيده زي ما انت فاهم .. أنا مش
عايزك تقع في الفخ ده .

جيتام (بتقة):

لا ، من الناحية دي اطمئن خالص .. أنا بعرض قصص حب
حية من الكافيه بتاعي .. وكل قصة حب مختلفة عن اللي
قبلها ، ده غير إن أبطال القصص دي بقوا أصحابي وكلهم
هيجوا الاستديو .. عشان كده أوعدك إن دايمًا هيكون فيه
تفاصيل جديدة .

سمير:

طب تمام .. تشرب إيه؟

جيتام:

قهوة مطبوخة سكر زيادة ع الريحه .

ينتسم سمير ، وما إن يمد يده نحو سماعة التليفون وقبل أن يلتقطها حتى يرن صوت جرس التليفون ، فيلتقط السماعة بهدوء ويضعها على أذنه وينتظر قليلاً ثم يقول ببروده المعهود

سمير:

خليها تدخل .

جيتام (ساخراً):

دي القهوة جاية بنفسها . . مؤدبة أوي وبستأذن قبل ما تدخل . . حقيقي إنت مسيطر يا ريس .

سمير يضحك بينما الباب ينفتح فتدخل منه مروة في قمة الجمال والأناقة وقد اختلفت تماماً عن ذي قبل في الاستايل الخارجي . . الآن ترتدي فستاناً شيك ، وتضع مكياجاً كاملاً ، وقد عملت شعرها في الكوافير وخلعت نظارتها!!

جيتام تتسع عيناه في دهشة بينما يقف سمير مشدوهاً ويقول
بإعجاب:

أوبأأأأأأأأأأ . . .

مروة تسير بخطوات واثقة وعلى وجهها ابتسامة ساحرة ، لتسلم على سمير الذي ينظر لها بإعجاب ، بينما يغمغم جيتام:
دي كده بقت فروت سلاط خالص .

مروة تسمع العبارة فتنتظر لجيتام وتبتسم بثقة قائلة:
هاي .

جيتام ينظر لها بإعجاب ويقول:

مذيعات عربي أم الأجنبي!

مروة تكشر عن أنيابها وتقول في جدية:

بعد إذنك يا أستاذ جيتام . . أنا מבחש הזרار ده .

جيتام:

ولا أنا والله بس أستاذ سمير هو السبب .

سمير:

أنا؟

جيتام:

مش قلت أوبا؟ انكر بقى . . (يلتفت لمروة ويتابع) خلاص يا
مروة أستاذ سمير عرف غلطته ومش هيعمل كده تاني .

مروة تبتسم رغماً عنها فينظر سمير لكليهما ويقول بلهفته التعلبية
الماكرة

سمير:

أنا جمعتمكم النهارده ف الحقيقة لسببين . . السبب الأول
عشان كان نفسي أشوف اللي أنا شوفته .

مروة وجيتام (في آن واحد):

وهو حضرتك شوفت إيه؟

سمير:

شوفت حاجات كتير تخليني مطمئن . . السبب الثاني إن فيه
بكرة حفلة بمناسبة مرور 5 سنين على القناة ، وتحققنا لأعلى
نسبة مشاهدة حسب استطلاعات الرأي . . هيجي الحفل
عمرو دياب ، والكل لازم يحضرها عشان . .

مروة (مقاطعة):

أنا آسفة يا فندم . . مش هينفع .

جيتام ينظر لها ساخرًا ثم يقول لسمير بلهجة خبيثة:

أنا بالنسبة لي يا فندم اعتبرني أول الموجودين . . دي حفلة
القناة يعني كأنها يوم فرحي بالظبط . . مش هيكون فيه
رقاصة برضه؟

سمير يتجاهله ويتحدث إلى مروة غاضبًا

سمير:

مفيش اعتذارات يا مروة تحت أي ظرف . . اللي مش
هيجي يعتبر نفسه مش في القناة .

مروة (بحرج):

يا فندم أنا عندي ارتباط مهم جدًا كل جمعة
ومقدرش . .

جيتام (مقاطعًا بصدمة):

إيه ده؟ هو بكرة الجمعة؟

سمير (ينظر له بغضب):

إنت كمان مش هتقدر ولأ إيه؟

جيتام:

حضرتك أنا قايل لك من أول يوم إن أنا طول الوقت تحت
أمر القناة ما عدا يوم الجمعة.

مروة (غاضبة):

ما إنت لسه قايل إنك أول اللي هيجوا . . غيرت رأيك زيي
ليه بقى؟ إنت ناوي على إيه؟

جيتام (بتحد):

على فكرة بقى إنتي كنتي شايقة ف عنياً إن يوم الجمعة مش
هيناسبني فقولتي تسبقي . . بعد إذنك يا فندم . .

سمير يخبط سطح مكتبه بعنف مقاطعاً حديثهما بغضب

فأثلاً

سمير (مقاطعاً):

كفاية .

جيتام ومروة يصمتان ، فيتابع رئيس القناة وقد استعاد هدوءه ، إلا أن
كلماته جاءت في منتهى الصرامة وهو يلوح بسبابته:

كل واحد عنده مشوار مهم يروحه وبعدين نتقابل في الحفلة
اللي هنتذاع ع الهوا مباشرة . . واللي مش هيجي يعتبر نفسه
مش معنا . . ده أورد . . O.K.



خارج منزل جيتام وشريف

جيتام يفتح باب الشقة وهو في كامل أناقته وقد ارتدى نظارة شمسية، وفي يده الأخرى كلبه الذي ظهر به من قبل ثم يسحب الأسانسير . .

الأسانسير يصل وداخله عم فكري وقد ظهرت عليه النظافة وأثار الاستحمام، سواء شعره المغسول المسرّح، أو وجهه الوردي وقد ارتدى ترينج أنيقاً وفي يده جورنال الأهرام، وعلى وجهه ابتسامة عريضة سرعان ما تتبدد فور رؤية الكلب، حتى إن عم فكري يتراجع في رعب ويلصق ظهره في الأسانسير قائلاً في رعب:

عم فكري:

إيه الكلب ده؟ ده مش ممكن يكون بني آدم . . (يقول لجيتام متوسلاً) أرجوك ابعده عشان ما يتعورش . . مش كل كام يوم أدبح لي كلب وأوسخ هدومي .

جيتام ساخرًا وهو يدفع نحوه الكلب

جيتام:

ابن حلال ياض يا عم فكري . . أنا كنت نازل أدبحه عشان أعمله ع الغدا . . خد موّته .

عم فكري يقفز برعب ويظل يتنطط وهو يقول في هلع .

عم فكري:

لالالالالالال مش دلوقتي مش دلوقتي . . أنا عندي كام مشوار
مهمين ، هخلصهم وبعدين هدبحهولك .

جيتام يجذب الكلب بعيداً ويقول ساخرًا:

إيه رايع فين كده؟

عم فكري:

رايع أحجز تذكرة لكاس العالم في قطر 2022 .

جيتام (ساخرًا):

ما انت هتشوفه كده من غير تذاكر . . فوق بيوصل لهم
كل حاجة ، ما تقلقش يا عم فكري .

فكري:

ها؟

جيتام يشير لفكري بالخروج من الأسانسير وهو يهدده بالكلب قائلاً
في غيظ

جيتام:

إنت لسه هتنتح لي . . يلاً خدها جري لحد قطر .

عم فكري يغادر الأسانسير ويففز درجات السلم صارخًا:

فريرة .

جيتام يركب الأسانسير ويغلق بابه .



أمام إحدى دور الأيتام

مروة تركن سيارتها أمام إحدى دور الأيتام وتنزل من السيارة حاملة قطتها «زيتا» وهي تتأمل العديد من الأتوبيسات الواقفة أمام الدار بدهشة. . نلاحظ أن مروة عادت لهيئتها (بدون مكياج وبشعر كيرلي)، ثم تفتح حقيبة السيارة وتخرج منها العديد من الهدايا وتحملها بحيث تحمل القطة في يد وباقي الهدايا باليد الأخرى وتسير بها حتى تدخل الدار.

مروة تدخل دار الأيتام وفي يدها العديد من الهدايا فتستقبلها ميس عفاف، إحدى الموظفات، بابتسامة عريضة وتقول في ترحاب ومودة وهي تحمل عنها الهدايا.

ميس عفاف:

يا ألف أهلاً وسهلاً بأستاذتنا العظيمة.

مروة:

صباح الخير يا ميس عفاف. . إيه الأتوبيسات دي كلها؟

عفاف تنظر لها بدهشة وتقول

ميس عفاف:

يوه. . ده انا افنكرتك عارفة عشان كده جايبه معاكي كل الهدايا دي.

مرورة:

عارفة إيه؟

ميس عفاف:

النهارده يوم اليتيم وكلنا طالعين ف رحلة هنتقابل فيها مع كل دور الأيتام اللي ف مصر .

الآن نرى طابورًا من الأطفال يسير بانتظام يغادر الدار ويتجه نحو الأتوبيس الواقف خارجها . .

طفل وسيم للغاية يبلغ من العمر حوالي 6 أو 7 سنوات ينفصل عن الطابور ويجري مسرعًا نحو مرورة قائلاً في فرحة عارمة:
ميس مرورة حبيتي . .

مرورة تنحني لتعانقه فيحتضنها بحب شديد وهو يمسخ رأسه في صدرها ، بينما هي تمسخ شعره وتقبل رأسه قائلة بفرحة شديدة

مرورة:

بجاد حبيبي . . عامل إيه يا بيجو؟

بجاد:

الحمد لله . . أنا طلعت الأول ع الفصل في امتحانات الشهر .

مرورة تأخذ إحدى الهدايا وتعطيها له قائلة في فرحة:

هو ده بجاد الشطورة اللي أنا أعرفه . . خد بقى الهدية دي ومش عايزاك تنزل عن الأول بعد كده .

بجـاد:

حاضر .

بجـاد يأخذ قطة مروة ويمسح فروتها في حب وحنان قائلاً لها

بجـاد:

إزيك يا زيتا .

مروة تعادل واقفة وتقول لميس عفاف بتأثر:

وزعي بقى باقي الهدايا على الأولاد يا ميس عفاف .

ميس عفاف:

إيه إنتي مش هتيجي معانا ولأ إيه؟

مروة (تقترب منها وتهمس):

معلش أنا مش عاملة حسابي . . أنا كنت جاية أسلم على بجاد
وأوزع الهدايا وأمشي عشان ورايا مشوار مهم .

بجـاد يجذب مروة من جيبها لتسمعه قائلاً في براءة

بجـاد:

أنا هسبقك مع زيتا ع الأتوبيس يا ميس مروة عشان أوريها
لاخواتي .

مروة تنظر له بخجل لكنه لا ينتظر جوابها ، وبالفعل يأخذ «زيتا»
ويخرج بها من بوابة الدار **فتقول ميس عفاف باستعطاف:**

مجش من نص ساعة يا أستاذة . . ده هو يوم وحيد في السنة .

مروة تنظر لها في خجل وحيرة فتشعر عفاف أنها بدأت تقتنع فتتابع
بحماس

ميس عفاف:

والنبي ما تكسفي بجاد.. صدقيني الجو هناك هيعجبك أوي.
مروة ما زالت حائرة ثم تنظر لأتوبيس الأطفال.



في أتوبيس دار الأيتام

مروة تجلس وقد استندت برأسها وظهرها على مقعدها في شرود وسرحان
بجوار بجاد الذي يمسك القطة ويمسح شعرها الأبيض الكثيف..

بجاد يلتفت لمروة ويقول لها:

النهارده بالذات كنت هزعل أوي لو ما كنتيش جيتي معايا
يا ميس.

مروة تنظر له برقة وتبتسم قائلة

مروة:

إشمعنى؟

بجاد يقترب منها ويهمس:

عشان كان نفسي تشوفي البنت اللي هتجوزها.

مروة تضحك بشدة وتقول بدهشة شديدة ممتزجة بالفرحة:

آه يا شقي .. إنت بتحب يا بجاد؟

بجاد يهز رأسه بابتسامة ويتابع:

من السنة اللي فاتت .

مروة (مداعبة):

إوعى تقول لي ميس عفاف .

بجاد:

ميس عفاف؟ .. يع .. دي وحشة أوي .

مروة تكتم فمه وهي تنظر حولها في قلق وعلى وجهها ابتسامة شقية

وهي تقول:

هششش .. اسكت لا تسمعك .

مروة تبعد يدها عن فمه ثم تقترب منه وتسأله في همس:

مين اللي بتحبها؟

بجاد (بهمس مماثل):

بنت أمورة أوي عرفتها من سنة ف يوم النيتم اللي فات .

مروة:

عرفتها إزاي؟

بجاد:

قولتلها عايز ألعب معاكي بس هي ما وافقتش .. وف آخر اليوم

قالت لي لو شوفتك السنة الجاية زي النهارده هلعب معاك .

مرورة:

وهي عارفة إنك بتحبها؟

بجاد:

أكيد.. وهي كمان بتحبني.

مرورة:

عرفت منين!؟

بجاد:

مادام ماوافقتش تلعب معايا واتحدثني يبقى بتحبني.

مرورة تنظر له بدهشة عارمة وتسرح مع جملته الأخيرة.



في إحدى الحداثق الخضراء

مرورة تسير فوق المساحة الخضراء الشاسعة وهي تحمل زيتا، وتمسك بيدها بجاد الذي ينظر حوله في اهتمام..

بجاد تتسع عيناه ويشير بيده قائلاً في فرحة وسعادة

بجاد:

أهيه هناك أهيه.

الآن نشاهد العديد من اللقطات بطريقة السلو موشن على نغمات المقطوعة الموسيقية الشهيرة One Man's Dream للموسيقيار Yanni

مروة تنظر إلى الاتجاه الذي أشار إليه بجاد فتشعر بصدمة ودهشة شديدة . . لقد رأت جيتام مع الطفلة التي يحبها بجاد ونلاحظ أنها طفلة جميلة ذات شعر أصفر ناعم وبشرة بيضاء . .

جيتام يقوم برفع الطفلة لأعلى ثم يلقيها بسعادة وحب شديد عدة مرات متتالية، بينما يقفز كلبه في سعادة ومرح وقد راققت له اللعبة . .

مروة ما زالت تنظر غير مصدقة عينيها . .

الآن جيتام يلقي بالطبق الطائر بعيداً فيجري كلبه مسرعاً ليلتقطه ويسابقه جيتام والطفلة للإمساك بالطبق . .

الكلب أمسك بالطبق فبأخذه جيتام من فمه من جديد ويمثل أنه سيقوم بإلقائه في اتجاه فيجري الكلب والطفلة في هذا الاتجاه لكن جيتام يلقيه في اتجاه آخر ويخدعها ثم يجري هو ليمسك بالطبق ويضحك عليهما ساخرًا . .

بجاد يفلت من يد مروة، ويجري نحوهم بحب وسعادة ثم ينضم للعبة ويتسابق مع الطفلة والكلب للإمساك بالطبق الطائر ويسقط بجاد والطفلة في مرح طفولي بريء ثم تتلاقى عيناها في حب . .

جيتام يجري عليهما بقلق ويساعدهما على النهوض، ثم نرى حديثاً صامتاً يدور بين جيتام وبجاد، قبل أن يلتفت بجاد ويشير نحو مروة . .

جيتام ينظر حيث يشير بجاد، فيجد مروة وترتسم الدهشة على عينيها التي تتسع غير مصدقة ما ترى وتتلاقى عيناها . .

جيتام ومروة يسير كل منهما نحو الآخر وكل منهما غير مصدق نفسه ويتأمل الآخر في صمت . .

الآن تلاقى جيتام ومروة فيسلم كل منهما على الآخر . .
جيتام ينظر خلفه حيث يلعب بجاد والطفلة مع الكلب ، ثم ينظر لمروة
بإعجاب متسائلاً:

إنني بتكفلي طفل يتيم؟

مروة تبتسم في خجل وهي تهز رأسها بما معناه
.. (أي نعم) . .

جيتام ينادي على الطفلة التي يكفلها قائلاً في مرح:
تعالى يا مي سلّمي .

الطفلة مي تركض هي وبجاد ، وما إن يصلا حتى ينحني جيتام نحو
مي ويقول لمروة:

أعرفك يا ميس مروة بمى صاحبتى الانتيم .

مي تنظر لمروة بابتسامة شقية وتقول:

مش دي المذيعة اللي إنت حكيت لي عنها؟

جيتام ينظر لمي بإحراج ويشدها من شعرها في الخباثة ويهمس بغیظ
محاولاً ألا يظهر في نبرات صوته:

اخرسى خالص وليكي عندي ساندوتشين زيادة من عند
زيزو .

جيتام ينظر لمروة ويبتسم في محاولة ليداري على جملة مي قائلاً
في مرح:

بريئة جداً زي ما انتي شايفة ومش ممكن حد يوقعها في
الكلام.. مش كده يا مي؟

مي (بخبث):

لو الساندوتشين بقوا ثلاثة.. يبقى كده ونص .
الجميع يضحكون ، فينظر جيتام لبجاد قبل أن ينظر لمي
قائلاً بلهجة خبيثة مماثلة

جيتام:

عسول بجاد.. زي القمر.. (هامساً لمي) ولو الـ3 ساندوتشات
بقوا ساندوتش مش هجيب له سيرة إنتي قولتي عليه إيه .

مي (بتحد):

لأ قول يا خويا.. (موجهة كلامها لبجاد) أنا قولت عليك
أمر يا بجاد وكل البنات هتموت عليك.. أقول أنا بقي؟
بجاد ينظر لمروة بفرحة وثقة وقد ثبتت وجهة نظره ، بينما يضع جيتام
يضع يده على فم مي ويقول لها هامساً

جيتام:

اعتبري محل الساندوتشات كله بتاعك يا حبييتي ، بس أبوس
إيدك ما تفتحيش بقبك .

مروة تقول لجيتام بعتاب:

أخص عليك يا جيتام.. كده برضه تضحك على مي بكلام فاضي .

مروة تحمل مي وتقول لها بحب وحنان

مرورة:

طب او عدها إنك هتجيب لها لعب كثير وتفسحها وتوديها
الملاهي زي ما انا هعمل.

مي (بذكاء وبصوت عالٍ):

برضه مش هقولك أي حاجة.

جيتام يحمل بجاد ويحضنه بحب ويضحك قائلاً بفرحة

جيتام:

حبييتي يا ميوية.. تمرت فيكي التربية والله.

مي تحضن مرورة فجأة ثم تهمس في أذنها

مي:

تعال لي في الدار بتاعتي وانا أقولك كل حاجة.. مش قدامه
يا عبيطة.

جيتام يحضن بجاد حضناً مماثلاً وهو يهمس في أذنه

جيتام (هامساً):

لو عرفتني كل حاجة عن مرورة هجوزك مي.

بجاد (هامساً):

طب عدي عليا بكرة في الدار.

جيتام:

اتفقنا.

مرورة تنزل مي، بينما جيتام ينزل بجاد..

مروة ليجاد:

يالاً بقى يا بجاد نكمل لعب الشوية اللي فاضلين مع زيتا
عشان قربت أمشي .

جيتام (قائلاً لمي):

وأنا كمان يا مي قدامي نص ساعة وهمشي .

بجاد:

طب ما نلعب كلنا .

مي:

لا يا بجاد . . أنا هلعب انا وانت وريكس وزيتا، وجيتام
هيروح يجيب لنا ساندوتشات كبدة إسكندراني محصلتش .

بجاد:

أنا برضه مروة بتجيب لي ساندوتشات كبدة إسكندراني
مالهاش حل . . من واحد واقف على عربية .

مروة تنظر له بغضب وتصيح فيه:

بجاد . .

مي تقول لها بلماضة

مي:

إنتي لسه هتنز عقيله؟ . . يالاً روحوا هاتلونا الساندوتشات مع
بعض وبسرعة عشان جعانين .

مروة وجيتام ينظران لها بدهشة شديدة، بينما تجذب مي بجاد وينطلق كلاهما مع زيتا وريكس دون أن تنتظر ردهما، فيقول جيتام ساخرًا لمروة:

إنني كمان طلع ليكي ف الكبدة المعفنة؟ . . يا بركاتك يا يوم اليتيم .

مروة تنظر للأرض مبتسمة في خجل بينما يشير لها جيتام للأمام قائلاً: اتفضلي يا سنيوريتا .

مروة تسير للأمام ثم يحدو جيتام حذوها ليذهبها إلى بتاع الكبدة .



عند إحدى عربات الكبدة

زيزو صاحب عربة الكبدة يقف على العربة ويقوم بوضع الثوم، ثم يقوم بصب كيس الكبدة في الصينية ثم يضع الفلفل الأخضر والملح والكمون ليخرج دخان كثيف ذو رائحة نفاذة . .

الآن نرى جيتام ومروة وهما يسيران بفعل قوة الشم إذ يمد كل منهما أنفه نحو الرائحة، وما إن يراها زيزو حتى يرفع حاجبيه بدهشة ثم يقول بترحاب شديد .

زیزو:

الأستاذ جيتام والأستاذة مروة مع بعض؟! . ده إيه النور ده كله!

جيتام يقف على العربة ويمد يده ليأخذ أحد الساندوتشات المعمولة
ويقضم منه وهو يقول:

إدينا 12 رغيف بسرعة يا زيزو عشان مستعجلين .

زيزو يقوم بتقليب الكبدة وهو يقول بود وحماسة:
عنيًا .

مروة تفتح حقيبتها لتأخذ منها الفلوس فيمسك جيتام يدها ويقول بصرامة:
إنتي بتعملي إيه؟

مروة (بإصرار):

هدفع حسابي أنا وبجاد وإلا مش هناك .

جيتام (مداعبًا):

ده بدل ما تعزمينا؟

مروة (بحسم):

أعزمك آه لكن تعزمني لأ .

مروة تخرج نقودها وتقف بجوار زيزو وتمد يدها بالفلوس قائلة:

امسك يا زيزو حسابك .

زيزو ينظر لجيتام نظرة ذات مغزي ونرى السخرية على ملامح
جيتام بينما يقول زيزو بحسم:

وفري فلوسك يا أستاذة . . أنا لو كنت أعرف إنك تعرفي
جيتام بيه من الأول . . مكنتش حاسبك طول الفترة اللي فاتت

مرورة (بدهشة):

ليه يعني؟

الآن نرى فتاة جميلة، ولكنه جمال من النوع الشعبي وقد كحلت عينيها الواسعتين ولمت شعرها صغيرة، وارتدت عباءة سوداء، وتحمل على كتفها صندوقاً به عشرات الأزرعة الفينو وتقترب في خفة ودلال نحو عربة الكبدة فينظر لها زيزو بحب ويقول:

زیزو:

أول مرة شوفت فيها عواطف . . نسيت كل العك اللي عكته في حياتي . . وافكرت بس إن صورتها هي الصورة اللي في بالي من سنين ومش لاقى ولا واحدة تشبهها في الحقيقة.

عواطف وصلت لعربة الكبدة، لتضع صندوق الفينو على الأرض بجوار العربة ثم تقف بجوار زيزو لتأخذ الفينو من الصندوق وتضعه على العربة وتقوم بتقطيعه وفتحته، وتلقي نظرة خاطفة على زيزو الذي يتكلم وعلى وجهها ابتسامة واثقة وزيزو يتابع:

حاولت أكلهما . . أفهمها إني دويت في التراب اللي بتمشي عليه من أول نظرة . . لكن ماكانتش حاسة بيا . . روت اتقدمت لأبوها الحاج عبده بتاع الخضار الله يرحمه بس ماوافقتش . . عيطت بالدموع . . دعيت إن ربنا ياخدني .

عواطف تقوم بوضع الكبدة في الساندوتشات وقد راقبت لها كلمات زيزو ونرى في عينيها نظرة رضا وابتسامة سعيدة، بينما يقوم زيزو بمواصلة تقليب الكبدة ببطء وهو ينظر لمرورة ويردف:

وف ليلة م الليالي اللي كانت فيها أبواب السما مفتوحة . .
 بعث لي ربنا أستاذ جيتام اللي حس بيا . . وفهم كل حاجة
 أول ما عدت عواطف من جنب العربية وشاف حالي أتخبط
 إزاي بسببها . .

طفلان صغيران يركضان نحو العربية ويمسكان بعباءة عواطف
 التي تنظر لهما بحب وحنان ، فيلنفت زيزو إليهما ويضع يده على
 كتف عواطف بحب وسعادة وينظر للطفلين بحنان ثم ينظر
لمروة ويستطرد:

وآدينا النهارده معنا عبد الرحمن وأحمد . . عقبالك يا رب .
 مروة تنظر لجيتام بتأثر بينما بيتسم جيتام ويمعن النظر إلى عينيها ،
 فتنفض رأسها لتفريق من التأثير الذي وقعت فيه وهي **تقول لجيتام بتلعثم:**
 يعني حضرتك بتاخذ كبدة ببلاش حق ما وفقت بين قلبين في
 الحلال .

زيزو يترك كتف عواطف وينظر لمروة غاضباً بينما تقوم عواطف
 بلف الساندوتشات وهو **يقول:**

جيتام بيه هو اللي جاب لي العربية دي بعد ما البلدية خدت
 عربيتي القديمة . . ودفع لي مهر عواطف اللي طلبه أبوها
 وماكانش معايا . . وبعد الجواز . . عرض عليا اشتغل عنده
 في المحل بتاعه . . بس أنا قولت له إنني مش بعرف أشتغل
 عند حد . . وحلفت يمين طلاق إنه ما يدفع عندي مليم واحد
 ف ساندوتشاتي طول مانا عايش وحتى بعد ما أموت كمان .

مرودة تنظر لجيتام بخجل وتأثر بينما مازال هو ينظر لعينيها بابتسامة واثقة، وتمد عواطف يدها بكيس به الساندوتشات نحو مرودة .

عواطف:

الساندوتشات يا أستاذة

مرودة مازالت تنظر لجيتام بخجل وتأثر، بينما مازال هو ينظر لها بنفس ابتسامته الواثقة التي تركز على عينيها مباشرة .



في إحدى الحدايق الخضراء

جيتام يأكل آخر قضمة في ساندوتشه، وكذا مرودة، بينما يأكل بجاد ومي ببطء وحولهما الكلب والقطة، وقد مالت الشمس للمغيب فينهض جيتام ويقول وهو ينظر لساعته:

ياللا بقی أنا لازم استأذن . . الحفلة بدأت .

مرودة تنظر لساعتها بصدمة فنكتشف أن الوقت أرف وقد تأخرت عن الحفل فتنهض مخضوضه وتقول بتوتر:

يا نهار أبيض . . ده أنا راکنة عربيتي عند الدار . . مش هلحق أروح آخدها وأرجع ع القناة .

جيتام (ساخرًا):

وماله يا سينيوريتا . . مانا قالب عربيتي تاكس بعد الضهر .

مروة (تنظر له بخجل):

لا كده هبقى Over .. مش كفاية وصلنتي لبتاع الكبدة .

جيتام:

لا مانا هحاسبك ما تقلقيش .. عم عشم مات والمعلم محبوس
ما بيبحث فلوس .. بس هستاؤذك نعدي على المول عشان
عايز أجي ببدلة للحفلة .

مروة (تبتسم وتتابع في دلال):

بصرة .. أنا كمان كنت ناوية أجي فستان .. ولو ما عندكش
مانع يا ريت ترجعني بعد الحفلة للدار عشان آخذ عربيتي .
مي وبجاد ينظران لبعضهما نظرة ذات مغزي ويبتسمان .



سيارة جيتام

مروة تركب سيارة جيتام وتغلق الباب ، وما إن يهم جيتام بتشغيل
السيارة حتى تطل على مروة من النافذة المجاورة لها مندوبة مبيعات
جميلة الشكل .. محجبة .. ترتدي ملابس محترمة ومتواضعة في
الوقت نفسه .. تحمل حقيبة على كتفها ، بينما تحمل في يديها زجاجات
عطور ، وفواحات للسيارات ، وتقول بلهجة من يحفظ معلومات
ويرصها سريعاً في أقل وقت .

المندوبة:

مساء الخير يا فندم .. معانا لحضرتك ..

مروة (مقاطعة):

لا ميرسي مش عايزة .

الفتاة تواصل الكلام وكأنها لم تسمع:

فيه معانا فواحة عربية أصلي سعرها في المحلات 15 جنيه

بنبيعها بـ 10 جنيه وكمان معاها فواحة ثانية هدية .

مروة (بضيق):

لا ميرسي

المندوبة:

في كمان علبة مكياج أصلي ..

مروة (تقاطعها بعصبية):

كفاية بقي .. إنتي ما بتزهقيش؟ .. مش هشتري حاجة

جيتام (مناديًا على الفتاة):

تعالى يا أنسة

الفتاة تذهب إليه وتطل عليه من نافذته فيخرج 20 جنيه يعطيها لها قائلاً

في لهجة مرحة:

معايا ليكي عرض أحسن .. الفواحة اللي بـ 10 جنيه هاخذها

بـ 20 جنيه ومش عايز معاها الهدية .

الفتاة تنظر له بدهشة وتشكك فيتابع قائلاً:

خدي الفلوس وهاتي الفواحة عشان متأخر . . متخافيش مش
هطلب حاجة تاني

الفتاة تعطيه الفواحة وتأخذ الفلوس فيقول لها ساخرًا وهو يغمز بعينه اليمنى:

عشان تعرفي إن فيه زباين كمان أصلي

الفتاة تضحك وتقول بسعادة حقيقية وتأثر:

ربنا يبارك لك .

المدوبة تنصرف بينما يلتفت جيتام لمروة التي تتابع الموقف بدهشة
ويقول لها:

مش عشان هي بنت غلبانة وعايزة تاكل عيش بالحلال
نتعصب عليها . . الله أعلم بظروفها .

مروة (بخجل):

أصل فيه منهم نصابين .

جيتام:

لو كان ليها ف الحرام كانت قلعت الإيشارب ولبست
بنطلون محزق ووقفت هنا برضه ف نفس المكان . .
وساعتها كل زباينها كانوا هيدفعوا ورقة بمية أقل واجب . .
ومش بعيد بالدولار . . الدنيا علمتني إن فيه بنت بميت راجل
وبنت بميت جنيه .

جيتام يدير السيارة ويتحرك بينما مروة تنظر له بإعجاب .



منزل جيتام وشريف

تقطيع بين منزل جيتام وشريف - منزل مروة - إحدى قاعات الفنادق الكبرى - منزل جيرمين

في منزله يجلس شريف أمام شاشة تلفاز LCD يعمل في الريسبشن ويتابع من خلاله احتفالية القناة ، إذ نرى على الشاشة جيتام وهو يجلس بجوار مروة على مقعدين متجاورين ، في حين تنظر مروة لجيتام بنظرة رقيقة تفيض بالرومانسية .

وبالتزامن مع النظرات الحالمة ، كان عمرو دياب يغني على المسرح أغنية «أنا جرالي إيه» وسط عرض استعراضى تتخلله إضاءة ليزر ، وال Fire works المبهرة .

ومن جديد تتلاقى نظرات مروة وجيتام على صوت عمرو دياب وهو يخلب الألباب بصوته الدافئ قائلاً:

مرة واحدة أنا لقيت حواليا نور ملى حياتي . . اتوهمت بيه
نسيت . . كل اللي عدى في حياتي . . أنا جرالي إيه؟ جرالي
إيه؟ الدنيا مالها حلوت ليه؟

بينما تلمع الدموع في عيني شريف وهو يشعر بأن ما يراه على الشاشة بمثابة حكم بالإعدام على قلبه الضعيف الذي لا يحتمل .

وبعد انتهاء الأغنية ، تنتهي معها فقرة الهضبة ، لتسطع الأضواء من جديد ، قبل أن يقف سمير رئيس القناة في منتصف خشبة المسرح بين منصتين عموديتين في كل منهما ميكروفون ، بينما يمسك سمير

ميكروفوناً ثالثاً مستقلاً ويقول بنبرة واثقة وبظرفته الثعلبية المميزة

سمير:

ودلوقت بعد ما سمعنا كلمة المذيعين والمذيعات اللي تشرفت
القناة بوجودهم فيها . . جه الدور على آخر مذيع ومذيعة انضموا
للقناة مؤخرًا . . جيتام الديب ومروة نور الدين ، انفضلوا .

جيتام ومروة يتبادلان ابتسامه خاطفة ثم ينهضان ويتقدمان نحو
المسرح ، قبل أن يصعداه ويسلما على سمير الذي ينتقل ليقف على
جانب المسرح ، بينما يقف جيتام على المنصة العمودية الموجودة على
اليمين ويمسك الميكروفون ، وكذا تفعل مروة التي تقف على المنصة
الأخرى الموجودة على اليسار وتمسك المايك .

مروة تنظر لجيتام وعلى وجهها ابتسامه خجولة وتشير له أن يبدأ الكلام ،
فيبادل ابتسامتها بابتسامه خجولة مماثلة ويشير لها أن تبدأ هي الكلام ،
ويظلان على هذا الوضع فيعطي سمير ظهره للجمهور حتى لا يشاهدوا
ملاح وجهه ، وينظر لجيتام ومروة شزراً بنظرة غاضبة ويجز على
أسنانه ويرفع حاجبيه ليحثهما على الكلام فيضطر جيتام أن يبدأ الكلام
ويمسك المايك وينظر للجمهور بتطلع ورهبة .

وفي منزله ، ينظر شريف لشاشة التلفاز بغضب وغيظ ويتابع كلام
جيتام الذي يقول

جيتام:

مساء الخير عليكم جميعاً . . باختصار ومن غير مقدمات كلنا
مؤمنين إننا كبشر نتعرض لأنواع كثيرة من الوجد

والألم .. ومؤمنين أيضًا إن أصعب وأقوى الأنواع دي ..
هو وجع القلوب ..

التأثر يتضح أكثر على وجه شريف وتلمع عيناه بالدموع مع الكلمة الأخيرة .

أما في المسرح ، فبرى مروة تنظر لجيتام باهتمام وهو يتابع:

لكن الإنسان الذكي لما بيتوجع ف قلبه .. ببحول الوجة ده
لرصيد يشتري بيه الفرحة والسعادة .. ويحمي بيه نفسه من
أي وجع جديد .. أنا بالنسبة لي الحمد لله اتوجعت كتير
أوي .. (بتأثر أكبر) أوي .. من أول ما اتعلمت يعني إيه
حب وأنا بتوجع .. مش بس في فترة الجامعة ولا حتى ف
مرحلة المراهقة ، لأ .. أنا اتوجعت من قبل كده بكتير

الدموع تلمع في عيني مروة وهي تهز رأسها بتأثر وقد جاء
الكلام على الجرح ..

الآن نحن في منزل مروة إذ تتابع والدتها في التلفاز كلام جيتام
باهتمام ، وترى الدموع تبدأ في اللعان بعينيه وهو يستطرد:

في ليلة م الليالي .. وأنا طفل ف KG2 مش جاي له نوم مع إن
الوقت أتأخر .. قومت من على سريري وحاولت ألعب بلعبي
من غير ما حد يحس .. وساعتها سمعت أمي بتقول
لأبوياف أوضتهم .. أنا حلم حياتي إننا نعيش سوا ونموت سوا .

الآن انتقلنا إلى المسرح حيث نشاهد جيتام عن قرب وهو يتابع
بعينين لامعتين:

ضحك أبويا وقال لها نعيش سوا دي مقدور عليها.. لكن نموت سوا فده معناه إننا هنموت موتة بشعة.. اتخضت أمي وسألته بخوف.. اشمعنى؟.. قال لها بنبرة حكيمة.. إن البشر ما بيموتوش موتة جماعية غير في كوارث بتقبض أرواحهم مع بعض.. لكن ما بيحصلش إنهم يموتوا موتة طبيعية ف وقت واحد.. وبعدين إحنا لو اتمنينا إننا نموت مع بعض هنبقى ف منتهي الأناية.. لأننا هنسب عيالنا لو حدهم.

وفي غرفتها الفخمة، نرى (جيرمين) وهي تتابع كلام جيتام في التلفاز وعلى وجهها التأثر، وفي عينيها الدموع اللامعة:

وفي الحفل يتابع جيتام:

سَرَحْتُ أمي ف كلامه وبعدين قالت له.. يبقى أنا اللي أموت الأول.. عشان إنت لو سبقت.. مش هقدر أتحمل.. وكأَنَّ أبواب السما كانت مفتوحة واتفقلت بعد آخر حرف نطقته أمي.. صحيت الصبح ودخلت عليهم.. لقيت أبويا عينه مرغرة بالدموع وهو حاضنها قدام شباك الأوضة المفتوح.. وأمي على وشها ابتسامة باهتة وهي بتقول له بصوت ضعيف.. بص السما صافية إزاي؟.. تحس إنك لو دققت النظر هتشوف ربنا وهو واقف بيبيص علينا من وراها.. وبص أبويا معاها مطرح ما بتبص.. وطولوا في النظر.. ولما رجع بعينه لوشها عشان يظمن عليها.. كانت عيناها فعلاً شايقة ربنا.. وفي أبويا بوعدة وفضل عايش على ذكراها.. وعلموني هما الاتنين يعني إيه حب.. ومن يومها وأنا بدور عليه.. ورغم كل اللي شوفته

من ألم ووجع ف رحلة البحث عنه . . هفضل طول عمري
متأكد . . إن الحب أجمل شيء في الدنيا .

الدموع تنزل ساخنة من عين جيتام دون أن يدري بينما يصفق له
الجمهور بشدة .

وفي منزله ، تنهمر الدموع من عيني شريف أمام التلفاز وتقترن
بدموع جيتام . .

وعلى المسرح ، ينظر سمير إلى مروة بتأثر ويشير لها أن تبدأ بالكلام
فتهز يدها بما معناه (لا) وهي غير قادرة على الكلام وقد التمعت عيناها
بالدموع ، فينظر لها شزراً ويجز على أسنانه ليحثها على الكلام .

عدنا إلى منزل شريف الذي يتابع الموقف بحزن عميق
وجرح شديد وهو يرى دموع مروة وقد أفلتت على الشاشة
وبدأت في الانهماك من عينيها فتدير وجهها بعيداً عن
الكاميرات وتدفن وجهها بين راحتي يدها وهي تصرخ:

ابعد الكاميرا عني يا أستاذ سمير . . مش عايزة حد يشوفني
وأنا بعيط . . مش عايزة حد يشوف دموعي أرجوك .

وفي منزل والدتها التي تتابع الموقف تنزل دموع الأم ساخنة ،
حتى إنها تمسك الريموت كنترول وتصوبه نحو التلفاز لتغلقه ،
في نفس اللحظة التي يلقي فيها شريف الريموت كنترول بعيداً
ونحن نرى التلفاز مغلقاً قبل أن يضم ركبتيه إلى صدره ويضع
عليهما جبهته ويكي في حرقه شديدة .



أمام البرج الذي يقيم فيه جيتام وشريف

جيتام يركن سيارته أمام البرج الذي يقيم فيه، ويرى أحدهم ينام على المصطبة الموجودة عند باب البرج وقد وضع رأسه الذي يغطيه آيس كاب بين ركبتيه بحيث لا نعرف من هو.

جيتام يغادر سيارته ويصعد سلالم المدخل بخطوات منهكة حزينة فيرفع الرجل رأسه ويتطلع إلى وجه جيتام بعينين محمرتين.. إنه عم فكري الذي يقول بصوت ضعيف واهن

فكري:

إيه التأخير ده كله يا ابني.. إنت مخلص الحفلة بقالك 3 ساعات.

جيتام (بدهشة):

وإنت عرفت منين؟

فكري:

شوفتك ف التلفزيون.. وأول ما الحفلة خلصت نزلت هنا استناك عشان عايزك

جيتام يتركه ويدخل من باب العمارة وهو يقول بضيق:

بعدين يا عم فكري.. مش وقت كلام دلوقت خالص

الآن نرى وجه جيتام الحزين يدخل البوابة لكننا نسمع صوت عم فكري يتردد من خلف جيتام بنبرة حزينة

فكري:

بتحبك

جيتام يتجمد في مكانه من الصدمة ثم يستدير ببطء وبطريقة آلية نحو عم
فكري الذي يتابع:

لكن مش هتبقى ليك

جيتام يقترب من فكري ثم يجلس على المصطبة ويقول بقلق ولهفة:

هي مين دي اللي بتحبني؟ .. وليه مش هتبقى ليا؟

فكري يتطلع إلى عينيه وينظر لها بقوة وتركيز وهو يضغط
على حروفه

فكري:

إنت فاهم قصدي كويس

جيتام ينهج وقد شعر بالرغبة والخوف ، ويتطلع إلى عيني عم فكري
الذي يتابع:

كل حاجة كانت باينة زي الشمس .. بس اللي إنت
ماتعرفوش .. إنها تخص واحد تاني مش هيسمح لك بكده
أبدأ لحد آخر يوم ف عمره .. عشان إنت بالذات من وجهة
نظره ما تنفعهاش

جيتام تتسع عيناه ويقول بقلق وتوتر لا مثيل له:

هو مين ده؟



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

فكري (رافعًا رأسه بخيلاء):

أنا

جيتام (بدهشة):

إنت؟

فكري:

أيوه أنا.. كنت فاكرنى نايم على ودانى؟.. دي ديلها وقف
عليك أول ما شافتك في التلفزيون يا أستاذ

جيتام (غير مصدق نفسه):

هي مين دي؟

فكري (بصرامة وتحدي):

ريني قطتي الإنتيم.. مش هسمح لحد ياخدها مني أبدًا..
إنت فاهم؟

فكري ينهض من على المصطبة ويترك جيتام الذي ينظر له بدهشة،
ويدخل من باب العمارة ثم يستدير ملوحًا بسبابته في صرامة

فكري:

أنا بحذرك.. وقد أذعر من أعور

فكري يستدير ويدخل من باب العمارة بخيلاء بينما ينظر له جيتام
بدهشة قبل أن يبتسم بحزن.



شقة جيتام وشريف

جيتام يدخل المنزل حيث الرئيسيشن المظلم، فيشعل الإضاءة الخافتة، ويدخل بخطوات بطيئة حزينة حتى يسمع صوت شريف الصارم من خلفه

شريف:

استنى عندك

جيتام يلتفت له فيجده جالساً على الكنبه في هيئة مزرية حيث تملأ الدموع وجهه، وشعره منكوش، بينما يحضن ركبتيه المضمومتين إلى صدره، فيشعر جيتام بالدهشة ويقول في حيرة

جيتام:

إيه ده؟ اللي عمل فيك كده.. أمك هتتجوز تاني واللا إيه؟

شريف ينهض ويتجه نحوه مترنحاً كسكير أزاح نصف البار بمفرده، ثم يقول في حزن:

بتحبها.. مش كده؟

جيتام يشعر بالقلق فيتساءل بسخرية ليهرب من السؤال:

أمك؟

شريف (بصرامة):

إنت فاهم قصدي كويس.. وهي كمان بتحبك.. لكن مش هتبقى ليك.

جيتام (بلهجة مراوغة):

طبعاً مش هتبقى ليا.. عم فكري حلف إن ريني هتفضل
طول عمرها ملكه حتى لو ديلها وقف عليا كل ما تشوفي.

الدموع تلمع في عين شريف قبل أن تنزل دمعة ساخنة وهو
يقول بنبرة صوت تسلل إليها ضعفه البشري ويجاهد ليخفي
هذا الضعف:

أنا بتكلم عن مروة يا جيتام.. زميلتي وزميلتك.

جيتام (بدهشة):

زميلتك؟

شريف:

طول عمري بسمع إن التاريخ بيعيد نفسه.. لكن محسّش
بالجملة دي قد النهاردة.. للمرة الثانية أنا وانت نحب نفس
الإنسانة.. وللمرة الثانية أكون أنا اللي حبيت الأول وإن
واخذ الموضوع هزار ويقلب معاك بجد

جيتام (مصدوماً):

إوعى تقول لي للمرة الثانية كمان حاولت تضرب أسافين فيا
من ورايا وانتقلبت عليك

الدموع تنهمر أكثر من عين شريف وقد ظهر الضعف والتخاذل في
نبرة صوته وهو يواصل.

شريف:

كل اللي أقدر أقولها لك إنها ممكن تضع منا للمرة الثانية
وتروح لواحد غريب .. أنا بحذرك من أولها عشان
مانبنيش أنا وانت صداقتنا من أول وجديد على حب مهزوم
زي المرة اللي فاتت .

جيتام (بغضب):

إنت اللي طول عمرك مش دوغري .. لما إنت حبيتها قبل
مني وشوفنتي بتسلى ، ليه ماحاولتتش تلحق الموضوع قبل
ما يتطور .

شريف (بخجل):

استعيبت نفسي أواجهك على موضوع مش في دماغك ..
واتكسفت نشد مع بعض عشان خاطر بنت .. أثاريني بعيد
الماضي اللي كنت فاكر نفسي بهرب منه .

جيتام:

المرة اللي فاتت عملت كده وإحنا مش أصحاب .. لكن المرة
دي حق الصداقة كان يلزمك إنك تصارحني .

شريف:

خوفت الكلام في الموضوع ده يقر بكم من بعض .. قولت
مادام هي كده كده مش ف دماغك يبقى من حقي أبعد بينكم
أكثر عشان أقرب أنا .. كان كل همي أحذرهما منك ومن
الأعيبيك .. وأنا شايف الموضوع بالنسبة لك مجرد رهان

لا راح ولا جه .. لكن بالنسبة لي كان حياة أو موت ..
 (يصمت قليلاً ويتابع بدموع ساخنة أكثر) مش عارف ليه
 طول عمري بلاقي الناس الصح في الوقت الغلط .

جيتام (بتأثر):

عشان إنت ياما ضيعت الوقت الصح مع الناس الغلط .

يقرب منه شريف ويمسك يديه ويقول بتضرع .

شريف:

جيتام .. لو الموضوع بالنسبة لك لسه ف أوله .. أبوس
 إيدك تشيله من دماغك وتديني فرصتي مع الإنسانية الوحيدة
 اللي قلبي اختارها .

جيتام (بحيرة):

ولو الموضوع دخل خلاص في الجد ومش هقدر؟

شريف (بحيرة ماثلة):

يبقى مفيش قدامنا غير إن كل واحد يحاول .. بس فكر ولو
 للحظة واحدة .. إن التاريخ فعلاً ممكن يعيد نفسه للنهاية ..
 وتضيع منا إحنا الاتنين .

جيتام ينظر لشريف بحيرة وتأثر



مكتب شريف ومرورة في الجامعة

مرورة تجلس على مكتبها تتطلع إلى جهاز اللاب توب المفتوح أمامها في شرود، ونرى في عينيها حيرة شديدة تنم عن تفكير وتضارب شديد في أعماقها..

شريف يدخل المكتب بخطوات بطيئة تدل على أنه يشعر بالقلق والخوف داخله.. نظراته مصوبة عليها.. يقترب منها في توتر وتحفز بينما هي لا تشعر به.. يميل نحوها ليصبح وجهه في مواجهة وجهها قائلاً بابتسامة مرتبكة..

شريف:

صباح الخير يا مرورة

مرورة تظل على نظرتها الحائرة وتطلعها إلى اللاب توب، لتجيبه دون أن تنظر إليه

مرورة:

صباح النور

شريف يجذب مقعداً ويضعه إلى جوارها ثم يجلس إلى اليسار وهو يقول لها في ترقب:

إيه مالك؟

مرورة تنظر إليه بصرامة وتحفز وتطيل النظرة وكأنها تسبر أغواره وتغوص في أعماقه، ثم تعود للتطلع إلى اللاب توب بنفس الحيرة

وهي تقول بلهجة خافتة:

مشكلة كده بحاول ألاقي لها حل

شريف:

طب ما تحكيها لي يمكن أقدر أساعدك

تلنتف إليه وترمقه بنفس النظرة وتطيل النظرة نوعًا ما، ثم تقول وهي
تضغط على حروف كلماتها:

تفتكر لما احتجت مساعدتك قبل كده وصلت لحل؟

شريف ينظر إلى عينيها نظرة مباشرة بها مزيج من التحدي والقلق قبل
أن يقول:

لو كل مشكلة بتتحل بمجرد ما اللي حوالينا يساعدونا بأرائهم
ماكانش حد غلب.. الجزء الأصعب في الحل إننا نقدر ننفذ
الكلام اللي بيتقال لنا.

مروة (بلهجة ذات مغزي):

ده لو اللي بيتقال لنا نصيحة كاملة.. مفيهاش حاجة ناقصة

شريف (بحدة):

وأنا هقول لك حاجة ناقصة ليه؟ كل اللي حبيتي تعرفيه أنا قولته

مروة (بتحد):

لأ مش كله.. إنت ماعرفتنيش إنه بيكفل طفل يتيم.. ولا إنه
بيساعد الغلابة.. ولا إن والدته اتوفت وباباه رباه هو وأخته
قبل ما يسافر معاها دبي بعد ما اتجوزت.

شريف يصمت وهو يتطلع إلى عينيها بضعف وقد شعر بالخوف قبل أن
ترتعش خلجاته وهو يقول:

لاحظي إنك قولتي لي أنا عايزة أعرف كل كلمة قالها عني . .
مش كل كلمة عن حياته اللي كنتي مبيينة إنها ماتهمكيش

مروة تباغت بإجابته وتشعر بالحرج فتنظر له بعينين زائغتين وهي
لا تعرف ماذا تقول قبل أن نسمع صوت جيتام وهو يقول بمرح:
هتفضل طول عمرك خايب في تعبيرك عن مشاعرك .

شريف ومروة ينتفضان بمجرد سماع صوت جيتام ويلتفت كلاهما
إلى مصدر الصوت فيجدان جيتام واقفاً على عتبة باب المكتب وعلى
وجهه ابتسامة مرحة قبل أن يدخل ويتقدم نحوهما بثقة ومرح ثم يقول
بمجرد أن يصبح أمامهما

جيتام:

قولها يا أخي إنك معجب بيها وريحنا . . فلقتنا ليل نهار
بسيرتها اللي ماوراكش غيرها

شريف ومروة ينظران له بذهول ، ثم يخرج شريف عن ذهنه ويقول
بلهجة غاضبة محاولاً أن يسيطر على الموقف

شريف:

جيتام . . إيه اللي إنت بتقوله ده؟ . . إنت إيه اللي جابك أصلاً؟!!

جيتام (بثقة):

مش إنت قولت لي إمبراح أنا هقول لها بكرة إني بحبها

وهيحصل لي حاجة لو طلعت ما بتحبنيش .. أنا جاي انقذك
عشان كان قلبي حاسس إنك هتقف تنتح زي ما أنا شايفك
دلوقت .. صاحبك بقى وأدري واحد بيك .

مروة تنظر لجيتام بذهول غير مصدقة عينيها ولا أذنيها، وتلتمع
الدموع في عينيها وهي تقول:

مروة (بغضب):

وماحيطتلوش خطة ليه بالمره عشان يوقعني ف هواه؟
ما إنت اتحدثني قبل كده ع الهوا ومش بعيدة عليك .

جيتام بيتسم وينظر إلى عينيها نظرة لا مبالاة ويقول ساخرًا:

الكلام ده كان قبل ما نبقي زمايل وصحاب .. لكن دلوقت
ليكي عليا حق الصحوبية .. هو الصاحب ليه عند صاحبه إيه؟

مروة لا تجيب وترمقه بنظرة طويلة وكأن عينيها تسألها في استنكار
(انت بتتكلم جد؟)، لكن شريف يقطع نظرتها وصمتها وقد أكسبه
الموقف جرأة وثقة فيقول وهو يتطلع إلى عينيها بحب وحنان

شريف:

أنا فعلاً بحبك يا مروة .. ووالله العظيم هيحصل لي حاجة
لو قولتي لأ؟ .. أينعم ماكنتش أحب أقولها لك بالطريقة دي
بس يمكن فعلاً جيتام لو ماكانش جه مكنتش هقدر أقولها ..
إنتي مش متخيلة رفضك للموضوع ده ممكن يعمل فيا إيه .

مروة تنظر لشريف بحيرة وصدمة، ثم تتطلع إلى جيتام وشريف

وتنقل نظرها بينهما قبل أن تنصرف لنرى الصدمة على وجهها وهي تغادر المكتب بينما نرى خلفها جيتام وشريف قبل أن يقول جيتام ساخرًا وهي على عتبة باب المكتب

جيتام:

عليكي واحد.

الفرحة الشديدة ترسم على وجه مروة وتستدير إليه بسعادة فيتابع ساخرًا:

لاب توب كنتي ناسياه .

فترمه بنظرة فيها غضب الدنيا كله ثم تنصرف غاضبة دون أن تأخذ اللاب توب ، فينظر شريف لجيتام بتوتر وحيرة فيلكزه جيتام في كتفه ويدفعه للأمام صائحًا فيه بحماس .

جيتام:

وراها يا مغفل . . إنت لسه هتبص لي؟!

شريف ينصرف مسرعًا خلف مروة ، وما إن يختفي من المكتب حتى ترسم ابتسامة حزينة على وجه جيتام ثم يجلس على مكتب مروة وينظر إلى اللاب توب ويقول له ساخرًا

جيتام:

شوفت يا عم البني آدمين بيعملوا إيه ف بعض؟ عمومًا أديني عملت اللي عليا .

نسمع صوتاً معدنياً يقول:

Stupid

جيتام ينظر إلى اللاب توب بدهشة ويلكزه في غضب قائلاً

جيتام:

احترم نفسك .

الصوت يتكرر من جديد .

الصوت المعدني:

Stupid

جيتام يغلق مفصل الجهاز في عنف مردداً في غيظ:

اخرس

الصوت المعدني يتكرر من جديد:

Stupid

جيتام يصرخ بغيظ وهو يفصل البطارية من الجهاز فينطفئ تماماً ،
ورغم ذلك نسمع الصوت المعدني

Stupid

جيتام يرفع اللاب توب ويهم بكسره لكنه يشعر باهتزازة قوية في جيبه
فيخرج الموبايل ليكتشف أنه هو الذي يردد ذلك الصوت ، وقد ظهر
اسم شريف على الشاشة ، حيث خصص له جيتام هذه الرنة ، ليتمتم

جيتام ساخرًا:

هو انت؟

ثم يضغط زر الرد قائلاً:

مش تقول إن انت اللي Stupid . . اللاب توب كان هيروح فيها .

فيتساءل شريف بعصبية

إنت غبي يالا؟

جيتام:

لا Stupid

ص . شريف:

طب انزل بسرعة عشان عايزك .

جيتام يغلق الموبايل ويضعه في جيبه ثم ينظر للاب توب قائلاً في
اعتذار وأسف:

شات داون بقي . . مانجيلكش في تنزيل ويندوز .

جيتام يغادر المكتب ومن خلفه اللاب توب لكننا نسمع مرة أخرى
الصوت المعدني يتكرر:

Stupid

جيتام يلتفت خلفه في دهشة .



في سيارة شريف

شريف يقود بعصبية وتوتر بينما يقول جيتام الذي يجلس إلى جواره

جيتام:

طب يا عم قلقان ليه؟

شريف (بعصبية):

عشان مفيش ولا مرة بنت قالت لي هفكر وأرد عليك غير
وكان الرد خرينا أصحاب .. بكرة تلاقي الأحسن مني .

جيتام يرفع ذقنه للأمام مبتسماً بثقة وقد أصدر صوتاً من فمه بما معناه
(لأ) ثم يقول بنفس ابتسامته الواثقة:

المره دي غير كل مره

شريف (عاقداً حاجبيه بتوتر وعصبية):

ليه يعني؟

جيتام (بثقة):

عشان المره دي أنا معاك ومش هسيك

شريف ينظر إليه بتشكك وريية حتى إنه ينسى أمر القيادة تماماً .



منزل مروة

مروة تدخل منزلها بخطوات مسرعة بحثًا عن والدتها وفي عينيها الدموع .. تسرع الخطى وتقول بلهجة متناغمة

مروة:

ماما .. ماما

مروة لا تجد رداً فتتجه نحو غرفة نوم والدتها وقد تلالأت الدموع أكثر في عينيها وتضع يدها على مقبض الباب وتفتح بعنف ولوعة وهي تقول بصوت اقتراب من البكاء

مروة:

ماما

ما إن تفتح الباب حتى تجد شقيقها حسام في حضن والدتها يبكي بنحيب شديد بينما تمسح الأم على شعره وهي تقول بصوت باك:

ماتخافش يا ابني .. كل مشكلة وليها حل إن شاء الله

مروة تتسمر في مكانها وتبتلع أحزانها وآلامها وهي تسأل بدهشة وقلق بينما مازالت الدموع تتلألأ في عينيها

مروة:

في إيه؟

حسام مازال دافئاً وجهه في حضن أمه، بينما تلتفت لها الأم بدموع باكية وتقول بصوت حزين متهدج:

شركة أخوكي سرحت 75 شاب بسبب الأزمة المالية ففسخ
خطوبته

مروة تتأمل المشهد وتنزل دموعها الساخنة على وجنتيها بينما يردد
أخوها الذي يبكي في حضن أمه وكأنه لا يريد أن يرى أحد دموعه
حسام:

طول عمري كده . . ماليش حظ في الشغل ولا الحب
الدموع تنهمر أكثر من عيني مروة، وقد جاءت الكلمات على الجرح
وهي تردد:

مروة:

ربنا مش هيسيننا . . أكيد رحمته أكبر من كده بكثير،

ثم تنظر لأعلى وكأنها تناجي الله قائلة في حرقة ولوعة

مروة:

يارب

ثم تداري وجهها وتنصرف بينما مازالت الأم تمسح بشعر ابنها غير
شاعرة بما تعاني منه مروة .



حجرة نوم مروة

مروة تدخل غرفتها مسرعة، ثم تغلق بابها بالقفل الداخلي حتى
لا يدخل عليها أحد، ثم ترتمي على سريرها وتبكي في حرقة شديدة

ولوعة، وقد دفنت وجهها في الوسادة، بينما نسمع صوت حنجرتها المنحورة من فرط التأثر والبكاء.



داخل مكتب جيتام في كافيته «Emotions»

جيتام يدخل مكتبه المظلم ويضيء إضاءته ثم يتطلع إليه، وإلى ترابيزة مايكرو وسوفت حساسة اللمس وترتسم على وجهه ابتسامة حزينة، قبل أن يتجه إلى مكتبه ويجلس عليه ثم يضيء شاشة الكمبيوتر المعد سلفاً على وضع الـ Sleep ثم يحرك الماوس ويجعل الجهاز يعمل على وضعه الطبيعي، وينظر إلى شاشته فيجد شريف أون لاين على برنامج الـ Skype، فيضحك ساخراً وهو يحدث نفسه قائلاً:

جيتام:

وانت من أمتي بتشغل الـ Skype يا سفاح النساء؟

ثم يلبس جيتام سماعة الهيدفون ويضغط بالماوس على أيقونة الاتصال فنسمع صوت جرس الاتصال قبل أن نسمع صوتاً غريباً عن شريف يقوم بالرد

الصوت الغريب:

أيوه مين؟

جيتام:

إيه يا ابني إنت مش عارف الـ Account بتاعي واللا إيه؟

الصوت الغريب:

مش واخذ بالي .

جيتام:

أنا جيتام يا دونجوان عصرك .

الصوت الغريب (بدهشة):

جيتام مين؟

جيتام (غاضبًا):

هو إنت شريف ولا هاكر ابن كلب واخذ الـ Account بتاعه؟

ص . شريف (ضاحكًا):

أنا شريف يا ابني بس بشتغلك .

جيتام (ساخرًا)

آه مانا عارف بس قولت فرصة أشتمك .

ص . شريف:

بيعجبني فيك احترامك .

جيتام:

بتعمل إيه أون لاين يا صايع؟

ص . شريف:

أبدأ كنت داخل أقرى الجرايد ع النت .

جيتام:

ما انت طول عمرك بتخش تقراها من غير ما تفتح الـ
Skype .. مروة أون لاين؟

ص . شريف (بدهشة):

آه عرفت منين؟

جيتام (ساخرًا):

يا أم ذكاءك .. كانت محتاجة أصلها نباهة وتفكير عشان أفهم

ص . شريف (بشك):

هي أون لاين عندك؟

جيتام:

أنا مش معايا الـ Account بتاعها أصلاً . . خد بالك ما تتكلمش
معاها ف أي حاجة وخليك هادي وعلى طبيعتك ويستحسن
ما تطولش ف الكلام .

ص . شريف (بشك):

أومال انت كنت داخل تعمل إيه ع النت؟

جيتام:

إنت مالك بتسأل كده كأنك ماتعرفش إني عندي جروب ع
الفيس بوك بتابع من عليه الميمبرز وجمهور البرنامج .

ص . شريف:

طب ادخل بقى بالمره وشوف اللي حصل في البورصة . .
بيقولك معظم الأسهم اتطربقت وبقث في الأرض .

جيتام:

آه مانا عارف وتلات تربع فلوسي راحت الحمد لله . . خليك
إنت بس في اللي بتعمله .

ص . شريف:

خلاص ماشي . . أنا هسيك بقى عشان ورايا شوية حاجات
اعملها . . مش عايز حاجة قبل ما امشي؟

جيتام يعقد حاجبيه وهو يقول بضيق:

جيتام:

هعوز إيه من ع التت يعني؟ . . اتنين كيلو لبن؟ . . سلام .

حسين يدخل حاملاً فنجان الاسبريسو قائلاً في احترام

حسين:

أحسن اسبريسو مخصوص ، عاملهالك بنفسى يا أستاذنا .

حسين يضع الكوب أمام جيتام الذي يخلع الهيدفون ، ثم يقف حسين
متطلعاً إلى جيتام بابتسامة بلهاء .

حسين:

عندي ليك مفاجأة جامدة آخر حاجة .

جيتام (ضاحكاً بسخرية):

الله عليك . . قول . . ما الأخبار السعيدة اللي زي وشك ما
بتجيش غير بالجملة

حسين (بفرحة ، إذ لم ينتبه لسخرية جيتام):

هو فيه أخبار سعيدة ثانية يا باشا وصلتك النهاردة؟

جيتام (ساخرًا):

آه بس مش هقدر أقول لك عشان الحسد .

حسين (ضاحكًا ببلاهة):

طب ربنا يزيد وبيبارك . . (بحماس شديد) والحمد لله جالنا

واحد بيعمل ساندوتشات كبدة إسكندراني هيشغل عندنا . .

شوفت بقى الحظ؟

جيتام (ساخرًا):

يا ما انت كريم يا رب . . مش تقول يا راجل . . أهو أنا كده

كل مشاكلي اتحلت .

حسين (ضاحكًا ببلاهة):

مش قولت لك؟ . . وكمان واقف برة مستني الإنترنت عشان

تتأكد إنه كبدهانجي مالوش مثيل .

جيتام:

وكمان كبدهانجي؟ . . ده كده بقى لازم تخليه يدخل بسرعة .

حسين يلتفت نحو الباب ويصيح بسعادة وحماس:

حسين:

ادخل وبان عليك الأمان .

جيتام (ساخرًا):

وكمآن جن بعد الضهر؟ .. ده كتير عليا يا حسين .

حسين:

اصبر يا باشا . . إنت لسه شوفت حاجة .

يدخل الشاب وقد أوقف شعره بطريقة الإسبايكي رغم هيئته الصعيدية
فينظر له جيتام ساخرًا

جيتام:

إيه يا عم الشعر الجامد ده . . حاطط عليه فياجرا والأ إيه؟

الشاب:

ده جيل يا باشا .

جيتام (ساخرًا):

رِوش .

الشاب:

خدامك سيد شمعة يا باشا .

جيتام:

شمعة؟ وإنت إيه اللي جابك النهارده . . إنت معادك تيجي ف أعياد
الميلاد بس .

سيد:

تحت أمرك يا باشا في كل المناسبات .

جيتام (ساخرًا):

وأنا فرحان ببيك أوى وحاسس إنك جاي تنورنا هنا . . اسم
الدلع بتاعك إيه بقى . . أوف يح؟

حسين يضحك ويهم بضرب سيد على ظهره كنوع من المرح فيصيح
فيه جيتام محذرًا:

حاسب يا حسين .

حسين (متراجعا في قلق):

في إيه يا فندم؟

جيتام:

مش للمس ده بدل ما يلسعك . . يالآ خده وعرفه تفاصيل
الشغل . . اتفضلوا . . (يميل نحو سيد وينفخ ساخرًا) فففف .

حسين يصحب الشاب وينصرفان ، بينما يتابعهما جيتام بابتسامة
حزينة ، قبل أن يرن هاتفه المحمول فيلتقطه وينظر إلى شاشته عاقدًا
حاجبيه في دهشة قبل أن يرد قائلاً

جيتام:

أيوه مين؟

فيأتيه صوت مروة برقة وخجل قائلة:

أيوه يا جيتام أنا مروة .

جيتام يبعد الموبايل عن أذنه وينظر له في دهشة .



حجرة مروة

مروة تجلس على سريرها وقد ارتسم الخجل والارتباك على ملامحها وهي تعبت بشعرها وتضع خصلة خلف أذنها وهي تقول:
أنا اتصلت ف وقت غير مناسب؟

ص . جيتام:

لا أبدأ يا مروة .. خير؟

مروة تصمت قليلاً وكأنها لا تقوى على الكلام ثم ترتعش خلجاتها .

مروة:

آه .. أنا كنت عايزة اتكلم معاك ف موضوع لو وقتك يسمح .

ص . جيتام:

يسمح طبعاً .

مروة:

يمكن أنا مش صاحبك زي شريف .. بس متهاياً لي إحنا بقينا
زمايل دلوقت ف قناة واحدة .. والزمالة برضه ليها حقوق
زي ما انت قولت .. مش كده والّا إيه؟

جيتام (بخبث):

أكيد .. وأخويّتي لشريف ليها علياً حقوق كمان .. وزمالتك
ليه برضه ليها عليكي حقوق .

مرورة تعقد حاجبيها في غيظ ممزوج بالحرص وتصمت قليلاً قبل أن تقول:

أنا هسأل سؤال واحد بس . . بحكم خبرتك في الحياة ودرائتك بشريف أكثر مني . . إنت شايف إن أنا وهو مناسبين لبعض؟

ص . جيتام:

إنتي شايفة إنك محتاجة إجابتي؟

مرورة:

مش فاهمة .

جيتام:

لأ إنتي فاهمة . . وبعدين ما اعتقدش إن أنا لوحدي اللي عنده خبرة في الحياة . . وإلا على أي أساس بتقدمي النصيحة لجمهور برنامجك .

مرورة (بخجل):

مفيش أسهل م النصيحة طول ما انت باصص م البلكونة وكاشف كل حاجة من فوق . . لكن أول ما تنزل الشارع بالليل بتبقى حاسس إنك هتعمل حادثة عشان مش شايف غير يادوب قدامك .

جيتام (بحزن):

ف الحالة دي بيقى أنا كمان محتاج اللي ينصحنى .

ص . مرورة:

ليه؟

جيتام (بحزن ساخر)

عندي عشا ليلي .

مروة (بغضب):

ما تتكلم Direct يا جيتام وتجيّب م الآخر .. ماليش انا ف
الف والدوران وشغل التمثيل بتاعك ده .

جيتام (ساخرًا):

أنا بمثلّ؟ لعلمك بقى انا أكثر واحد تلقائي ف الدنيا دي
كلها .. ده حتى من كتر تلقائيتي ببقى ماشي تلقائي على
روحي ف الشارع كده ومش عارف أعمل إيه ف نفسي .

ص . مروة (غاضبًا):

أنا على فكرة ما بهزرش دلوقت وبتكلم جد .

جيتام:

لا ما تقوليش .. معقولة والله ما بتهزرش؟ وكمان
بتكلمي جد؟ دي معجزة يا جدعان .. أول مرة أشوف
واحدة ما بتهزرش وبتكلم جد ف وقت واحد .. إنتي باباكي
وما متك قرايب؟

مروة تضحك رغمًا عنها فنسمع صوت جيتام المرح:

ص . جيتام:

بيقوا قرايب .. مفيش حاجة بتستخبي .



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

مروة تبتسم بسعادة وفي عينيها شفاوة وفرحة ثم تصمت قليلاً قبل أن
تقول بلهجة ذات مغزى:

عموماً ميرسي على المكاملة لأنني بجد عرفت منها حاجات
كثير . . تصبح على خير .

ص . جيتام (بلهفة):

مروة . .

مروة (بلهفة مماثلة):

نعم .

جيتام (يصمت قليلاً ثم يقول بحزن):

لو لفيتي الدنيا كلها مش هنلاقي أحسن من شريف .

الدموع تلمع في عينيها ونرى في وجهها الصدمة ثم تحاول أن تتمالك
نفسها وهي تقول غاضبة:

آه . . ما هو ده اللي انا فهمته . . تصبح على خير .

جيتام (بحزن):

وإنتي من أهله .

جيتام يغلق الموبايل ثم يبعده عن أذنه بحزن وبطء شديد وهو يحك
وجهه قبل أن تسقط يده التي تمسك الموبايل على فخذه كأنه جثة
فقدت الروح .



خارج شقة مروة

جرس منزل مروة يضرب فتتجه والدتها إلى الباب لتفتحه، وما إن تفتحه حتى تجد شريف مرتدياً بذلة شيك وقد حمل بوكيه ورد فخماً، فتنظر له بدهشة بينما يبتسم ابتسامة رقيقة قائلاً:

صباح الخير يا فندم .

منى:

صباح النور .

شريف:

لازم حضرتك دكتورة منى والددة مروة .

منى (يتراقص على وجهها شبح ابتسامة):

خير!

شريف:

أنا شريف زميلها في الجامعة . . وجاي أطمئن عليها عشان ماجاتش النهارده وموبايلها مقفول .

منى (بسعادة وفرحة):

أهلاً وسهلاً يا بني . . اتفضل .

شريف يتقدم داخل الشقة بينما تغلق الأم الباب .



ريسبشن منزل مروة

شريف يدخل الشقة ثم تقوده الأم إلى الريسبشن وتقول له

منى (بسعادة وفرحة):

اتفضل اقعد يا دكتور .

شريف:

ميرسي .

شريف يجلس فتتابع الأم بابتسامة رقيقة:

منى:

عن إذنك ثواني .

شريف:

اتفضلي يا فندم .

الأم تعطيه ظهرها ثم تعود لتلثفت إليه وتقترب منه بابتسامة غريبة،
فينظر لها بابتسامة حائرة قلقة، فتقترب من أذنه فيشعر بالقلق ويسحب
رأسه بعيداً عن فمها، لكنها تقترب أسرع من أذنه فيمسك أذنه بخوف
قائلاً في توتر

شريف:

فيه حاجة يا طنط؟!!

الأم تزيح يده عن أذنه ثم تضع فمها بجوار أذنه وعلى وجهها ابتسامة
كوميديّة وهي تقول:

منى:

معلش يا ابني أنا زي امك .. ولما تسمع مني الملحوظة دي
أحسن ما تسمعها من مروة ..

شريف (بخوف):

ملحوظة إيه؟

منى (هامسة):

سوستة البنطلون مفتوحة.

شريف تتسع عيناه وينظر للسوستة بإحراج ، بينما تعتدل الأم وتبتسم
وهي تقول في أمومة حنون:

أنا هروح أصحي مروة مسافة ما تقفل السوستة .

تنصرف متجهة نحو غرفة مروة .



غرفة مروة

الأم تدخل غرفة مروة بسعادة ، فتجد مروة غارقة في نوم عميق ،
فتهزها بفرحة وحماس قائلة بسعادة:

مروة

مروة لا ترد فتهزها الأم حتى توقظها قائلة بصوت عال نوعًا ما:

مروةةةة ..

مروة تسحب الغطاء على وجهها بحيث تغطي ملامحها ، فتحاول الأم

جذبه دون جدوى فتسحبه من ناحية قدميها وترغزها في قدميها
صائحة بحماس

منى:

قومي يا مروة.. الموزّ جه لغاية عندك يسأل عليكى .

مروة تقف فجأة مفزوعة في منتصف السرير والغطاء مازال يغطيها
بحيث تبدو مثل الشبح فتقول لها أمها بدهشة:

منى:

.. مروة ..

مروة تلقي الغطاء على أمها ليغطيها وتبدو أمها مثل الشبح فتقول بضيق
من تحت الغطاء

منى:

الله الله.. إيه الحركات دي؟

مروة تقفز من السرير وتمسك بكتفي أمها وتقول باهتمام:

هو اتكلم معاكى ف حاجة؟

منى (من تحت الغطاء):

طب افتحي الأول وأنا أقولك.. هفضل واقفة ع الغطا كده
كثير؟

مروة تنتزع الغطاء عن أمها وهي تقول بحماس:

قال لك إيه؟

منى:

هو لحق؟ اجهزي بسرعة عقبال ما أعمل له حاجة
يشربها عشان أخوكي نزل يدور على شغل ومحدث هنا
يقعد معاه .

الأم تتركها وتتجه نحو الباب لتغادره ..

ما إن تصل الأم إلى باب الغرفة لتغادرها حتى تقول مروة بحيرة:
ماما ..

منى (تلتفت لها بسعادة):

إيه يا حبيبة قلب ماما

مروة:

هو ده مش حلم؟

الأم (ضاحكة):

ولا مسلسل .. يالآ اجهزي بسرعة .

الأم تغادر الحجرة وتغلق الباب خلفها دون أن تنتظر أي تعليق من
مروة ، بينما تنظر مروة تجاه الباب بصدمة قبل أن تغمغم:
كده اليوم بان من أوله .



ريسبشن منزل مروة

الأم تعطي كوب عصير لشريف الذي يأخذه منها بابتسامة رقيقة قائلاً:

تسلم إديكي يا طنط .

منى (بابتسامة ودود):

على إيه يا حبيبي دي حاجة بسيطة . . عقبال ما نشرب
شربات فركك إن شاء الله .

شريف ينظر لها بسعادة وقد شجعته الكلمة، فيضع كوب العصير على
الترابيزة أمامه، ثم يقترب منها ويقول بصوت منخفض:

فيكي من يكتم السر؟

الأم تميل نحوه وتقول بصوت منخفض مماثل:

ف بير .

شريف:

أنا نفسي الفرح يكون بسرعة . . وطبعاً حضرتك فاهمة قصدي .

الأم تتراجع وكأنها تندش لما تسمع وهي تقول بدهشة كمن لا تصدق
ما سمعت

منى:

لأ!!

شريف (بصدمة):

لأ مش فاهمة والأ لأ مش موافقة!؟



منى (بلهفة لتصحيح سوء الفهم):

قصدي لأمش مصدقة.. (تعود بظهرها للخلف وتقول كمن تفكر
في الأمر) في الحقيقة إنت فاجئتني.. (تعبث بشعرها) أفكر.

شريف (بإحراج):

إحم.. أنا بتكلم عن فرحي على مروة، حضرتك... .

منى (ضاحكة):

مانا فاهمة يا بني بس بهزر معاك.. أنا والله من ساعة
ما شفتك وأنا حاسة إنك زي حسام ابني بالظبط.

شريف (بابتسامة متفائلة):

وانا والله اعتبرتك ف غلاوة بابا بالظبط.

منى (بصدمة):

نعم؟

شريف (بإحراج):

سوري يا طنط.. بس أصلي كنت بحب بابا الله يرحمه أكثر
من ماما فمتأثر بالموقف.

منى (بابتسامة متفهمة):

آه.. إذا كان كده معلىش.

بعدها نسمع صوت مروة وهي تدخل عليهم قائلة:

هاي شريف.

شريف ينهض ليسلم عليها

شريف:

هاي مروة . . ألف سلامة عليكي .

مروة:

الله يسلمك .

الأم تبعد عن شريف وهي تقول لمروة بلهجة ذات مغزى

منى:

تعالى اقعدى بقى جنب زميلك عقبال ما أقوم أعمل له كوابية
عصير لحسن العصير الأولانى برد .

مروة تستبدل المكان مع والدتها وهي تنظر لها غاضبة فتصطدم بكوب
العصير ليسقط على بنطلون شريف الذي يقف مخضوضاً وعلى وجهه
الصدمة بينما تشهق الأم وهي تقول:

يا خبر . . ليه كده يا مروة؟ دي البدلة باينها لسه جديدة
وغالية .

شريف (بحزن وتأثر كوميدى):

أوي أوي .

مروة تنظر له بدهشة فيقول لها بخجل ممتزج بالحسرة والحزن:

بس ما تغلاش عليكي .



منى تزيح مروة بعيداً عنه لتقترب منه قائلة:

ملحوقة يا ابني .. اقلع البنطلون أغسله وأكويه بسرعة .

شريف يمسك ببنطلونه قائلاً بصدمة:

البنطلون لأ ..



حجرة نوم مروة

مروة تقول لوالدها بغضب:

لأ يا ماما لأ .. بجد كده Over

منى:

إيه بس اللي أفوره يا بنتي .. الواد عشري وانا ماليش
في الرسميات وشغل سؤ سؤ وتؤتؤ .. يبقى إيه المشكلة؟

مروة (بعصية):

إزاي تمسكي فيه يقلع البنطلون؟

منى:

وهو يعني قلعه قدامك .. مانا خليتته يخش يغيره
ف أوضة حسام .. ده بدل ما تشكريني إني صلحت
غطتك؟

مروة (بدهشة):

غلطتي؟

منى:

أيوه غلطتك .. هو انا اللي دلقت العصير والآن انتي .. مش
جزاته إنه بييجي يسأل عليكي ينزل من عندنا مبلول .. ده
ولاد البواب كان ممكن يزفوه .

مروة:

طب والغدا اللي مسكتي فيه ياكله معانا؟

منى (بغیظ):

لأ .. لا لا لا لأ .. ده إنتي بخيلة ومعفنة بقى .

مروة تقترب منها وتنظر لعينيهما بخبث وتقول بتحد:

ماشني يا كريمة .. بس اللي ف دماغك ده لسه بدري
عليه .. أنا وعدته إنني هفكر الأول .

منى:

وماله .. فكّري وبعدين وافقي .. هي دي فيها مشكلة؟



مكتب شريف ومروة

شريف يجلس بجوار مروة ويقول لها بهدوء ونبرة عقلانية

شريف:

يعني دي جزاتي إني جيت أسأل على حبيبتني؟

مروة:

مش أنا قولت لك بلاش الكلمة دي؟ ثم احنا اتفقنا تسيبيني آخذ وقتي في التفكير وما تفكرش تضغط علىّ .

شريف:

وانا عند اتفاقي وماضطتش ولا حاجة . . كل ما في الأمر إني قلقنت عليك فحبيت اطمئن . . بس بصراحة مكنتش اعرف إن طنط لذيذة أوي كده .

مروة (ساخرة):

كلهم بيقفوا كده في الأول لغاية بس الزبون ما تيجي رجله .

شريف (برومانية):

دي تبقى أحلى توريطه اتورطتها ف حياتي .

مروة (بابنسامه خبيثة):

وبالنسبة للزبونة اللي هتتورط معاك . . مش من حقها تقرر مصيرها؟ ما يمكن التوريطه ما تعجبهاش .

شريف تتحول ملامحه الرومانسية إلى الوجود

شريف (يزفر زفرة حارة ويقول بحزن):

عمومًا أنا مش هضغط عليكى تانى .

ثم يميل نحوها بتحدٍّ وتتحوّل لهجته إلى الصرامة

شريف:

بس اعلمي حسابك إن حياتك الجاية لو ظلمتي فيها حب

بالقوة والإخلاص ده . . عمرها ما هتكون سعيدة أبدًا .

شريف ينهض ويهم بمغادرة المكتب . .

وهو على عتبة المكتب يجد جيرمين التي تنظر له نظرة طويلة تحمل

معاني كثيرة وتقول بحزن:

جيرمين:

Good afternoon doctor

شريف ينظر لها ويقول بلا مبالاة:

Good afternoon

ثم ينصرف دون اكتراث ، فتتنظر له من ظهره قبل أن تدخل

المكتب ، وتقرب من مروة التي تتطلع إلى شاشة

اللاب توب وتقول لها وفي عينيها الدموع وبصوت متهدج

من الحزن والضعف

جيرمين:

ممكن آخذ رأي حضرتك في موضوع مصيري؟

مروة ترفع عينيها من اللاب توب وتنظر لجيرمين بينما تسقط دمعة

ساخنة من عيني جيرمين .



مكتب جيتام بالكافيه

جيتام يجلس على مكتبه يطالع الجروب الخاص به على الفيس بوك ، ثم يسمع صوت طرقات على باب مكتبه فيقول وهو مازال منهمكاً في متابعة الجروب

جيتام:

اخرج .

الباب ينفٲح فيدخل حسين وسيد ، إذ نلاحظ على وجه حسين سعادة خجولاً ، فيتترك جيتام الكمبيوتر وينظر لكليهما بتوجس قائلاً:

حٲة تجر ستة . . خير؟

حسين ينظر للأرض في خجل ، بينما ينظر سيد لجيتام ببلاهة ، فيلكزه حسين في الخباٲة ، فيبدأ في الكلام

سيد (بلهٲته الصعيدية):

جايين لحضرتك مفاجأة يا جيتام بيه .

جيتام (ساخرًا):

لحٲت تحمل يا حسين .

حسين (بابتسامة خجول):

مش لما اتجوز الأول يا فندم .

جيتام (بدهشة):

هو انت كل ده لسه ما اتورطتش؟

حسين:

كنت بكوّن نفسي يا فندم ويا دوب لسه مخلص .

جيتام (ساخرًا):

بعد إيه يا حسين . . اصبر شوية صغيرة وانت تتجوز ف
الجنة إن شاء الله .

سيّد:

كمان شهر خطوبة حسين يا فندم . . بس هتبقى ع الضيق
ومش هيعزم حد . . وانا جاي استأذّنك أمسك المحل مكانه
قبلها بأسبوع عشان يعرف يحضّر نفسه . . إنت عارف بقى
الكافيه ده بلوة بتخوت نافوخ الواحد ازاي .

حسين يلكزه ثم يقول لتلطيف الجو .

حسين:

قصده يعني يا فندم . .

جيتام (ينهض مقاطعًا):

ألف مبروك يا حسين .

حسين يندفع نحو جيتام ويعانقه بحرارة كوميدية ثم تذرف **عيناه**
الدموع قائلاً:

الله يبارك فيك يا فندم . . كان نفسي أفرح بيك الأول .

جيتام (ساخرًا):

اخرس بدل ما ارجع ف كلامي وأجيبك يوم فرحك .

حسين (مازحًا):

بصراحة كنت عايز أجرب فيك .

جيتام:

وبعد ما تعرف برضه هنتورط .. ده شر لا بد منه ما بيفرقش
فيه الترتيب .

حسين:

بالمناسبة دي يا فندم كنت عايز آخد رأيك في بدلة الخطوبة .

جيتام ينظر لحسين نظرة ثاقبة ويتأمله ثم يقول:

أممم .. هاتها سودا مقلمة .. هتليق عليك .

حسين:

بس انا مش عايزها سودا يا فندم .

جيتام:

خلاص هاتها فيراني أو بيج .

حسين:

ما انت عارف إن اللونين دول بالذات مش بيليقوا عليًا .

جيتام:

أممم .. ممكن تجيب لون بني .. برضه هيبقى جامد .

حسين:

جبت قبل كده واحدة بني وبعدين شحّتها .

جيتام:

ما تصارحني يا حسين .. إنت مغصوب ع الجوازة دي؟

حسین:

لأيا فندم .

جیتام:

أمال مطلع عين أمي معاك م الصبح ليه؟ دي كانت خطوبة
مهيبة بستين نيلة . . عنك ما أتجوزت يا أخي . . إحنا أصلا
مش هنبقى موجودين ولا هنشوف خلقتك ولا خلقتها . .
روح لها لابس بدلة قديمة وطربوش وخليها تلبس خدامة . .
وقضوها حفلة تنكرية بوشك المنفوخ زي البالونة ده .

سيد (ساخرًا):

بالونة؟ كل سنة وانت طيب يا حسين . . عايزين نعلقك في
عيد الميلاد .

حسين (وهو يصفعه غاضبًا):

بس يا شمعة .

سيد يصمت وينظر له بإحراج فيقول جيتام ساخرًا

جیتام:

عاجبك كده . . أديك طفيت نفسك .

ثم يفتح جيتام ذراعيه فيحتضنهما ويضحك الجميع ، قبل أن يردد
حسين بفرحة:

شكلي هشوف أيام سودة . . yes . . yes



داخل كافيه جيتام / خارج مكتبه

شاب بسيط الهيئة، متواضع الملابس، بحذاء مخروم يدخل ويتأمل حوله رواد الكافيه وقد ظهر الخجل من نفسه على ملامحه فيأتي إليه أحد الجرسونات من وراء ظهره ويسأله

الجرسون:

خير يا أخ .. فيه حاجة؟

الشاب يلتفت إليه ويقول بتلعم:

أأأأ .. أستاذ جيتام موجود؟

الجرسون:

فيه ميعاد؟

الشاب:

لأ .. بس هو دايمًا بيقول إن مكتبه مفتوح للجميع .. أرجوك أنا محتاجه ضروري .

الجرسون يتأمله من فوق لتحت ثم يقول بتهمك:

طب خليك هنا ثواني يا عم المنكوب .

الجرسون ينصرف ، بينما يتطلع الشاب حوله إلى رواد الكافيه ثم ينظر للأرض بحزن وضعف ، حتى يضع الجرسون يده عليه فينتفض بطريقة تجعل الجرسون يقول ساخرًا

الجرسون:

إيه يا عم . . مالك فيه إيه؟ إيدي بتكهرب .

الشاب (بخجل):

لا ، العفو .

الجرسون يتأمله باز دراء قبل أن يقول متهمًا

الجرسون:

طب افضل قدامي .

الجرسون يسيير ويتبعه الشاب .



مكتب جيتام في الكافيه

جيتام يجلس على مكتبه ناظرًا نحو باب المكتب بتأهب ، فيفتحه الجرسون ويشير للشاب الذي يدخل على استحياء قائلًا وهو ينظر للأرض

الشاب:

سلامو عليكم .

الجرسون يخرج ويغلق الباب خلفه ، بينما يقول جيتام وهو يشير للمقعد المواجه لمكتبه



جيتام:

وعليكم السلام .. اتفضل .

الشاب يجلس على استحياء ويقول وهو ينظر للأرض

الشاب:

لو حد عرف حدانا في البلد إني جيت لحضرتك عشان تحل
لي مشكلتي العاطفية .. مش بعيد يتبروا مني ويحكموا على
أبويا يبيع أرضه ويفارقهم هو كمان .

جيتام (وهو يتأمل ملامحه):

ولما انت خايف منهم أوي كده إيه اللي جابك؟

الشاب (وهو يرفع رأسه ناظرًا لجيتام باستعطاف):

عشان انا أهون عندي أخسر أرضي وأرض أبويا وعمري
كله .. بس ما اخسرش حبييتي .

جيتام (وهو يتأمل ملامحه):

وليه تخسرها؟ ما دام أبوك عنده أرض خليه يجوز هالك .

الشاب:

مش أرض بالمعنى اللي انت متخيله يعني يا بيه .. همًا يا دوب
كام قيراط عُمي .. بس أسامة بتاع الجيم عنده أكثر منهم .

جيتام (بدهشة):

جيم؟

الشاب:

الموضوع وما فيه إنني ما عجبتيش حياة البلد.. وف يوم
ما حستش بنفسي غير وانا صاحب خلجاتي ونازل على
مصر.. اشتغلت ف مصنع بـ 700 جنيه ف الشهر وحسيت
اني بقيت راجل.. وهناك عرفت أمينة.. بنت غلبانة بس أهلها
مطفحينها الدم.. عشان كده كانت عايزة تهرب م البيت بأي
شكل.. ف الوقت ده كان أسامة بتاع كلية التربية الرياضية
لسه راجع م الكويت ومحوش قرشين فتح بيهم جيم.. اتقدم
لها وزغل عنيتها بالفلوس وعمل لها رجم ببلاش ف نسينتي
وراحت له.. وبعد فترة حست بقيمتي ورجعت لي..
وبعدين راحت له.. وبعدين جات لي.. وبعدين راحت له..
وعشان يكون مفيش ترجيع..

جيتام (مقاطعا بسخرية):

خدت برم برام.

الشاب:

لأ، كتبوا الكتاب.. وسافر أسامة ثاني.. بس للإمارات
المررة دي.. وساب أخوه يدير الجيم عقبال ما يرجع عشان
يفتح فرع ثاني.. ومن ساعتها وانا بحاول أقنعها تسيبه.

نسمع صوت طائرة في الخلفية فيقوم جيتام مفزوعاً

جيتام (ساخراً):

يا نهار اسود.. أسامة رجع.

الشاب ينظر له في قلق ويتابع

الشاب:

عرفت منين؟ ده فعلا رجع وعرف اللي حصل وقالب عليًا
الدنيا.

جيتام (بقلق):

ومش بعيد طبعًا يكون بيراقبك وماشي وراك؟

الشاب:

احتمال.

جيتام (بتوتر):

اطلع بره.

الشاب (مصدومًا):

ليه بس؟

جيتام:

يا با ده بتاع جيم . . يعني يقوم بينا احنا الجوز . . أُمال بقي لو
جاب معاه صحابه هيعملوا فينا إيه؟

الشاب:

ما هي دي مشكلتي اللي عايزك تحلها لي قبل ما يدخل بيها
وأُتسوح انا . . ده لو خدها ممكن أروح فيها.

جيتام:

مش أحسن ما اروح أنا فيها . . ده انا لو شُفت صرصار

بيطير في بيتنا ممكن أعزّل . . تقوم موقعني مع صاحب
جيم؟ وبعدين يا أخي خلاص ضاقت بيك الدنيا؟ من قلة
البنات؟ ده حنفية الحمام بتاعتنا لما بتفوت بتنقط بنات . .
حرام عليك يا أخي . . ما سألتش نفسك ازاي هتأمن لها بعد
ما عملت كده مع اللي قبلك؟

الشاب ينهض قائلاً في حرقه .

الشاب:

أنا الحب الأول .

جيتام:

دلوقت البنات بقت تجيب للرابع وساعات للخامس حسب
الموديل .

الشاب:

وانا اللي كنت فاكرك هتساعدني وتقف جنبي ف المشكلة
المثارة دي!

جيتام:

بلا أم سارة بلا أم حسين . . أنا ضد المبدأ من الأساس وما
بني على باطل فهو باطل . . نصيحة أخ (ينفخ في يده
المضمومة ويتابع) انفد بجلدك واخلع م الموضوع ده .

الشاب يغادر مكتب جيتام ناظرًا للأرض بانكسار .

الشاب يدخل شقته المتواضعة ويجمع هدومه .

الشاب يركب أتوبيس متكدساً بحيث نراه يقف على باب الأتوبيس من الخارج حاملاً حقيبته المتواضعة.

الشاب يدخل محطة مصر وينظر للقطار الذي يتحرك بتردد. القطار يتحرك ويغادر المحطة.

الشاب يجري خلف القطار بسرعة ويقفز داخله في اللحظة الأخيرة.

الشاب يدخل البلد وسط الحقول فتنظر له إحدى الفتيات بفرحة وسعادة. الشاب يدخل منزله ويقبل يد والده.

الشاب يضع يده في يد والد الفتاة ونرى مأذوناً يتحدث.

الفتاة التي كانت تنتظر للشاب تجلس وسط بنات عائلاتهما حيث الكل يرقص ويزغرد لها، بينما ارتدت فستاناً أبيض فلاحياً وتجلس سعيدة وسطهم.

الشاب يركب فرساً أبيض وأمامه تجلس الفتاة ويسير بها وسط فرحة أهل القرية.

وعلى المشاهد الماضية، يتردد صوت (جيتام) في الخلفية قائلاً:

« دائماً حواليك الينت اللي بتحبك وإنْت مش شايفها . .
لو دورت عليها هتلاقيها موجودة وإنْت مش حاسس بيها . .
زي ما أنت بتحب واحدة ومش حاسة بيبك بالظبط . . جاز
تطلع جارتك اللي مفيش بينك وبينها غير صباح الخير صباح
النور . . وممكن تكون زميلتك اللي عُمر ما دار بينك وبينها
كلام . . ومع ذلك عنيتها دائماً ما بتنزلش من عليك وإنْت

مديها ضهرك . . ومش بعيد تكون قريبتك اللي متربي معاها
وبتشوفها كثير لكن عمرك ما فهمت نظراتها . . لما نكون
بنحب ناس مش حاسين بيانا . . بس فيه أمل إن الحب بييجي ،
وفيه أمل أكبر إنه يتحول لجواز . . بنسى اللي بيحبونا
في صمت ، وبنقول أكيد ف يوم هيلاقوا نصيبهم . . لكن
فيوم ما نحب حب صعب إنه بييجي ، ومستحيل لوجه إنه
يتحول لجواز . . بكون أحسن وأسلم حل إننا ندور حوالينا
ع اللي بيحبونا من ورانا ونديهم وشنا» .



أمام أحد السكاشن

مروة تغادر السكشن وخلفها ينصرف الطلبة والطالبات فتجد شريف
وعلى وجهه ابتسامة رقيقة وجواره جيتام ، وقد وقفا في انتظارها
فتعقد حاجبها بمرح وتتطلع إليهما وقد أمالت رأسها في اتجاه كتفها
اليسرى ، وهي تنظر لهما باستغراب ثم تبتسم ابتسامة رقيقة وهي
تقول

مروة:

إيه اللي لم الشامي ع المغربي؟

جيتام:

إنتي .

مرورة (بدهشة):

أنا؟

جيتام (بابتسامة خبيثة):

شريف يا ستي قال إنه مش هيحضر فرح بنت خالتي غير
لو جيتي . . فجيت أعزمك بنفسي لأنه لو ما حضرش أنا
كمان مش هحضر .

مرورة تضحك برقة ثم تقول

مرورة:

ده سبب أدعى إنني ماجيش عشان أنقذ بنت خالتك من وشك
الحو . . مش طالبة أي مفاجآت ف يوم فرحها .

شريف (بمرح):

نفس رأيي . . عشان كده بحط العقدة في المنشار .

جيتام (يميل نحو شريف ويسأله في الخباثة هامسًا):

إحم . . إنت قلت لها إيه عني؟

شريف:

الحقيقة .

جيتام:

الله يكسفك . . ودي برضه حاجة تتقال؟

ثم ينظر جيتام لمروة باستعطاف قائلاً

جيتام:

م الآخر بقى يا مروة .. الواد ده أنحس مني .. ومع ذلك
عزمته لأن بنت خالتي هنتزف ف عربيته .. أصل جوزها
على قد حاله كده وهي يتيمة وكلنا هنقف جنبها .. وأنا للأسف
عربيتي ما ينفعش تزفها عشان البابين بتوعها قدام بس ..

شريف:

آه بس هو اللي هيسوق عربيتي ويزفهم .. وأنا وانتي
هنركب عربيته .

مروة تنظر لهما بخجل وتقول بارتباك

مروة:

والله يا جيتام أنا نفسي ، بس معرفش ظروفي وكمان ..

شريف (يقاطعها ويتابع بابتسامة خبيثة):

خلاص بقى يا مروة .. الراجل حلف بالطلاق .. إنتي
عايزاه يطلق قبل ما يتجوز .

جيتام (بهزار):

ومراتي تطلبني ف بيت الطاعة بقى .. وانا أهرب بالعيال .

شريف (يبتسم ويتابع):

فيجيلي بعياله ولاد الكلب والدنيا بتمطر وأقلق الباب ف وشه .

جيتام:

أه بس هيقله من برة الشقة عشان هيكتشف إن العيال ولاد
الكلب دول عياله.. وبعدين البطلة هتكتشف في الآخر إن
أبوها كان مابخلفش.. إنتي فاضية أكمل والملا تحبي تتابعي
المسلسل بنفسك؟

مروة تتبادل النظر بين وجهيهما وهي عاقدة حاجبها بدهشة واستغراب ،
ثم ترفع يديها لتستوقفهما قائلة بمرح:

خلاص.. خلاص.. (تبتسم وتتابع).. أنا هاجي بس عشان
خاطر العيال.. بس همشي قبل الساعة 12.

جيتام ينظر لشريف ويضحك قائلاً:

أي خدمة يا عم.. قلبتها لك سندريلا.



في سيارة شريف

مروة في سيارة شريف وهي في كامل أناقتها، وقد ارتدت
عدسات خضراء، وفتاناً سواريه شيك لكنه محتشم، بينما
يقود شريف وعلى وجهه ابتسامة سعيدة، فننظر إليه وتأمل
ملامحه ثم تسأله

مروة:

ماقولتلش.. إيه أكثر حاجة عجبك في النهارده؟

شريف يتأمل ملامحها بحب ورومانسية قبل أن يقول برفقة:
عنيكي .

مروة تجفل ثم تبتسم ابتسامة صفراء محرجة وهي تقول في ضيق
تحاول أن تخفيه:

بس دي لينسز .

شريف يشعر بالحرج ويقول بارتباك:

أقصد عنيكي اللي ورا اللينسز على فكرة .

مروة (ساخرة):

وراع اليمين واللا الشمال؟

شريف (بابتسامة تحاول أن تداري على الموقف):

لا اللي ف النص .



الباركنج

شريف يركن السيارة في الباركنج ثم يهبط منها وكذا تفعل مروة، وما
إن تهبط من السيارة حتى يمر بجوارها شلة بنات يرتدين الإسدالات
وينظرن إليها شزراً، فتتنظر لهن مروة بدهشة ثم تنظر لشريف فيبتسم
وهو يهز كتفيه باستغراب ويتجهان نحو القاعة .



أمام القاعة التي يقام فيها الفرع

شريف ومرورة يقتربان من القاعة فيجدان رجلين ملتحيين؛ أحدهما ضخم الجثة والآخر عادي في الجسم وملتح لحية جميلة مهذبة تزيد جمالاً ووقاراً، حيث يقف الرجلان خارج القاعة بجوار جيتام على الجانب الأيسر لباب القاعة، بينما تقف على الجانب الأيمن سيدة ضخمة وعدد من السيدات العاديات في الجسم، فيشير جيتام للسيدة الضخمة قائلاً لمرورة

جيتام:

الحاجة زينب أم العريس .

وقبل أن يكمل كلمته، تجذب زينب مرورة وتحتضنها وتقبلها بحميمية .
زائدة تؤلم مرورة وتدهشها وهي تقول لها

الحاجة زينب:

يا أهلاً وسهلاً يا أهلاً وسهلاً . . عقبالك يا قمر إن شاء الله

مرورة (بألم):

الله يبارك فيكي يا طنط .

ثم تتولى بقيقة السيدات السلام على مرورة، بينما يفعل بالمثل الرجل الملتحي الضخم مع شريف الذي يشعر ببطنه وصدوره يرتجان بعنف مع الحزن العنيف الذي يحضنه الرجل

الرجل الملتحي الضخم:

نورتنا والله يا أستاذ . . بارك الله فيك .

وما إن يترك الرجل الملتحي الضخم شريف حتى يقول جيتام وهو
يشير إليه

جيتام:

ده الحاج عبد الجبار والد العريس .

شريف ينظر للرجل ويهز رأسه بابتسامة طفيفة ثم ينظر جيتام للرجل
الملتحي الآخر ويقول

جيتام:

وده الحاج عبد الهادي عم العريس .

شريف يصافحه بقلق وتحفز حتى لا يحتضنه الرجل بعنف مثل أخيه،
لكن الرجل يسلم بهدوء وبابتسامة رقيقة دون أن يتكلم فيعانقه شريف
قائلاً بسعادة

شريف:

عبد الهادي وإنت هادي والله يا حاج . . ده إيه الجمال ده .

شريف ينتهي من السلام ثم ينظر لجيتام دهشة ويقول هامسًا

شريف:

هو فيه إيه؟

فيأخذه جيتام على جنب ويقول له هامسًا

جيتام:

الفرح إسلامي .

شريف (بغيط):

الله يخرب بيتك .. مش كنت تقول؟

جيتام (هامسا):

مانا عارف إنكم متدينين .

شريف ينظر له بغيط ، ثم يلاحظ مروة وهي تتجه نحو الرجل لتصافحه
وعلى وجهها ابتسامة .

مروة:

ألف مبروك يا فندم .

الرجل ينظر ليدها الممدودة نحوه بغضب واستهجان ، فيقوم الحاج
عبد الهادي بمصافحة مروة بدلاً منه بابتسامة ودود محترمة قائلاً لها:
أنا الحاج عبد الهادي عم العريس وده عبد الجبار أخويا بس
ما بيسلمش .

شريف ينظر للحاج عبد الهادي بفرحة ثم يعانقه مرة أخرى قائلاً

شريف:

ربنا يحفظك يا حاج عبد الهادي .. يا سلام ع الإيمان السليم
والفهم الصحيح للدين!

عبد الجبار ينظر لشريف شزراً فيقول له شريف بقلق:

لا ، ده أنا أقصدك إنت يا حاج .. مش إنت الحاج عبد
الهادي؟

عبد الجبار:

لا ، أنا الحاج عبد الجبار اللي ما بيسلمش .

شريف يلتفت للحاج عبد الهادي ويصافحه بحرارة قائلاً:
برضه ربنا يحفظك يا حاج عبد الهادي . . إنت رجل
والرجال قليل.

جيتام يصحب شريف ومروة للداخل قائلاً:
اتفضلوا يا جماعة.

ثم ينظر جيتام لعبد الجبار ذي الملامح المتجهمة، قبل أن
يتابع (جيتام) كلامه لـ(شريف) و(مروة) بلهجة ذات مغزى

جيتام:

إن شاء الله نفرح بيكو قريب على سنة الله ورسوله.

بينما يقول عبد الجبار بصوته الغليظ:

أمين.



داخل قاعة الفرح / الجانب الأيمن المخصص للسيدات

مروة تجلس في الجانب الأيمن من القاعة حيث الجزء المخصص
للحريم، ونجدها الفتاة الوحيدة غير المحجبة، حيث الكل ما بين
محجبات ومخمرات ومنتقبات وتنظر لهن بحرج، في حين نسمع
في الخلفية إحدى الأغنيات التي يتم تشغيلها في الأفراح الإسلامية.
إحدى البنات المحجبات التي ترتدي بادي كارينا وملابس ضيقة لا تليق
بالحجاب تنظر لمروة باستهجان ثم تتهامس مع فتاة بجوارها . .



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن رايكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

فتاة أخرى ترتدي ملابس أنيقة وحجابًا «شيك» لا يتنافى مع الحشمة ومع ذلك يعطي انطباعًا بالشياعة والأناقة . . تنظر لمروة وتبتسم قائلة
الفتاة المحجبة:

مش حضرتك أستاذة مروة بتاعة برنامج أستروجين؟

مروة (بابتسامة رقيقة):

أيوه .

الفتاة المحجبة:

نورتينا . . أنا متابعه حضرتك ومعجبة بأرائك المحترمة العميقة .

مروة (بنفس الابتسامة الرقيقة):

ميرسي ربنا يخليكي .



داخل قاعة الفرح / الجانب الأيسر المخصص للرجال

جيتام وشريف يجلسان في الجانب المخصص للرجال ، ونسمع في الخلفية أغنية أخرى من التي يتم تشغيلها في الأفراح الإسلامية ، بينما كل الرجال حولهما ملتحون . .

أحدهم ينظر إليهما شزرًا ويتهامس مع ملتجٍ آخر بجواره ، بينما يقترب منهما الحاج عبد الهادي

عبد الهادي (بابتسامة رقيقة):

أنستونا يا جماعة .. أنا عايزك ماتقلقش على بنت خالتك
يا أستاذ جيتام .. أنا وصيت أحمد ابن أخويا عليها وأنا اللي
هتصدر لها قبل منك لو زعلها .

جيتام:

من غير ما تقول يا حاج أنا عارف .. أنا أصلاً وافقت على
أحمد مخصوص عشانك .

عبد الهادي (بدهشة):

بس أنا ماشوفتكش غير بعد ما اتفقتوا على كل تفاصيل
الجوازة .

جيتام (بحرج):

إحم .. مش محتاج أشوفك .. سيرتك سابقاك يا حاج .

يضحك الحاج عبد الهادي ثم يربت على كتف جيتام قائلاً:

الله يحفظك ولو إنك أونطجي .. ربنا يكرمك بالزوجة
الصالحة إن شاء الله .

جيتام بيتنسم ابتسامة حزينة يلاحظها شريف ، فيشعر بالحرج وبيداري
وجبهه ، بينما ينظر جيتام نحو ابنة خالته وهي تجلس في الكوشة مع
عريسها وعلى وجهيهما السعادة والحب ويطيل النظر .



خارج قاعة الفرع

أكرم صديق شريف وجيتام ، يدخل على القاعة فيستقبله الحاج
عبد الجبار الضخم ويصافحه بقوة ويحتضنه بعنف فينظر له أكرم
برعب وتوتر ، بينما يقول عبد الجبار بطريقته المألوفة وصوته الغليظ:

نورتنا والله يا أستاذ.. بارك الله فيك

أكرم يجد جيتام وقد خرج للتو من القاعة فينادي عليه برعب وتوتر
أكرم:

جيتام.. إلحطني يا جيتام.

جيتام ينظر إليه بدهشة غير مصدق عينيه وما إن يقترب منه حتى
يحتضنه بعنف مماثل قائلاً:

جيتام:

مش معقول.. أكرم؟.. إيه اللي جابك؟.. محدش عزمك
يا راجل!

أكرم (وهو يبعده بألم وصدمة):

نعم؟

جيتام (ضاحكاً):

محدش عزمك عشان إنت صاحب فرح.. اتفضل خش

أكرم يهم بالتراجع قائلاً بخوف:

لا أنا كنت جاي أبارك لك وأشوفك عشان وحشتني من
ساعة ما اتخرجنا.. نعوضها بعدين.

عبد الجبار يلتفت له ويقول بصوته الغليظ:

والله لا يمكن .

أكرم يلتصق بجيتام قائلاً في خوف:

طبعًا لا يمكن .. ده أنا آخر واحد همشي .. دخلني بسرعة
يا جيتام .

جيتام وأكرم يدخلان القاعة بسرعة



داخل قاعة الفرح / الجانب الأيسر المخصص للرجال

أكرم يجلس وسط شريف وجيتام ، وينظر بقلق وخوف لجمع
الملتحين الذي يحاصره ثم يهمس لجيتام . .
أكرم:

طب بخصوص الفرح واليوم السعيد ده .. إيه ظروف ضرب
النار بعد ما نخلص .

جيتام (بدهشة):

ضرب نار إيه .. إنت عليك تار يا أكرم؟

أكرم يكشف جانب البذلة الأيسر لنرى جرابًا به طبنجة قائلاً

أكرم:

لا يا راجل، ده أنا كنت ناوي أجاملك بكام طلاقة .

جيتام:

إيه؟ تجاملني بكام طلاقة؟ الله يخرب بيتك . . وريني كده

أكرم يخرج المسدس من الجراب ويعرضه على جيتام، فيلاحظ جمع
الملتحين ذلك، فيقتربون وهم ينظرون للطبنجة بدهشة وتوتر . .

جيتام يأخذ الطبنجة ويسحب الأجزاء ليعمرها فيتراجع الكل ويضع
بعضهم يديه فوق رأسه في خوف فيصوبها جيتام نحو أكرم
بخوف قائلاً:

جيتام (بتوتر):

دي عملة تعملها برضه يا أكرم؟ هي الحاجات دي لعبة؟
إحنا ناقصين مصايب؟

جيتام تصدر منه طلاقة دون أن يدري، فيجري الجميع في رعب
وتحدث حالة من الهرج والمرج، ونجد مروة تجري وسط حشد
النساء اللاتي يصرخن فنتعثر وتسقط، لكن يد شريف تمسك بها في
اللحظة الأخيرة ليساعدها على الوقوف ثم يجريان . .



داخل قاعة الفرحة

القاعة كلها خالية من الجميع عدا أكرم الذي يجلس على الأرض في وضع القرفصاء واضعاً يديه فوق رأسه، بينما ينظر جيتام للطبوجة التي يخرج منها الدخان، ثم ينظر لـ أكرم ويقول بغضب:

جيتام:

شوفت آخرة اللعب بالنار؟ هات بقى الجراب بالمرة عشان أشيل الطبوجة معايا لآخر الفرحة .. خلي اليوم يخلص على خير .

فيما ينظر أكرم للقاعة التي بدت خاوية على عروشها بدون معازيم، وعيناه تقول لـ (جيتام):

إنت عبيط؟



في سيارة شريف

شريف يسير بالسيارة وبجواره مروة فينظر لها برقة ورومانسية قائلاً:

كان يوم جميل أوي .. بجد ميرسي يا مروة .

مروة تبتسم برقة ثم نسمع صوت كلاكس الزفة المميز (تيت تيت .. تيت تيت تيببت) فتتنظر إلى يمينها فتجد جيتام قائداً سيارة شريف وفي

الخلف العروسان ، فيخرج جيتام يده ملوحًا لهما بحب ، فيقوم شريف بإصدار صوت كلاكس زفة الفرحة للرد عليه وعلى وجهه السعادة والحب ، ثم ينطلق جيتام ليتجاوز سيارة شريف ويبتعد ، **فتنظر مروة لشريف وتقول بسعادة:**
بيحبك أوي .

شريف (بخجل ممزوج بالسعادة):

وأنا والله ربنا يعلم بحبه قد إيه .

فجأة نرى إضاءة كشافات تغمر سيارة شريف ، ثم نرى ميكروباص بجوار نافذة مروة ويطل من الميكروباص وجه سائق بغيض دميمة الملامح ، ناظرًا نحو مروة بابتسامة شهوانية ثم يغمز لها بعينيه ، فتشبح مروة بوجهها بعيدًا عنه في قرف بينما يقول له شريف بعصبية:
ما تركز ف طريقك أحسن بدل ما تحط نفسك ف موقف مانتش قده .

الرجل ينظر لشريف بعينيه المحمرتين ويقول بلهجة بها قدر من السلطان كمن وقع تحت تأثير المخدر .

السائق:

موقف؟ .. الموقف لسه فاضل عليه 5 محطات .. هيع هيع هيع .

ثم يميل بسيارته على سيارة شريف فجأة في اتجاه اليسار ، فيجنح شريف بسيارته في اتجاه اليسار للابتعاد عنه وسط صرخة مروة ، لكن

الرجل يعود لاتجاهه الطبيعي فجأة وقد شعر أنه خدع شريف واشتغله فيضحك ضحكة ساخرة مستفزة ، فيعقد شريف حاجبيه في غضب بينما تقول مروة في توتر:

سيبك منه يا شريف . . ده باين عليه مسطول .

شريف يظل عاقداً حاجبيه في غضب ويتنفس بصوت مسموع ينم عن غضبه الشديد ، فيعود الرجل للاقتراب من سيارته ، ويلقي قبلة طائرة لمروة ثم يبتعد مسرعاً ، فيتمتم شريف بغضب وصرامة:

طول عمري بحلم بلحظة أكشن وأهيه جت .

مروة تمسك ذراعه لتهديته ، لكنه يجذب حزام الأمان ويقول لها أمرًا: شدي حزام الأمان .

مروة تنظر له بخوف وتوتر وتقول:

شريف Please.

شريف (صائحًا بصرامة):

قولت لك شدي حزام الأمان .

مروة تطيع كلامه في خوف وهو يزيد من سرعته حتى يصل للميكروباص ويتجاوزوه فجأة يجذب الهاند بريك بغضب ويدير عجلة القيادة لتستدير سيارته حول نفسها وتصبح في المواجهة أمام ميكروباص السائق ، فيضغط السائق الفرامل فجأة حتى لا يصدم سيارة شريف ليندفع للأمام بعنف وتصطدم رأسه بالزجاج الأمامي ، بينما يفك شريف حزام الأمان ويخرج من سيارته في قمة الغضب ويجري نحو ميكروباص السائق قائلاً بغضب:

ده إنت هتطلع عين أمك النهار ده .

وما إن يصبح أمام الباب حتى يفتحه ثم يكيل للسائق عدة لكلمات متوالية سريعة، دون أن نرى أي رد فعل من السائق، وما إن يتوقف شريف حتى يفاجأ بنظرة السائق الساخرة الذي يقول بلهفته المسطولة:

ما بيحوأش .

ثم يلکم السائق شريف بقوة في وجهه ليطير شريف للخلف ويسقط أرضاً، ثم يخرج السائق من الميكروباص ونجد جسده الضخم يتجه نحو شريف بخطوات واثقة ثقيلة كديناصور عثر على فريسته، وكذا ينزل تباع الميكروباص ويتأمل الموقف، فينهض شريف مسرعاً ويقفز نحو السائق، إلا أن الأخير يقبض بيده اليمنى على عنق شريف ليوقف اندفاعه ثم يجذبه بعنف نحو سقف الميكروباص فيصطدم وجه شريف بسقف الميكروباص وتنزف منه الدماء ثم يسقط مغشياً عليه، فتخرج مروة من السيارة وتصيح بلوعة وهي تتجه نحو شريف:

شربيبيف .

في اللحظة التي يرفع فيها السائق قدمه ليهوي بها على وجه شريف، لكن فجأة نجد جيتام وقد طار في الهواء ليركل قدم السائق بعنف فيختل توازن السائق فيمسك بجناك بذلة جيتام ليستعيد توازنه، قبل أن يحمله كمن يحمل طفلاً صغيراً، وما إن يحمله حتى يرفع جيتام يديه أمام وجهه في خوف، بينما يلاحظ السائق جراب المسدس الذي يلبسه جيتام فيظنه ضابطاً فيفلت جيتام الذي يسقط أرضاً، بينما يردد السائق في رعب:

أستغفر الله . . غور ابعء بعيد .

جيتام يلاحظ أن التباع بجواره يتابع الموقف فيصنعه على وجهه قائلاً:

وإنت كمان ابن كلب .

التباع (بطاعة ورعب):

ابن 60 كلب يا باشا



في سيارة شريف

جيتام يقود السيارة وبجواره مروة بينما شريف فاقد الوعي في الكنبه الخلفية . .

مروة تنظر لـ جيتام بإعجاب ، بينما جيتام عاقداً حاجبيه في غضب دون أن ينبس ببنت شفة .

مروة:

بجد مش عارفة أشكرك إزاي يا جيتام . . ده مش ممكن يكون بني آدم . . معقول فيه ناس كده؟

جيتام:

كفاية إنه قلع ملط في الشارع والتباع بتاعه سابه ومشى بالعربية . . أراهنك إنه زمانه دلوقت ف التخشيفية يا مستشفى المجانين .

مرّوة:

ده حلال فيه الحرق .

جيتام:

قولي الحمد لله إني خدت بالي ووقفت . . عموماً كويس إن
أكرم أنقد الموقف وكمل الزفة بدالي .

مرّوة تزفر زفرة حارة ثم تتابع:

أستغفر الله العظيم . . (تلتفت ناظرة نحو شريف) هنعمل إيه
ف شريف؟

جيتام:

هو صلك وبعدين أروحه . . الحمد لله الجرح طلع سطحي
ومش محتاج غير بلاستر وشوية تلج .

مرّوة تتلفت حولها بقلق وتوتر فيسألها جيتام بفضول:

في إيه؟

مرّوة:

كنت ماسكة الموبايل ف إيدي وبيص عليه مش لاقياه . . أنا
خايقة يكون وقع برة العربية ف الخناقة .

جيتام يعطي لمرّوة الموبايل الخاص به قائلاً:

طب خدي رني عليه .

مرّوة تضرب رقمها ثم تضغط زر الاتصال فتجد أن جيتام مسجل
رقمها باسم الـ «Mozza»!

فنتظر للشاشة بدهشة بينما يرن موبايلها فتجده قد سقط في الدواسة ،
فنعطي لـ جيتام موبايله قائلة وهي تتحني لالتقاط موبايلها:

ماتفلس عقبال ما الموزة توطي تجيب الموبايل بناعها .

جيتام ينظر إلى شاشة موبايله بحرج ثم تعادل مروة فيقول لها بابتسامة
بها شيء من الإحراج:

ده أوبشن جديد ف الموبايل بيسي الناس بأسمائها الحقيقية . .
مرة سجلت رقمي عليه وجيت أطلبه لاقيته كاتب لي
ع الشاشة ماتصيعش .

مروة تكتم ضحكة داخلها وتنظر لجيتام بإعجاب بينما يسرق جيتام
نظرة سريعة لها ثم يكمل القيادة .

مروة تنظر لوالدتها بعينين دامعتين ، بينما تنظر لها والدتها بحزن شديد
ممزوج بالدهشة في حين تقول مروة:
هي دي كل الحكاية يا ماما .

منى:

ياااااه يا مروة . . كل ده كان جواكي وساكتة!؟

مع الجملة الأخيرة لا تتمالك مروة دموعها التي تنزل ساخنة بينما تقول:
وحتى بعد ما قولت لك هتعملي إيه؟ مفيش ف إيدك حاجة تعملها
أمها تأخذها في حضنها بحنان وحب جارف ، وتمسح على
شعرها قائلة بحزن وتأثر وقد لمعت عيناها بالدموع هي
الأخرى .

منى:

مش مهم يكون ف إيدي حاجة أعملها . . أوقات كثير
الفضضة بتكون حل ف حد ذاته بيخفف عنا العذاب . . مش
عارفة أنا إيه العين اللي صايباني فيكوا دي . . حسام وساب
خطيبته وإنتي ومش طائلة سما ولا أرض .

مرودة (باكية):

أنا بحب جيتام يا ماما . . وف نفس الوقت مش عارفة هو
بيحبني وصرف نظر عشان صاحبه واللا أنا مش ف دماغه
أصلاً؟

منى تزيع رأس مرودة عن حضنها ثم تنظر لعينيها نظرة مباشرة قائلة:

اسمعي يا مرودة . . المثل بيقول خد اللي يحبك وماتأخدش
اللي تحبه . . شريف شاب تتمناه أي بنت ف الدنيا . . أدب
وأخلاق ومركز وغير كده زي القمر . . وبعدين إنتي
تضمني منين إن اللي حصل ده مش خطة من خطط جيتام اللي
الناس كلها حلفت بيها لما شافتها ف برنامج . . اللي أتمسك
بيكي وفضل مُصر يكمل عمره معاكي هو الأولى بحبك .

مرودة (باكية):

طب واللي أنا مرتاحة له ونفسي أكمل عمري معاه ماليش
حق أتمسك بيه؟

منى:

أفكرني كلامك . . مش مطلوب منك لما تلاقي فارس أحلامك

غير إنك تكوني نفسك . . لو هو فهمها وقدرها يبقى الظروف
والناس اللي حواليكو هيدوبوكوا ف بعض زي ما المعلقة بتقلب
السكر في المية . . ولو ما فهمش . . يبقى لو مليون ألف معلقة
قلبوا مع بعض . . عمر الميه والزيت ما هيبقوا حاجة واحدة .

مروة (بدموع ساخنة):

أنا قرئت بعدها إن الزيت والميه عمرهم ما هيجتمعوا
لو اتخطوا مع بعض لوحدهم . . لكن ممكن يكون فيه عامل
تالت يغير الخواص بتاعتهم لغاية ما يدوبوا .



أمام منزل شريف وجيتام

جيتام يصعد المدخل حاملاً شريف فيجد عم فكري يجلس
على المصطبة بدلاً من البواب ، وفي يده قطته التي يمسخ
شعرها بحب وحنان ، وما إن يشاهد جيتام حاملاً شريف
حتى يردد في قلق وتوتر .

فكري:

القطه عضت رجلها . . جابت المصيبة لنفسها .

جيتام (ناظرًا إليه شزرًا وهو يصيح بغضب):

إنت هتقف تندب؟ . . تعالى شيل معايا .

جيتام يدخل مدخل العمارة وخلفه عم فكري ، الذي يمسخ القطه بيده

اليسرى ، بينما يمسك رباط حذاء شريف المفكوك المدلّل من الحذاء ويسير خلف جيتام في حزن وتأثر فيقول جيتام بغضب وقد وصل للأسانسير ويضغط زر الاستدعاء .

جيتام:

إنت ماسك رباط جزمته يا عم فكري؟ . . ده اللي ربنا قدرك عليه؟

فكري (بغضب):

ششششش . . إيش فهمك إنت ف الحاجات دي . . بقولك القطة عضت رجليها جابت مصيبة لنفسها .

الأسانسير يصل فيدخل جيتام الذي يحمل شريف بينما يقول فكري:

خلي بالك منه إنت بقى عشان رايح أشوف القطة .

فكري يغلق الباب بينما يقول جيتام في غيظ من الداخل:

الله يسخطك .

الأسانسير يصعد لأعلى .



داخل مدخل منزل شريف وجيتام

جيتام يضع شريف المغمض العينين على سريره ، ثم يخرج من الغرفة ليعود وفي يديه كيس ثلج وبلاستر ، فيلتقط زجاجة البرقان ويرش منها

على الجرح ، ثم يضع قطعة تلعج على الجرح ، وبعدها يلصق البلاستر
على الجرح ، ثم يبدأ في ضرب خدي شريف لتفويقه وهو يردد:

شريف . . شريبيبيبي

جيتام يرش المزيد من البرفان فيفتح شريف عينيه بتخاذل ثم يسأل بضعف:

أنا فين؟

جيتام (ساخرًا)

في الجنة يا شهيد الحب .

شريف يفتح عينيه بوضوح ثم يعتدل جالسًا نصف جلسة وينظر حوله

في رعب وقلق

شريف (مخضوضًا):

لا بجد؟

جيتام (ضاحكًا):

متخافش أوي كده . . الحيوان اللي ضربك اتروق وحقك

اتأخذ تالت وملتت . . بعد كده بلاش تطلب لحظات أكشن

مانتش قدها يا روميو .

شريف (ناظرًا لجيتام بشك):

مين اللي خد لي حقي؟

جيتام (بابتسامة واثقة):

أنا طبعًا .

جيتام يزيح جانب الجاكت الأيسر ويكشف عن الطبنجة قائلاً في مرح:

الراجل افكرني ظابط لما شاف جراب المسدس . . لولا كده
كان زمان مروة هي اللي بتفوقنا ف المستشفى أو بتقرا على
روحنا الفاتحة .

شريف يظل ينظر إلى جيتام بشك ثم يقول بضيق:

ويا ترى بقى سقفت لك؟ ولا إديتك وردة على بطولتك
وشجاعتك؟

جيتام ينظر له بدهشة ويقول بنبرة ما بين الدهول والغضب:

تقصد إيه؟

شريف ينهض واقفاً، ويقول غاضباً:

اسمع يا جيتام . . إحنا مش ملايكة . . وبرضه مش شياطين . .
عشان كده أنا مش هسيء الظن ببيك وأصدق شيطاني اللي
بيقولي إن كل اللي حصل ده خطة من خططك . . لكن ف
نفس الوقت مش هقدر أصدق ملاكي اللي بيقول إنك صاحب
صاحبه اللي ضحى بحبه عشان خاطره .

جيتام (بصرامة):

ما ينفعش تسيء الظن بيا ولو لحظة واحدة بعد كل اللي عملته
عشانك . . أنا لو ف دماغى أرتبط بالطريقة دي كنت علقت نص
بنات مصر . . والنص الثاني كان استنى في الويننج ليست .

شريف (بحيرة):

معقولة الصدفة ممكن توصل للدرجة دي؟

جيتام (بصرامة ساخرة):

وهو يعني كان معقول التاريخ يعيد نفسه بالشكل ده؟



استديو برنامج جيتام

جيتام يقف في منتصف الاستديو ويقول بلهجة متأثرة بما حدث:

جيتام:

النهارده حلقة مختلفة عن كل اللي فات . . هنتكلم فيها عن القسمة والنصيب . . عشان كده مش هنشوف مع بعض قصص حب بنتحول من حلم لحقيقة زي ما عودتكم . . لكن هنسمع قصص حب بعد ما اتحققت . . رفضت القسمة والنصيب إنها تكمل للنهاية.

وفي حلقتها، تقف مروة في منتصف الاستديو وتقول بلهجة تفيض بالمرح الممزوج بالتحدي:

مروة:

ولأول مرة هستبعد مبدأ الكيمياء في الحب . . وهشجع معاكم مبدأ التخطيط ف الارتباط . . على الأقل نوع من التغيير عشان محدش يتهمني بال تكرار.

أما شريف فيجلس في غرفته المظلمة على مكتبه أمام جهاز اللاب توب ، ونراه يكتب بانهماك ، بينما نسمع صوت عقله الذي يردد ما يكتبه:

«كل قصة حب فاشلة مررت بيها . . كنت بحس معاها برغبة شديدة في الموت ، لأن الحياة مبقاش ليها طعم ومعنى . . وأفضل أسأل نفسي . . معقول ممكن أعوض حبييتي اللي راحت بواحدة تانية؟ . . ويا ترى هحبها نفس الحب؟ وهتيجي امتي؟ وحبى ليها هيكمل ولا هتصدم تاني؟ وأسئلة تانية كتير كنت بسألها من بين دموعي اللي ما بتنشفش . . لكن الحياة ف كل مرة كانت بتستمر ولا كأن حاجة حصلت . . إلا المرة دي . . مش ممكن حياتي هتكمّل من غير مروة»

نعود لـ(جيتام) الذي مازال يواصل تقديم حلقاته ، بصوت جريح قائلاً:

وساعتها . . اقتنع صاحبنا لأول مرة ف حياته بالقسمة والنصيب وصدق إن نجاح أي قصة حب مستحيل نضمناها . . إلا لو ضمنا إنا ماسكين الميه بإدينا .

وفي حجرتها المظلمة، تجلس (جيرمين) على سريرها، وعلى رجليها المستربعة تضع جهاز اللاب توب، بينما لا نجد أي إضاءة سوى إضاءة التلفزيون الذي يعمل بلا صوت على وضع الـ Mute، فيما تكتب جيرمين بانهاك، ونسمع صوت عقلها الذي يردد ما تكتبه:

«دلوقت بس عرفت خطورة اللعبة اللي بلعبها . . وتأكدت إنني مش قدما وماكانش ينعف أورش نفسي فيها من الأول . . لكن زي ما قال شكسبير . . الحب أعمى . . والمحبون لا يرون الحماسة التي يقترفون . . مش عارفة إزاي رغم كل الكتب والروايات اللي قريتها عن الحب مفهمتش المقولة اللي بتقول: الحب كالحرب . . من السهل أن تشعلها . . ومن

الصعب أن نخدمها .. دلوقت بس فهمتها .. (تبكي) وفهمت
مقولة ثانية بنقول: الحب لا يقتل العشاق .. هو فقط يجعلهم
معلقين بين الحياة والموت»

سمير رئيس القناة، يجلس على مكتبه متابعًا في التلفاز حلقة
مروة، وتطل من عينيه نظراته الثعلبية المميزة.
بينما تواصل مروة تقديم حلقتها.

مروة (بتأثر شديد):

وعشان كده من حقنا إننا مانفرطش ف حبنا اللي فضلنا
طول عمرنا ندور عليه .. هيحصل إيه يعني لو جربنا
نتحدى الظروف ونعاند خوفنا؟ .. يا هننجح ونطلع لسانا
لللكل .. يا هنتصدم واحنا من جوانا مقتنعين إننا عملنا اللي
علينا للنهاية.

لايزال شريف يجلس في غرفته المظلمة على مكتبه أمام جهاز اللاب
توب، ليكتب بانهماك بينما نسمع صوت عقله الذي يردد ما يكتبه:

«الأيام بتعدي ومروة لسه بتفكر .. يمكن معاملتها اتغيرت
معايا شوية؟ .. جايز .. لكن معرفش للأحسن واللا
للأسوأ .. مامتها طبعًا رحبت جدًا لما استعنت بيها عشان
تلين دماغها .. مش غريبة إنها تتحد معايا على بنتها مادام
في الاتحاد ده مصلحتها .. لكن لغاية دلوقت مفيش أي
نتيجة .. أنا خايف أوي .. يا رب قدام اللي فيه الخير»

وفي غرفة الطفلة (مي) التي يكفلها (جيتام) بدار الأيتام ، نرى مشرفة الدار وهي تفتح باب الغرفة ومعها (مروة) التي تدخل عليها وتعانقها ، ثم تعطيها كيساً به هدايا ، وكيساً آخر به ساندوتشات ، بينما مازال صوت (مروة) يتردد في الخلفية متذكرة نهاية حلقتها الماضية:

«من أول النهار ده .. اللي عندها خطة عايزه توقع بيها حبيبها يا ريت تبعتها لنا .. وصاحبة أحسن خطة هتفوز معنا بأعظم جايزة ممكن الإنسان يفوز بيها .. الحب» .

ثم تقول (مروة) لـ(مي) بمرح وحب:

أديني جت لك أهو يا ست مي زي ما طلبتي .. وجبت لك الساندوتشات واللعب اللي بتحبيبها كمان .. اعلمي حسابك بقى مش هسيبك إلا لما تحكي لي كل حاجة عن جيتام .. من طأطأ .. لسلامو عليكو .

مي:

مش لما ترمي بياضك الأول .

مروة تبتسم ثم تقوم بفتح أحد الأكياس ، لتخرج منه الساندوتشات وتقوم برصها على أحد الصواني على سرير مي ، وتبدأ في إطعامها بالسندوتشات في فمها ، بينما تأكل مي باستمتاع ..

تقف لقمة في زور (مي) فتظل تكح ، قبل أن تخبطها مروة على ظهرها ثم تناولها كوب ماء لتشرب ..

مروة تفتح كيس الهدايا وتخرج منه عروسة كبيرة وتعطيها لـ(مي)، لكنها تسحبها مرة أخرى بمرح وشقاوة قبل أن تمسكها الطفلة الجميلة..

مروة ومي يسرحان للعروسة شعرها..

مروة تخرج Game boy وتفتحه أمام مي، ثم تلعب به بينما تشبث مي وتحاول أن تشده من يد مروة..

مروة تضع مي على سريرها وتمسح على شعرها لتنام..

كل هذا يحدث بينما نسمع في الخلفية صوت (مي) التي تقول لـ (مروة)

«أول سؤال سألته لجيتام بعد ما اتعرفت عليه.. إيه الفرق بين الراجل والست.. رد عليا وقال: الحاجة الوحيدة اللي بيشارك فيها الراجل والست إنهم بني آدمين.. غير كده هتلاقي كل واحد مخلوق تاني خالص.. قولت ليه ربنا ما خلقش البني آدمين نوع واحد وريحنا.. ضحك وقال عشان يكون فيه جنة ونار.. ومع الوقت.. عرفت إنه حب يكفل بنت مش ولد عشان يطلعها خالية من عيوب باقي البنات اللي ربنا خلقها.. وقال إن دي رسالته ف الحياة.. وف كل مرة بيزورني فيها بيديني دروس ف كشكول جابهولي مخصوص.. طلب مني أحافظ عليه عشان مش هلاقي زيه ف حياتي».

الجملة الأخيرة نسمعها ونحن نرى مروة تمسح على شعر مي لتنام، وما إن يأتي ذكر الكشكول حتى تنتفض مروة وتسالها باهتمام:

مروءة:

وهو فين الكشكول ده؟

مي تضع يدها تحت الوسادة وتسحبه لتسلمه لمروءة قائلة:

جيتام حلفني إني أحطه تحت المخدة وأقرأ منه كل يوم قبل
ما انام .

مروءة نفر صفحاته باهتمام ثم تلثفت لمي وتقول باستعطاف .

مروءة:

مي يا حبييتي . . أنا هنزل أصور الكشكول ده واجيبه
تاني . . ممكن؟

مي تبتسم برقة وعذوبة ثم تهز رأسها بما معناه (ممكن)، فتحضنها مروءة
بسعادة وتقبلها من رأسها .

مروءة:

يا حبيبة قلبي .

الآن تنام مروءة فوق سريرها في غرفتها ذات الإضاءة الخافتة،
ونراها تقرأ بانهماك على ضوء الأباجورة من ورق الكشكول الذي
صورته من مي ، وهي تتخيل أنها تسمع هذا الكلام بصوت (جيتام):

«الراجل بيحب الأكشن . . عشان كده بيحب الأفلام اللي بتبدأ
بمطاردة وتخلص بانفجار . . لكن الست بتحب الأفلام
الرومانسية . . اللي بتبدأ بكلمة حلوة وتخلص ببوسة . . (نرى
ابتسامة مرحة على وجه مروءة) .

الراجل ممكن يدفع 2 جنيه ف حاجة مابتساويش غير

جنيه .. بس محتاجها .. والست تقدر تشتري بجنيه حاجة
تسوى 2 جنيه بس مش محتاجاها .. (مروة ترفع حاجبيها
وقد راق لها الجملة).

عشان يكون الرجل سعيد مع فتاة أحلامه لازم يحبها ..
وساعتها هيفهمها .. وعشان تكون الست سعيدة مع فارس
أحلامها لازم تفهمه .. وساعتها هتجبه .. (مروة تغلق
الورق وتسرح في الجملة الأخيرة)⁽¹⁾.



في أحد محلات الكباب

جيتام يجلس مع مي قائلاً بتحفز وترقب

جيتام:

أديني يا ستي عزمك عند الكبابجي زي ما طلبتي .. كان
ماله الكافية بتاعي واللا زيزو بتاع الكبدة؟

مي:

مش عابزة أقعد معاك ف مكان حد يعرفك فيه .. عندي
ليك مفاجأة.

جيتام (بتوتر):

طب انطقي بسرعة عشان مبحش المفاجآت .

(1) الخطاب الذي تقرأه مروة مأخوذ من أحد مقالات صديقي الكاتب عمر طاهر .

الجرسون (بحرج):

أفندم؟

جيتام:

مفيش أفندم .. اتفضل جاوب

الجرسون (يلوح بيديه محاولاً الشرح):

المخاصي دي اللي هي بتبقى (يصمت بحيرة ويكور يديه
وهما مفتوحتان متابعاً) .. مخاصي .

جيتام يُغمي عين مي ويصيح فيه:

اخرس يا قليل الأدب .. إنت هتشرح كمان .. كان ناقص
تنزلوا صورتها مع المينيو .. أنا هوديكو ف ستين داهية ..
أخرج مع طفلة بريئة زي دي عشان أوكلها كباب تسألني
عن المخاصي؟ أنا لفيت مطاعم كتير وقليل مشوفتش الكلمة
دي عند حد .. لدرجة إنني افكرتها اتلغت م البهيمة .

الجرسون:

تتلغي إزاي يا فندم .. دي خلقه ربنا مش مناهج دراسية .

جيتام:

ياااه .. المفروض إنني أضحك دلوقت وأقول لك ببس يا
مان يعني والللا إيه؟

الجرسون:

لا يا فندم العفو .. احنا متأسفين .

جيتام يسلم الجارسون المينيو قائلاً:

خد المينيو الـ Uncut دي وأكتب عليها للكبار فقط ، وروح
هات لنا مينيو للزباين المؤدبين .

الجارسون:

تحت أمر معاليك يا باشا .

جيتام (يقول خلال انصراف الجارسون):

قال مخاصي قال . . ده اللي اختصوا ماتوا (ثم يلتفت لمي
بابتسامه رقيقة) . . معلى يا حبيبي . . عندي أنا دي .

الجارسون يأتي وقد أمسك بمينيو جديدة يسلمها لجيتام قائلاً:

اتفضل يا فندم المينيو الجديدة اللي سعادتك طلبتها .

مي:

لا خلاص مالهاش لزوم . . أنا عرفت خلاص هطلب إيه

الجارسون:

إيه يا فندم؟

مي:

واحد مخاصي!

جيتام ينظر لها بتلعثم ، ثم يقول للجرسون بكبرياء:

خليهم اتنين يا ابني .



في محل الكباب

جيتام ينظر لمي بذهول وأمام كل منهما طبق به بواقي ساندوتشات
وريش مأكولة بينما تنظر له مي بشقاوة وثقة فيقول جيتام:

جيتام:

بقي كل ده يطلع منك إنتي؟

مي (بشقاوة وخبث):

تلميذتك

جيتام:

تلميذة إيه وناظرة إيه بس .. إزاي عملي كده من ورايا؟ ..
بقي دي جزاتي بعد كل اللي عملته معاكي .

مي (بابتسامه واثقة):

مانا عملت كده عشان أرد جمالك عليا .

جيتام يتأمل ملامحها بدهشة دون أن ينبس ببنت شفة **فتتابع مي بشقاوة:**

مش إنت علمتني أشتري وما أبيعش وما أخليش حد يجيب
آخري .. أنا سيبت لها الحبل وعملت نفسي ضدك لغاية ما
هي اللي شنكلت نفسها .

جيتام (يأخذ نفساً عميقاً ثم يقول):

يعني الخلاصة إن مروة بتحبني أنا بس برضه مش عايزه
تظلم شريف وتضيعه من إيدها لأنه ممكن هو اللي يطلع
أنسب لها في الآخر .

مي (ترفع رأسها بثقة وتبتسم):

أينعم .

جيتام:

وإنني كنتي عاملة فيها حمامة سلام وبتقربينا لبعض عشان
تعملي معايا واجب .

مي (بشقاوة):

شطور . . وعلى فكرة هي تقريباً كده خلاص وصلت للقرار

جيتام ينهض من مكانه قائلاً لها:

طب خليك قاعدة هنا ما تتحركيش

جيتام ينصرف .



خارج محل الكباب

جيتام يقف أمام المحل ويجري مكاملة من خلال موبايله ثم يضع
الموبايل على إذنه فيأتيه صوت شريف .

ص . شريف:

كنت لسه هكلمك . . مروة لسه مكلماني وطلبت إننا نتقابل
يا معلم . . دعواتك .

الحزن والخجل يرتسم على ملامح جيتام وقد شعر إنه لا يجد ما يقول
ونرى عينيه وقد سيطر عليهما الحزن والألم .



في أحد الكافيهات

مروة تجلس مع شريف في الكافيه ، إذ نجد على وجه شريف ابتسامة
سعيدة وقد سيطرت الفرحة على ملامحه وهو يقول:
وإنتي بتقولي لي بلاش نتكلم في المكتب وتعالى نقعد في أي
كافيه بره كانت هاتجي لي سكتة قلبية .
مروة تنظر له بدهشة ممتزجة بالحزن .

مروة:

يا ساتر يا رب .

شريف:

وحياة ربنا بجد . . إنتي مش متخيلة أنا فرحت قد إيه . .
لدرجة إن الأوفيس بوي بتاع المكتب إديته 5 جنيه من غير
سبب والسايس بتاع الباركنج إديته 10 جنيه وبقيت عامل
زي سانتا كلوز . . أنا لو كان في جيبي ألف جنيه كنت
وزعتهم من غير تفكير .

مروة تنظر له بحزن وتلتهم الدموع في عينيها وهي تقول:

ياااااه . . إنت طيب أوي يا شريف ، وعندك شفافية عالية أوي

شريف (بابتسامة سعيدة):

إنني اللي يعرفك يا مروة ببيقى ناقص .

مروة (بدهشة):

ناقص؟

شريف (يتابع سريعاً بابتسامة رقيقة)

يطلع له جناحين ويبقى ملاك .

نرى نظرة حيرة وتردد في عين مروة بينما يتابع شريف:

ولو إنك الفترة اللي فاتت طلعتي عيني . . ما عندكيش

فكرة وإنتي بنتهربي مني أو تتجاهلي تليفوناتي أنا كنت ببقى

عامل إزاي . . عارفه اللي متعلق بين الحيا والموت؟

مروة تأخذ نفساً عميقاً وهي تشيح بوجهها بعيداً عنه لنتهي حالة التردد

وتقول بلهجة حاسمة رغم إن الكلمات تخرج منها صعبة وثقيلة:

أنا منكرش إنني فعلاً كنت بتعمد أبعد عنك وأتجاهل

تليفوناتك . . بس أنا مكنتش عايزه حاجة تأثر على قرارى . .

لأنى بحب لما آخذ قرار آخده مرة واحدة وبشكل نهائي

مفيهوش رجعة .

شريف ينظر لها بخوف وقد ارتسم القلق والتوتر على ملامحه وهو

يقول:

قلقتيني . . خشي ف الموضوع على طول ربنا يستر .

مروة تنظر في كل الاتجاهات في محاولة لاستجماع قوتها والتغلب على حرجها وخجلها ، ثم تخفض عينيها وتتنظر لأسفل قائلة:

مش عارفة أبدأ منين؟

شريف ينظر لعينيها ثم يبتسم ابتسامة فرحة قائلاً:

طب أقول لك أنا الأول على مفاجأة فرحتني أوي وإن شاء الله هتفرحك وتشجعك ع الكلام .

مروة تنظر لعينيها بخجل قائلة:

قول .

شريف (بابتسامة رقيقة):

جيتام هيخطب .

الصدمة والوجوم يسيطران على ملامح مروة ،

حتى إن عينيها تتسعان وترتعش شفتاها رعشة حاولت أن تبدوا بسيطتين ، قبل أن تلمع الدموع في عينيها وهي تحاول أن تبتسم لتداري صدمتها قائلة:

بجد؟

شريف (وكأنه لا يصدق نفسه من الفرحة):

تخلي؟ . . لسه قايل لي قبل ما أشرفك . . تبقى أخت جوز أخته اللي ف دبي . . عايشه مع أخته وباباه هناك وكلهم شكروا ف أخلاقها وتربيتها .

مروة (بابتسامة صفراء مصدومة):

فعلاً مفاجأة جميلة . . بس ما تخيلتش إن جيتام ممكن يتجوز بالطريقة دي .

شريف (بمرح):

ولا أنا . . بس هو قال إنه مفيش ولا قصة حب كملت معاه
للآخر . . لدرجة إنه اتعقد من الحب وقرر يتجوز جواز
صالونات لأنه هو ده اللي بينجح رغم إن الناس مش
بتحبه . . بيني وبينك . . هو فعلا عنده حق . . أنا لو مكنتش
قابلتك كان ممكن برضه أعمل كده .

مروة:

وهي مخلصه إيه بقى؟

شريف:

لا دي لسه بتدرس . . بسلامته اتشجع لما لاقاها صغيرة .
مروة تحاول أن تضحك فتخونها شفتاها المرتعشتان فتلتقط حقيبتها
وتنهض فجأة قائلة وهي تغالب دموعها التي تجاهد للنزول:

مروة:

عن إذنك

تعطي شريف ظهرها دون أن تنتظر رده فيسألها وهي تتصرف:

شريف:

رايحة فين؟

تجيبه من ظهرها:

التواليات

نرى دموعها تنزل ساخنة وهي تسرع الخطى نحو الحمام .



في التواليت

مروءة تدخل التواليت بسرعة وتغلق بابه بلهفة وكأنها تحاول الهرب من نظرات الناس ، وما إن تصبح داخل التواليت بمفردها حتى تبكي بحرقاة شديدة حتى إنها تنحني ولا تقوى على الوقوف فتستند على السيفون بأخر ما تبقى لديها من قووة حتى لا تسقط وعلى يمينها تجد شباك التواليت فتتظر للسماء بدموعها المنهمرة ووجهها الذي حمل حزن الدنيا كله ، وتطيل النظر للسماء لنرى في عينها العتاب والقهر والتضرع في آن واحد ، ثم تقول بصوت خافت متلجلج .

مروءة:

مش محتاجة أدعي . . وماينفعش أدعي هنا .

ثم ترفع سبابتها نحو السماء وكأنها تخاطب الله في سرها وبقلبها ، ثم تخفض سبابتها نحو قلبها ثم ترفع سبابتها مرة أخرى نحو السماء وكأنها تقول (إنت عارف وجعي وألمي) .



منزل مروءة

مروءة تدخل المنزل في خطوات ثقيلة حزينة ، ثم تبحث بعينها عن الدتها فلا تجدها ، فتتجه نحو غرفة والدتها .

مروءة تدخل غرفة والدتها فتجد والدتها تجلس فوق سجادة الصلاة

وتناشد الله بصوت مرتفع نسبياً وتقول بدموع وحرقة وهي ترفع يديها نحو السماء .

منى:

يا رب أنا ما عنديش مشكلة إني أدعي وما تستجابش لو حتى فضلت أدعي لك العمر كله . . بس اللي خايفة منه إنك تكون قافل أبواب السما ف وشي ودعايا ما بيوصلكش . . أعرف منين يا رب إن أبواب السما مفتوحة ودعايا بيوصل لك؟ . . لا بقى فيه أنبيا نسألهم ولا إنت بتكلم النبي آدمين . . خايفة تكون غضبان عليا بذنب عملته ومش عارفاه . . خايفة تبليني ف أولادي وتعاقبني فيهم . . لو أنا مزعلاك يا رب عذبني بس فرح قلب ولادي اللي مالهمش غيرك ولو إن رحمتك وسعت كل شيء . . عايزة أفتح السما وأخش لك بس مش عارفة .

عند الجملة الأخيرة يزداد نحيب الأم بحرقة فيمتزج بدموع مروءة الساخنة ونحيبها، فتسمع الأم نحيب ابنتها فتلتفت الأم لها بخجل وكأن مروءة رأتها في فعل فاضح بينما نجد وجهها غارقاً في الدموع، فتتحول دموع مروءة ونحيبها إلى ضحكة مفتعلة وهي تجري على أمها وتنحني على ركبتيها لتحتضن أمها قائلة في سعادة تمثيلية .

مروءة:

ربنا استجاب دعوتك يا ماما . . أنا هتخطب خلاص .

الأم تحتضن مروءة بسعادة بالغة وهي تقول بسعادة وقد تحولت دموع الحزن لدموع السعادة .

منى:

ألف حمد وشكر ليك يا رب

بينما نرى ملامح مروة وهي تبكي في حرقه في حضن أمها دون أن تلاحظ أمها ، ثم تأخذ مروة نفساً عميقاً وتمسح دموعها وهي تبتعد عن حضن أمها قائلة:

فين حسام بقى عشان أفرحه هو كمان؟

سرعان ما يسيطر الحزن مرة أخرى على وجه الأم وهي تقول:
بلاش بدل ما أضيّع فرحتك .

مروة (بقلق):

ليه ماله؟

منى:

إنجي خطيبته كلمتني وقالت إن هو اللي نهى معاها كل شيء لأنه مبقاش جدير بيها . . . وبعدين عرفت إنه ملموم على واحدة بتصرف عليه وماشي معاها .

مروة (بقلق):

إزاي الكلام ده؟ . . هو اتجنن!

منى:

الظاهر كده . . بقاله يومين مختفي وبحاول أكلمه ع الموبايل بس قافله .

مرودة (بغضب):

وإزاي ماتعرفينيش .

منى:

إنتي ف إيه واللاف إيه يا بنتي؟

مرودة تلتقط موبايلها من حقيبتها وتضرب أزراره ، فتسألها أمها بلهفة:

هتعملي إيه يا مرودة؟

مرودة:

هكلم إنجي أفهم منها كل حاجة .. أنا مش هسمح إن أخويا

يضيع مني .



مكتب جيتام في الكافيه

شريف يدخل مكتب جيتام بفرحة عارمة صائحًا بكل سعادة الدنيا .

جيتام:

لكن شريف لا يجد جيتام فيجلس على المقعد المقابل لمكتبه ، قبل أن

يدخل سيد شمعة ويقول بلهفته العصبية الصعيدية:

إيه يا أستاذ .. دي أصول دي؟ .. تدخل كده من غير استئذان؟!

شريف:

إننت مين يا ابني وإزاي تكلمني بالطريقة دي؟ إننت عارف

أنا أقرب لجيتام إيه؟

سيد (بعصبيية):

إيه؟

شريف:

أخوه.

سيد:

إذا كنت أنا مقدرش ادخل عليه من غير استئذان . . يقوم
يدخل عليه أخوه . . تيجي إزاي دي؟

شريف:

أنا مش عارف إزاي جيتام شغل واحد بالغباء ده عنده . . لما
بيجي ويعرف باللي حصل هيمشيك فوراً . . ابقى خلي عقلك
الضلم ده ينفعك .

سيد (بقلق):

لا والنبي يا بيه . . لا مؤاخذة . . اللي ما يعرفك يجهلك .

شريف:

طب خلاص ، بس ابقى ركز ف كلامك . . فين حسين؟

سيد:

واخد أجازة عشان بيخطب وأنا ماسك المحل مكانه مؤقتاً .

شريف:

طب روح هات لي إسبريسو عقبال ما جيتام بيجي .



للمزيد من الكتب الحصرية ، زورونا على
موقع عصير الكتب

www.Book-juice.com

ونتظر ارائكم عن راىكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

سيّد:

جيتام بيه مش جاي النهارده .

شريف (عاقدًا حاجبيه):

غريبة . . وموبايله كمان مقفول . . أو مال راح فين؟

سيد (يهز رأسه بطريقة كوميدية):

مش عارف .

شريف ينهض قائلاً:

طب لو شوفته قوله شريف جه وكان عايزك ضروري .

سيّد:

أقوله شريف واللا أخوك؟

شريف ينظر له بغضب ثم يقول:

No Comment

سيّد:

الله يسامحك .

شريف ينصرف؛ بينما يفكر سيد ملياً قبل أن ينادي عليه

سيّد:

شريف بيه



شريف يلتفت له فيخرج سيد سي دي من جيبه ويقول:

بما إن جيتام بيه خرج ولم يعد وإنتوا طلعتوا إخوات . .
حسين كان سايب لي السي دي ده وقال لازم أديه لمستر
جيتام ف المعاد المتفق عليه وإلا هيتقطع عيشه . . يا ريت
تديهوله .

شريف يأخذ السي دي ويقلبه بين يديه بدهشة قائلاً:

ده فيه إيه السي دي ده؟

سيد (بصعيدية):

أبروجكت .

شريف ينظر له ساخراً ثم ينصرف بينما يقول سيد بلهجة صعيدية كوميدية:
أبروجكت ورحمة الله وبركاته .



شركة والدة شريف

شريف يصل بسيارته أمام مقر شركة والدته الفخم ثم يركنها قبل أن
يغادرها، ويتجه لمدخل الشركة بحماس وهمة ثم يدخل مقر الشركة
الفخم المبهر فينظر له الجميع باحترام، بينما يستقبله أحدهم مرتدياً بذلة
سوداء أنيقة قائلاً في لهجة بها الكثير من التبجيل .

الرجل:

أهلاً وسهلاً يا دكتور . . نورتنا .

شريف يتجاهل جملته وهو يتقدم نحو مكتب والدته بحماس قائلاً:

ماما جوه؟

الرجل يسرع الخطى ليلحق بشريف الذي يسير مسرعاً بحماس وهو يقول

الرجل:

مدام صباح في قاعة الاجتماعات يا فندم وعندها . .

شريف (مقاطعاً):

هدخل لها .

شريف يتقدم نحو قاعة الاجتماعات بينما يتوقف الرجل وهو ينظر لشريف بدهشة .



داخل قاعة الاجتماعات

شريف يدخل غرفة الاجتماعات حيث النور المظلم، وأحدهم يقف على شاشة البروجكتور بينما ينظر جميع الجالسين على المائدة نحو الشاشة فيتوقف المشهد وينظر الجميع تجاه شريف الذي يضيء النور قائلاً بصراحة:

عايزك يا ماما ف موضوع ضروري جداً لو سمحتي .

الأم التي صبغت شعرها باللون الأصفر، ووضعت عدسات زرقاء، وطلت أظافرها باللون الأحمر، وارتدت بذلة أنيقة وحلت عنقها بعقد

ألماظ ترمق شريف بنظرة طويلة، ويتجمد المشهد لثوانٍ، ثم تنظر
الأم للموظفين قائلة ببرود:

O.K يا جماعة . . . That's enough today

الموظفون ينهضون ويخلون القاعة بسرعة رغم كثافة عددهم، بينما تشعل
الأم سيجاراً وتأخذ نفساً عميقاً وهي تضع ساقاً فوق ساق قائلة ببرود:

خير؟

شريف يجلس فوق أحد الكراسي واضعاً هو الآخر ساقاً فوق ساق
قائلاً بصرامة:

مهما كانت الخلافات بينا ماينفعش أروح أخطب من غيرك .

السيجار يسقط من يد الأم وهي تنظر لشريف غير مصدقة ما سمعت
بينما تختلج شفثاها وهي تنهض واقفة وتتقدم نحو شريف ببطء حتى
تصبح أمامه فتنحني نحوه وتمسك وجهه بيديها المرتعشتين ثم تجثو
على ركبتيها وتحضنه بفرحة شديدة قائلة بدموع الفرح:

كنت خايفة اليوم ده يبجي وانت لاغيني من حياتك زي
مالغنتي السنين اللي فاتت دي كلها .

شريف (بحزن):

إنتي اللي لغتيني .

الأم (بصدمة):

أنا ؟ أنا برضه اللي . . .

شريف (مقاطعًا):

مش وقته يا ماما . . خلىنا في اللي جاي .
فجأة الباب ينفتح وتدخل مروة التي يصعقها الموقف ، حينما
ترى شريفًا في حضن أمه وتنتظر لهما بدهشة ، بينما يأتي
خلفها الموظف الذي يصيح فيها .

الموظف:

إنتي إزاي تدخلتي كده من غير استئذان؟ . . بأي حق . .
شريف ينهض مقاطعًا صوت الموظف بصوته المندمش وهو ينظر
لمروة بدهشة
شريف:

مروة؟

مروة (بصدمة):

إننت كمان وقعت في شباكها؟

الأم تنهض وتسالها بلهجة غاضبة
الأم:

شباك إيه؟ . . إننتي مين؟

مروة:

أنا أخت اللي انتي مرافقاه وواحدة صحته وشبابه بفلوسك

الأم:

حسام؟

مرورة:

أيوه حسام يا معدومة القلب والضمير .. دوري على حد
تاني تمثلي معاه فيلم شباب امراه

الأم (صارخة):

اخرسي .. ده جوزي على سنة الله ورسوله .
مرورة تصعق من الرد وتتسع عيناها بينما تسأل الأم شريفًا
الأم:

إنت تعرف الحيوانة دي منين؟!
شريف (وقد اغرورقت عيناها بالدموع غير مصدق نفسه):
دي حبييتي اللي كنت هخطبها.

مرورة (باكية):

ماتكلمش .. أوعى تنطقها تاني على لسانك .
نسمع صوت حسام من خارج الكادر .

ص . حسام

صباح .

ثم يدخل إلى القاعة وهو ينادي على صباح برقة ودلع

حسام:

صباحتي .. فينك يا بيبى؟

حسام يصدم حينما يجد مرورة ، وينظر للموقف بدهشة بينما يتبادل
الجميع النظر .



ريسبشن منزل مروة

شريف بيكي أمام مروة في منزلها بحضور والدتها التي تنظر له بحيرة ، بينما تنظر له مروة بغضب وصرامة .

شريف (باكياً):

أنا عشت طول عمري بدور على الإنسانية اللي تشد قلبي . .
وعاهدت نفسي إني لما ألقاها لا يمكن أسيبها تضيع مني
أبدأ . . لكن ما عملتش حسابي إنك إنتي اللي تضيعيني . . ده
ربنا نفسه مش هيجاسبنا بذنوب أهلنا . . ليه تدمري بني آدم
عاش عمره كله بيدور عليك؟ مش عشان يكسب من
وراكي حاجة ولا يا خد منك أي شيء . . هو كان بيدور
عليكي بس عشان عنده كل الحب اللي في الدنيا . . وكل
المشاعر الجميلة اللي ربنا خلقها . . وكل السعادة اللي بتحلم
بيها أي بنت ، عشان يديهلمك . . وأول ما لاقيتك عملت
حسابي عليك وإنتي بنفسك حسستيني إنك عاملة حسابك
عليا . . جاية دلوقت بعد ما علقيني بيكي أكثر تقولي أنا
اكتشفت إني كنت غلط؟ . . جاية على أكثر حاجة صح عملتها
ف حق نفسك وقررتي إنك تمحيها بأكبر ذنب ممكن تعمله
ف عمرك كله؟ . . لو أنتي ما خدتيش كل اللي جوايا محدش
تاني ممكن ياخده . . لأن الحب والمشاعر والأحاسيس اللي
ف قلبي اتخلقوا باسمك إنتي وبس . . بعدك مش هيقوا لحد
تاني . . كل البنات اللي ربنا خلقها عايشة طول عمرها بتدور

على ذرة من كل ده .. إزاي تستخسري ف نفسك اللي كل
الناس هتموت عليه؟! طب كنتي اعلمي نفسك حتى بتاخدوهم
مني وسيني أفرح شوية إنني عطيتهمك .. وأول ما أدور
وأمشي ارميهم .. ارميهم زي ما رميتيني وأنا موافق ..
عشان من الأول مكنتش منتظر منك أي مقابل .. الحاجة
الوحيدة اللي كنت منتظرها إنني أحقق لك اللي انتي
منتظره .. (تحمر عيناه من البكاء وتؤلمه بشدة فيفركهما
متابعاً) عيني واجعاني أوي .. طول عمري كنت بخاف
عليها .. دلوقت نفسي تتعمي عشان ما تشوفش حد من
بعدك .. وقلبي اللي انتي دمرتيه وبيدق دلوقت أوي ..
نفسى يقف خالص عشان ما يدقش ولا دقة واحدة لأي
مخلوق تاني .. يا رب .. بحق رحمتك اللي البشر حرموني
منها .. خدني عندك وريحني .. عشان لو أنا استنيت بعد
النهارده هموت نفسي .. أنا خسرت الدنيا خلاص ومبقتش
عايز منها حاجة .. أرجوك متخلينيش أخسر الآخرة كمان .

الأم تبكي بحرقة بينما تنزل دموع مروة ساخنة وهي تقول بتأثر:

من الأول واحنا مش لبعض .. يمكن ربنا عمل كده عشان
يحمينا من خطوة كنا هنخطيها وإحنا مش حاسبناها .. كل
شيء قسمة ونصيب .

شريف (باكيًا):

سهل عليكى دلوقت تقولي كده لأنك مش انتي المجروحة .. بس
على فكرة .. القسمة والنصيب إحنا المسؤولين عنهم بقراراتنا .

مرودة (باكية):

كفاية يا شريف أرجوك .. أنا مقدرش أستحمل كل ده .

شريف:

ولا أنا .. اللي اتعمل فيا ده فوق أي احتمال ..
يا جبروتك .. بتدبجيني ومش عايزاني حتى أصرخ من
الألم؟ .. مستكتره عليا أصرخ وأنا بموت عشان صرختي
بتوجع لك ضميرك؟ .. حاضر .. هموت وأنا ساكت ..
مادام ده اللي يرضيكي .

شريف يهم بالانصراف وما إن يصل للباب ويفتحه حتى يلتفت قائلاً:

شريف:

بس مش هموت لو حدي .. هموت أنا وكل المسؤولين عن
اللي حصل لي ..

شريف ينصرف مغلقاً الباب خلفه في عنف .



منزل شريف وجيتام

شريف يدخل الشقة ثائراً وهو يصيح بثورة:

جيتا!!!!!! .. جيتا!!!!!! ام

نسمع مقدمة أغنية «لأ مش أنا اللي ابكي» من الراديو المشغل في الشقة ..

فوق جبل المقطم

جيتام يجلس فوق إحدى الصخور متطلعًا إلى القاهرة من أعلى،
مسترجعًا نصائحه لمي:

لما تقابلك مشكلة تكسرك وماتعرفيش تلاقى لها حل ..
دوري على أعلى حنة تقدرى تطلعها .. وبصي على
مشكلتك من فوق .. هتشوفي الدنيا صغيرة أوي ومفيش
حاجة فيها مستاهلة .

ابتسامة حزينة ترسم على وجه جيتام وهو ما زال يتذكر .

ص . مي:

وانت بتحب تطلع فين؟

ص . جيتام:

المقطم .. عشان أشوف مصر بوشينها .. الحلو والوحش .

وفجأة يسمع صوت مروة خلفه .

جيتام

جيتام يعقد حاجبيه ويلتفت خلفه ببطء غير مصدق أذنيه،
فيجد مروة واقفة وعلى وجهها الخجل، وفي عينيها الدموع
فيتطلع كل منهما إلى الآخر بنظرات صامتة تحمل كل
المعاني .. وكل الكلام .



فوق جبل المقطم

مروة تجلس بجوار جيتام والهواء يضرب شعرها ويبعثره بقوة ، وتقول
له بعينين دامعتين يملؤهما الحب:

عشان كده أرجوك إوعى تبات ف بيتك النهارده . . شريف
فقد أعصابه ويمكن يعمل أي حاجة بعد ما افكر إن انت اللي
خططت لكل ده .

جيتام (متطلعًا إلى عينيها):

لدرجة إنتي خايفة عليا؟

مروة:

لدرجة دي إنت مش واخد بالك؟

جيتام:

حتي لو واخد . . مش هتفرق كثير . . هو شريف مافالكيش
إني هخطب؟

مروة (بابتسامة يملؤها الحرج):

مي قالت لي إنك ضحكت عليه .

جيتام ينظر لها بدهشة وصدمة فتتابع بابتسامة خجول:

لما خرجت برة المحل عشان نكلمه من وراها مشيت وراك
وسمعت المكالمة ودخلت ثاني من غير ما تحس . . تريبتك بقي .

جيتام (بحزن):

مروة . . شريف هيضع من بعدك .

مروة (برزانة وعقلانية):

هات لي واحد في الدنيا فشل ف حبه ومقالش إنه
هضيع .. (تتابع بخجل وكأنها تتحدث عن نفسها) وهات لي
واحدة قالت إنها هتموت من بعد حبيبها وماتت .. اسألني أنا .

جيتام (بعتاب):

بس انتي ظلمتية عشان خدتيه بذنوب أمه .

مروة (بتحد):

لو كنت بحبه بجد كنت هعفر له .. صدقني لو ارتببت بيه
هظلمه أكثر .

جيتام (بحب)

ولو أنا ارتببت بيكي .. هتظلميني؟

مروة (بابتسامة رقيقة مليئة بالحب):

هديك عمري .

جيتام (ساخرًا):

هاتي لي واحدة قالت لحبيبها هديك عمري واديتهاوله بجد .

مروة (بشقاوة):

ويعني انت اللي هتديني عمرك بجد؟ يا شيخ روح ..

جيتام:

خلاف ولماضة من أولها .. هو احنا اتجوزنا بدري ولأ إيه؟

جيتام ومروة ينظران نحو السماء ونراهما يختفيان من الكادر تدريجيًا ونحن ننظر للسماء سامعين صوت مروة التي تقول بحب وفرحة:
دلوقت بس عرفت إن دعوة ماما استجابت من غير ما تفتح
السماء وتخش لربنا.

بينما نسمع صوت جيتام الساخر:

دلوقت بس عرفت إن أمك داعيالك .



غرفة نوم مروة

مروة تصحو على صوت طرقات أمها لباب غرفتها . .
تفرد ذراعيها وتمطى بكسل ، قبل أن تدخل عليها أمها وفي يدها سي
دي قانلة:

مروة . . البواب بعت الـ C.D ده دلوقت .

مروة تأخذ السي دي وتقلبه بين يديها بدهشة ثم تسأل أمها:
من مين؟

منى:

قال من واحد ماقالش اسمه . . ده أنا هزقته عشان ماسألهاوش .

مروة تنظر لأمها بسخرية وهي تقول:
لا فيكي الخير .

ثم نزيح الغطاء وتقوم .



غرفة نوم مروة

مروة تدخل غرفتها وفي يدها كوب النسكافيه، وقد سيطر النشاط على ملامحها وحركتها، ثم تجلس على مكتبها وتضع كوب النسكافيه جانباً، بينما تضع السي دي في السي دي روم بجهاز اللاب توب الخاص بها ثم تمسك بالكوب وتبدأ ترشف منه . .

الـ C.D يعمل ويظهر الجزء الأخير من المواجهة التي دارت بينها وبين جيتام حينما ذهبت إليه في الكافيه وتحدثه .

نرى على شاشة اللاب توب جيتام يقرب الـ MP5 لفمه ويضغط زر التسجيل قائلًا . .

جيتام:

أقر أنا جيتام الديق اللي اتصل بالإعلامية مروة من 4 شهور في برنامج أستروجين . . وراهنها إنه هيخليها تحبه . إني خسرت الرهان وعلى استعداد لتقبل أي حكم يصدر منها هي والجمهور .

مروة تنظر لشاشة اللاب توب بصدمة ثم تقوم بتجربة هذا المقطع لتصل إلى نهايته . .

نعود لشاشة اللاب توب حيث نرى مشهد مروة وهي تنظر لجيتام ساخرة قبل أن تعطيها ظهرها وتنصرف . .

ما إن تنصرف مروة مغلقة الباب خلفها حتى ينظر جيتام إلى لوحة مراقبة تتابع الكافيه كله، موجودة في مكتبه، ثم ينظر لكاميرا

موجودة في سقف مكتبه وينهض واقفاً أمامها ملوحاً بسبابته أمام الكاميرا في تحدّ.

جيتام:

كده المكسب بقى شبه مستحيل . . وده اللي هيخلي اللعبة أجمل . . بعد 4 شهور هتشوفوا معايا إزاي صاحبتنا هتخسر الرهان رغم إن اللعب بقى ع المكشوف . . الكلام ده مثبت بالصوت والصورة عشان كمان 4 شهور هعرضه ليكم وأفكر مروة بيه .

تنسال الدموع الساخنة على وجنتي مروة ، وهي تهز رأسها بصدمة غير مصدقة نفسها ، قبل أن تضع ذراعيها على المكتب وتدفن فيهما رأسها وتجهش بالبكاء بصوت عالٍ مليء بالحرقرة والانكسار .



منزل جيتام وشريف

جيتام يدخل المنزل بترقب وحذر فيجده محطماً بعنف ، بينما يجد لآب توب شريف ملقى أرضاً فنتسع عيناه بصدمة وغضب وهو يفقد الأثاث الذي تم تدميره ، وما إن يصل إلى اللاب توب حتى يلتقطه فيجده مشغلاً فينظر إليه بصدمة وهو يفقده ثم يقرأ آخر ما كتبه شريف قبل أن يغادر الشقة .

«الآن فقط أكفر بكل ما آمنت به في الحب من نظريات ومسلمات . . لذا قررت أن أترك الحياة حتى لا أصبح مجرد حالة تنتظر دورها في الويتنج ليست»

وفي اللحظة نفسها، كان شريف يقود سيارته مسرعاً بالليل فوق جبل المقطم، وبجواره أمه المقيدة من ذراعيها وقد كتم فمها بينما ما زالت كلماته تتردد:

«سأموت أنا وأمي التي عذبتني بذنب لم أقرّفه . . غير أن الفارق بيننا أنني سأكون أنا القاتلُ رغم أنني المقتول . . وستكون هي القتيلة رغم أنها القاتلة . . لكن قبل الرحيل . . لا بد وأن أذيق كل من ظلمني من نفس الكأس»

نتنقل إلى أسفل منزل مروة حيث نرى شريقاً يعطي بواب العقار C.D ويطلب منه أن يعطيه لمروة . .

والدة مروة تدخل عليها غرفتها فتجدها في حالة انهيار فتحاول أن تهدئها بلا جدوى . .

نعود لشقة شريف وجيتام، حيث يقف جيتام بين الحطام وهو يقرأ ما في اللاب توب . .

مع آخر حرف يقرؤه، يسقط اللاب توب من يد جيتام ليتحطم أرضاً، بينما يخرج جيتام موبايله من جيبه ويضغط على أزراره متصلاً بشريف، لكنه يسمع رسالة الشبكة المسجلة التي تعمل حينما يكون الهاتف مغلقاً

الرسالة المسجلة:

الهاتف الذي طلبته غير متاح حاليًا . . من فضلك . . حاول الاتصال في وقتٍ لاحق .

جيتام يجري مسرعاً نحو باب الشقة ويفتحه ثم يخرج ويغلقه خلفه .



على باب منزل مروة

جيتام يطرق باب منزل مروة بقوة وما إن تفتحه أمها وتطل عليه
بعيونها الباكية حتى تصيح فيه بغضب هادر .

منى:

إنت إيه اللي جابك؟؟ .. مش مكفيك قلب بنتي اللي كسرتة؟؟ ..
مش عايزه أشوف وشك هنا تاني .

منى تغلق الباب بعنف فيهتز جيتام مخضوضاً، ثم يخبط
على الباب مجدداً بقوة صائحاً .

جيتام:

افتحي يا ماما .. والله العظيم إنتي فاهمة غلط .. اديني
فرصة اشرح لك .

الباب يفتح فجأة وتخرج منى بسكين تضعه على رقبتة وهي تقول
بغضب وقد فقدت صوابها:

لو خبطت تاني أو ظهرت ف حياتها مقتلك .. إنت فاهم؟؟ .. مقتلك

جيتام ينظر لها بحزن بينما نسمع صوت مروة ينبعث من التلفاز الذي
يعمل بالداخل

ص . مروة:

بعد 3 شهور عدوا علينا بنكون نهينا مع بعض دورة برامجية
جديدة

جيتام ينظر لداخل الشقة حيث التلفاز الذي يذيع برنامج «أستروجين»
مردداً بلهفة:

مروءة:

ثم يتجاوز والدتها ويدخل كالمشدوه قبل أن يقف أمام شاشة التلفاز
ويرى مروءة التي تطل بعينها اللامعتين على الشاشة قائلة:

وبعد جلسات عمل طويلة مع إدارة القناة .. اتفقنا إننا نخلي
حلقة النهارده حلقة خاصة جداً .. كلها مفاجآت

مروءة تقوم فجأة بخلع سماعة الإيربيز لتقطع صلتها عن الكنترول روم
الموجود به المخرج ..

وفي الكنترول روم ، تتسع عينا المخرج وهو ينظر للشاشة التي يرى
من خلالها مروءة وهي تخلع الإيربيز ، ويصبح بعصبية في مساعده

المخرج:

إيه ده؟ .. إيه اللي مروءة عملته ده؟ .. هكلمها إزاي كده؟ ..
حضّر يابني فاصل ننزل بيه بسرعة

بينما أخذت مروءة نفساً عميقاً وهي لا تزال تقدم حلقتها على الهواء ،
قبل أن تقول بدموعها:

أهم مفاجأة هتكلم عنها النهارده يمكن عدد كبير من
حضراتكوا نسيها .. أنا نفسي كنت ناسياها وشايلها من
حساباتي خالص .

تخرج C.D من جيب بدلتها وتلوح به أمام الكاميرا وهي تتابع:

لغاية ماجالي الـ C.D ده من فاعل خير حب يفوقني على حقيقتي اللي مكنتش عارفها . . حقيقة مذيعة عملت نفسها خبيرة عاطفية بتحل مشاكل البنات والسنات وتعلمهم يهزموا أحزانهم وهي أكثر واحدة محتاجة للي ينصحتها . . عشان كده نسيت خالص رهان كلكم شفتوه من واحد اتصل بيا واتحداني إنه هيخليني أحبه واعترف بحبي ليه ف خلال 4 شهور . . وفعلاً وقعت ف حبه . . (تبكي وتنزل دموعها الساخنة) وبعلمن قدام العالم كله إني حبيته . . وخسرت الرهان . . عشان كده أنا مش جديرة بتقتكم فيا . . ولا ثقة بإدارة القناة . . ومن النهارده مش هنصحكم تاني . . لأن فاقد الشيء لا يعطيه . . أنا بعنزل التقديم . . والحب . . والحياة نفسها قدام حضراتكم ومش راجعة تاني . . أبداً.

وفي الكنترول روم، هتف المخرج بعصبية:

الله يخرب بيتك

مساعد المخرج:

الفاصل جهز يا فندم

المخرج (صارخاً):

انزل بيه بسرعة

وفي ريسيشن منزل مروة، كان جيتام ينظر للشاشة متأملاً فاصل البرنامج الذي جاء بمثابة الفصل الأخير من المسرحية، فيما بكت أمها

بحرقة قائلة بضعف وقد خارت قواها:

حسبنا الله ونعم الوكيل فيك .

جيتام تنهمر دموعه وهو ينظر لها ، ثم يجري مغادراً الشقة



داخل استديو برنامج مروة

جيتام يدخل الاستديو بلهفة فيجده خاليًا من الجمهور ، ولا أثر داخله لأحد ، ليتأمل الاستديو وقد لمعت الدموع في عينيه . .

سمير رئيس القناة يدخل الاستديو وقد أمسك في يديه C.D يلوح به أمام جيتام قائلاً بصرامة

اللي ف الـ C.D ده صدر منك بجد؟

جيتام يخفض عينيه بخجل ويقول:

أيوه فندم بس والله . .

سمير يقاطعه بإشارة من يده وهو يخرج ورقة مطوية من جيب بذلته ويلوح بها قائلاً:

دي استقالة مروة . . المذيعة المحترمة الرقيقة اللي مشيت من القناة بإرادتها . . أما انت فهتمشي منها مر فود . . (يشير نحو الباب صارخاً فيه) . . بره .

جيتام ينظر للأرض ثم يمشي وهو يجر أذيال الخيبة .



منزل جيتام

جيتام يدخل منزله فيجد كلبه الضخم وقد فارق الحياة، فيحاول أن يوقظه بلا جدوى في حين نسمع أغنية محمد عبد الوهاب «لأ مش أنا اللي أبكي» إذ يتردد المقطع الذي يقول «اشمعني أنا عهدك.. صوتته وراعت ودك.. والعمر داب حواليه.. لكن اللي بيحبك.. مالوش تمن عندك.. والغالي يركز فيه.. أنا راح زمني هدر.. ولاكانش عندك خبر»

نشاهد بعدها جيتام وهو يغادر منزل مروة بحزن وقد أطلق لحيته، ونرى والدتها تغلق الباب خلفه وعلى وجنتيها الدموع، ثم نراه ينزل السلم ببطء وبخطوات ثقيلة مهمومة وقد تجاهل الأسانسير، بينما نسمع صوت والدة مروة في الخلفية

«قدمت استقالتها من الجامعة كمان.. وخذت شنطة هدومها من ورايا ومعرفش راحت فين.. أمانة عليك لو لقيتها قول لها أمك بتموت.. يا ريت تلحقها قبل ما تحصل القطة بتاعتك اللي ماتت»

جيتام يجهز حقيبة سفره في غرفته..

جيتام يخرج من غرفته ويتأمل الريسبشن الذي ما زال مدمر الأثاث، قبل أن يخرج هانفه المحمول ويجري مكالمة أخيرة يقول فيها:

أيوه يا بابا.. أنا خلاص حجزت وجاي لك على دبي.. (باكيًا)
يا ريت تستنوني إنت ومايا ف المطار عشان تعبان أوي.



دلوقت بس أمنت إن التاريخ بيعيد نفسه يا شريف
ثم تحلق الطائرة في الجو .



في أحد الشاليهات

مروة تجلس أمام النافذة التي تطل على البحر وتسمع أغنية عبد الوهاب
«لأ مش أنا اللي أبكي» إذ تسمع المقطع الذي يقول «فين قلبك من حبي
ليه . . ليه . . ليه ما سكنش جنبي . . كان مشاركني ف عمري ونسي
يشارك قلبي . . ما قدرش يعرفني . . ما عرفش يفهمني . . وعشان إيه
ما عرفشي . . ده ذنبك مش ذنبي» لتردد مع الأغنية الجملة الأخيرة
بتمتة صامتة من شفيتها بينما تنهمر الدموع الساخنة من عينيها بشدة
وتأثر في حين نرى موج البحر من النافذة وخلفها التلفاز يعمل لكنه
على وضع الـ Mute.

مروة تنظر من بين دموعها واندماجها نحو التلفاز، فإذ بها
تجد جيتام وهو يتحدث بابتسامة متفائلة دون أن تسمع صوته
فتغلق الراديو، وتوجه الريموت نحو التلفاز لإلغاء وضع
الـ Mute، لتسمع جيتام .

جيتام:

لكن المثل يقول: رب ضارة نافعة . . عشان كده أنا طلعت
من الظروف اللي مريت بيها الفترة الأخيرة بحكمة مهمة

جداً.. فهمك الخاطئ للأمور.. قد يقودك إلى الصواب
الذي عجز تفكيرك السليم عن الوصول إليه.. وعشان
تفهموا الحكمة أكثر خلوني أحكيكوا الحكاية من أولها.

ليعود جيتام بذاكرته إلى الخلف، مستعرضاً ما حدث في الساعات الماضية
جيتام داخل الطائرة يبحث عن مقعده فإذا به فجأة أمام شريف الذي
يرتدي بدلة عريس، وجيرمين التي ترتدي فستان عروسة وكذا عم
فكري الذي ارتدى بدلة أنيقة بينما يقول جيتام:

وأنا ف الطيارة اللي قررت اركبها عشان اهرب لحضن
أبويا واختي.. كانت ف انتظاري مفاجأة عمري.. صاحبي
اللي خسرتة.. مع البنبت اللي استفتزنتي وكانت سبب معرفتي
بمروة.. والاتنين إيه.. عريس وعروسة.

جيتام ينظر للموقف ذاهلاً، بينما يضحك عم فكري بكوميديّة وتبتسم
جيرمين بحرج، أما شريف فيرمق جيتام بنظرة طويلة قبل أن يعانق
كلاهما الآخر ويتحاضنان تحاضناً مخلصاً..

جيتام يجلس بجوار شريف وجيرمين اللذين يتحدثان له بحميمية
ويحكيان له الحكاية من بدايتها.

عم فكري يدخل شفته وداخلها يجد جيرمين قد حضرت له الأكل
وتجلس تأكل معه، لتستمع إلى حكاياته الكوميدية التي
لا تنتهي..

جيرمين تحمي عم فكري في البانيو وتليف له ظهره..

جيرمين تغادر الشقة من الباب الآخر وتراقب السلم جيداً، وعلى خلفية تلك المشاهد يتردد صوت جيتام في الخلفية:

عم فكري المجنون .. قصدي المريض نفسياً .. طلع والد جيرمين تلميذة شريف ف الجامعة .. ولأنه مريض نفسي وتصرفاته غريبة ومشاكله كتير .. عزلت جيرمين من سكنها القديم اللي اتفضحت فيه وقررت تروح لمكان جديد ماتعرفش فيه حد .. لكن لسوء حظها سكنت معانا أنا وشريف ف برج واحد .. وعشان ما تتفضحش جيرمين زي كل مرة .. خدت شقتين فتحتهم على بعض من غير ما حد يعرف .. واحدة سكنت فيها لوحدها والثانية أصبح المالك بتاعها عم فكري عشان يتحمل مسئوليته لوحده قدام الناس .. لكن المصيبة .. إنها كانت بتحب شريف .

نعود للطائرة إذ تنام جيرمين على كتف شريف وتقول بحب

جيرمين:

حببت فيه طبيته وحنينه .. رومانسيته وأحاسيسه العالية اللي ماشوفتش زيتها ف حياتي .. ده غير معاملته الكويسة مع بابا في الوقت اللي كل الناس كانت بتتريق عليه .

نعود لشاليه مروة التي تنظر فيه لشاشة التلفاز بذهول ..

نتنقل بعدها للمشاهد التالية التي يحكيها جيتام ليتردد صوته في الخلفية .. جيرمين تجلس في السكشن تستمع إلى شرح شريف وتنظر له بحب .. شريف يجلس في غرفته يكتب خواتمه على اللاب توب ، بحيث نرى

الكلمات التي يكتبها تظهر في لاب توب جيرمين وهي تجلس في غرفتها بعد أن اخترقت جهازه دون علمه . .

صوت جيتام:

حُب جيرمين لشريف صعب عليها الموقف وخلاها من المستحيل تعرّفه إنها جارته ف نفس العمارة . . لكن ف نفس الوقت استغلت وجودها معانا ف نفس البرج بالدخول ع النت ببلاش من خلال الـ Wi Fi اللي كنا فاتحينه من غير باسوورد . . ولأن الحب ف أوقات كتير بيدفع صاحبه للجنون . . بدأت جيرمين لعبة خطيرة ودتنا كلنا ف 60 داهية . . لما قررت إنها تعمل هاك على أجهزتنا عشان تعرف كل حاجة بنفكر فيها عن قرب . . وكشفت جيرمين كل أسرارنا وبلاوينا . . اشى خواطر بيكتبها شريف ع اللاب توب بتاعه عشان يفضض باللي جواه . . واشى مواقع . . إحم . . وحاجات تانية كتير إحنا نفسنا كنا ناسينها .

جيرمين تتصفح ملف «Word» خاص بشريف ، مكتوب فيه (لم أعد أقوى على مواجهة المجتمع في ظل انتسابي لأُم متصابية كهذه . . لقد تسببت في سخرية الجميع مني ولم تفلح جهودى عن إثنائها عن الزيجات الفاشلة التي انغمست فيها بعد موت والدي رحمه الله . . ولم يرغما هجري لها وابتعادي عنها على التراجع) . .

جيرمين تبكي بشدة ويحاول والدها مساعدتها لكنها تخرجه خارج غرفتها وتعلق على نفسها وترتمي فوق السرير وتبكي ف انهيار . .
جيرمين تجلس على اللاب توب تفكر وعلى وجنتيها دموع نشفت للتو . .
جيرمين تتصفح جروب جيتام ع الفيس بوك وعلى وجهها علامات التفكير . .

صوت جيتام:

لغاية ما اتصدّمت لما عرفت من مذكرات شريف إنه معجب بزميلته الجديدة مروة . . وحلمه إن القسمة والنصيب يجمعوهم ببعض . . فضلت تفكر . . وتستغل كل اللي عرفته عنا الفترة اللي فاتت . . لغاية ما حطت خطة ما تخرش الميا جيرمين تقوم بعمل جروب ضد جيتام على موقع الفيس بوك . .

جيتام يشاهد الجروب بغضب شديد . .

صوت جيتام:

الخطة كانت إنها تحط مروة ف طريقي بأي شكل . . عشان كده اتصلت ببرنامجها وقالت اسمي بكل وضوح .
جيرمين تجري مكالمة مع المخرج وما إن تدخل على الهواء حتى تقوم بالضغط على أحد الأزرار في الكمبيوتر الموصل بالتلفاز لتسجل مقطع الفيديو الذي تتحدث فيه مع مروة في البرنامج . .
نعود لوجه مروة المصدوم في الشاليه وهي تردد بدهشة الدنيا:

مرورة:

مش ممكن .

مرورة تتذكر حديثها مع جيرمين في الاستديو بطريقة الفلاش باك حين
قالت لها في إحدى الحلقات:

مرورة:

مشكلتك سهلة جداً يا جوجو . . لو كان هو من جواه حاسس
بيكي . . كل المطلوب منك إنك تستفزيه جداً وتخفني شوية
بعيد عنه . . ساعتها هينسى كل البنات اللي حواليه ومش
هيشوف غيرك ويبدأ يفكر إنتي ليه عملتي كده . . ودي
هتكون أول خطوة تقربكوا لبعض .

جيرمين تجلس على موقع الـ «Youtube» وعلى وجهها ابتسامة
ظافرة . .

جيرمين تجلس على موقع الفيس بوك لتتشيء جروب ضد
جيتام . .

جيتام يجلس في شفته على جهازه يشاهد مقطع الفيديو المسجل له وهو
في الجامعة وبيكي والكل ينظر له بسخرية . .

جيرمين تذهب لمكتب جيتام . .

صوت جيتام:

أتاريها سجلت مكالمتها مع مرورة وحطتها في الجروب اللي
عملته ضدي عشان تستفزني وتسخني على مرورة . . وخذت

ف نفس الوقت مقطع الفيديو اللي كان متسجل لي وأنا ف
الجامعة من لاب توب شريف اللي عملت عليه هاك وحطته
ف الجروب .. وبعدين جت لي الكافيه عشان تعذر لي
وتخلع م الموضوع .. بعد ما حطت النار جنب البنزين .

نعود للطائرة حيث تقول جيرمين لجيتام بخجل ..

جيرمين:

كان عندي أمل إن المواجهة بينكم ممكن تخليكووا تحبوا
بعض .. (تضحك وتتابع بمرح) اسكت .. مش أنا كمان
اللي عملت مداخلة تليفونية باسم أبرار .. بس بصراحة
النتيجة جت أحسن بكثير مما كنت متوقعة .

نعود للاستديو حيث يقول جيتام بنظرة ساخرة .

جيتام:

ماجاتش أحسن ولا حاجة .. لأن السحر انقلب ع الساحر
لما قررت أشيل الموضوع من دماغي .. ورجع شريف
يتمسك بمروة أكثر من الأول

نعود للطائرة حيث يقول شريف لجيتام ضاحكاً:

فعلاً .. لحد هنا وقف مبدأ التخطيط بتاعك .. بس القسمة
والنصيب كان ليهم كلمتهم لما طلع كل واحد فيكوا بيكفل
طفل يتيم .

جيرمين تنظر لشريف بحب ثم تقول لجيتام:

ساعتها فرحت جداً وحسيت إن فيه أمل . . لكن لما قرريت ف خواطر شريف إنه أسعد واحد ف الدنيا لأنك وعدته إنك هتسيب له مروة . . عرفت إنني لسه ف خطر .

نعود لشاليه مروة الذي تنظر فيه للتلفاز ثم تعود لتتذكر موقفاً هاماً بطريقة الفلاش باك . .

في مكتب شريف ومروة بالجامعة نرى جيرمين تنظر لشريف الذي ينصرف من المكتب ثم تدخل مروة ف الجامعة وتقرب من مروة التي تتطلع إلى شاشة اللاب توب وتقول جيرمين وفي عينيها الدموع وبصوت متهدج من الحزن والضعف .

جيرمين:

ممکن آخذ رأي حضرتك في موضوع مصيري؟

مروة:

طبعاً يا حبيبي اتفضلي .

جيرمين:

أنا بحب واحد كويس ومش ناقصة حاجة . . بس مامته ست مش كويسة كل يومين تتجوز واحد قد عيالها .

نعود للطائرة حيث تقول جيرمين لجيتام بحماس

جيرمين:

ولما رفضت مروة بانفعال شديد جداً وحذرتني من الارتباط ده .. عرفت إن عمرها ما هترتبط بشريف .. وقررت أكمل الخطة للنهاية .

نعود لمكتب شريف ومروة بالجامعة إذ تقول مروة بانفعال لجيرمين التي تجلس أمامها وفي عينيها الدموع والحزن

مروة:

واحدة زي دي هتفضل طول عمرها وصمة عار على حبيبك .. تخيلي بعد ما تتجوزوا وتخلي منه .. هتقولي لولادك عليها إيه؟ .. جدتكو ست ملعب وبتاعة عيال؟

نعود للطنافز حيث يقول جيتام بنفس نظرتة المتفائلة السعيدة:

جيتام:

ولأن القسمة والنصيب كتبوا إن أنا ومروة نكون لبعض .. فشلت كل محاولاتي إني أبعدھا عني .. لغاية ما اكتشفت بنفسها حقيقة أم شريف .. فقرر شريف أن ينتقم منا وبعث السي دي لمروة

نعود للطائرة حيث يقول شريف لجيتام بابتسامة خجول

شريف:

أنا عارف إن اللي عملته معاك ده كان قلة أدب مني ف لحظة ضعف .. بس انت كمان لازم تعذرني .. أصلك علمتني إنك لما تحط حاجة ف دماغك بتخطط لها لغاية ما تحببها .. عشان كده أسأت الظن فيك .

نعود لشاليه مروة الذي تنظر فيه للتفاز وقد انهمرت الدموع من
عينها وهي تنظر للتفاز الذي يقول فيه جيتام بتأثر:

جيتام:

مع إن الـ C.D أنا كنت نسيته خالص . . ولو كان حسين
فكرني بيه كنت هكسره . . لكن الفوزرة الكبيرة في
الموضوع بجد كانت سر ارتباط شريف بجيرمين .

نعود للطائرة حيث يقول شريف لجيتام بدهشة

شريف:

ف نفس اللحظة اللي كنت بجري بيها بالعربية وماما جنبي
ومفيش ف دماغي غير نية الانتحار . . كنت واثق إن دي
لحظتنا الأخيرة في الحياة .

شريف يقود سيارته بسرعة فوق المقطم وجواره أمه المقيدة . .

جيرمين تقود سيارتها بسرعة شديدة لتتجاوز سيارة شريف وتصبح
أمامه ثم تضغط الفرامل فجأة لتتوقف سيارتها أمام سيارة شريف الذي
يفاجأ بما حدث فيضغط بدوره الفرامل ليندفع هو وأمه للأمام ويرتطم
بالزجاج الأمامي بينما ترتطم سيارته بسيارة جيرمين . .

جيرمين:

وساعتها . . جه معاد لحظة الأكشن الحقيقية ف حياة شريف
عشان يعرف فيها الطرف الثاني هو بيحبه قد إيه . . (نغمز
بعينيها وتتابع) بس بطل الأكشن المرة دي كان أنا . .
مش هو .

تنظر مروة للتفاؤل وقد انهمرت الدموع من عينيها أكثر ف الوقت
الذي يقول فيه جيتام بتأثر

جيتام:

وحصلت مواجهة قوية بين شريف وجيرمين . . وعرف
منها إن أمها هي كمان كانت ست مش كويسة . . لدرجة إنها
رمتها وهي صغيرة بعد ما اتسببت في جنان أبوها الغني . .
اللي اكتشف خيانتها ومقدرش يستحمل الصدمة . . وانتهت
المواجهة بنجاح خطتها وجوازهم . . وقرر الاتنين يقضوا
شهر عسلهم ف دبي .

نعود لـ(جيتام) الذي يزفر زفرة حارة من داخل الاستديو قائلا

جيتام:

كانت حكاية أغرب من الخيال . . نسينا فيها الوقت طول
فترة الرحلة من مصر لدبي . . مانا ما كانش ينفع أرجع
بالطيارة زي شغل الأفلام . . بس لما وصلت المطار حكيت
كل اللي حصل لابويا واختي وجوزها . . وخذتهم
ورجعنا . . لبلاي . . وحبييتي . . عشان يحضروا فرحي .

جيتام يضع يده على أذنه حيث سماعة الإيربيز .

جيتام:

ومعانا دلوقت اتصال تليفوني من . . مش معقول . . جيتام؟

ص . جيتام في المداخلة التليفونية:

ده أنا هوديك ف 60 داهية .

جيتام:

ليه بس؟

ننتقل إلى شاليه مروة التي تنظر للتلفاز بدهشة وتتابع المكالمة التليفونية . .

ص . جيتام في المداخلة التليفونية:

عشان أنا جيتام الحقيقي ومش موجود دلوقت في
الاستديو . . الحلقة دي مسجلة .

جيتام (ساخرًا):

طبعا مسجلة . . وانا وانت دلوقت موجودين هناك .

ص . جيتام (بطفولية):

هناك فيبييين؟

جيتام (مبتسمًا بحب):

عند حبيبتنا مروة .

ص . جيتام (بطفولية):

اسم الله عليك . . شطور .

مروة تنظر للشاشة بدهشة فتشعر بيد تمتد من الشباك خلفها وتخبط على
ظهرها فتنتفض مرعوبة وتلتفت خلفها لتجد جيتام ناظرًا إليها بكل حب
الدنيا قائلا

جيتام:

سامحيه بقى والنبي يا ست مروة . . ده بيحبك أوي وانتي
فاهمة غلط والله .

مروة تبتسم بكل الحب والحنان قائلة بدهشة:

إنت عرفت مكاني إزاي؟

يطل من الشباك الطفلان بجاد ومي قائلين في وقت واحد

بجاد ومي:

حزري فزري مين؟

جيتام:

محدث قال لك إن الأطفال سلاح ذو حدين قبل كده؟ أنا

كمان عرفت أجد بجاد وحكى لي عنك كل حاجة.

مروة تسمع صوت طرقات على باب الشاليه، فتنظر له بترقب، بينما

يقول لها جيتام مبتسماً:

روحي افتحي .

مروة تتجه نحو الباب لتفتحه فتجد والدتها وأخاها حسام، لتحتضن

مروة أمها بشدة، بينما يأتي جيتام والطفلان من خلفهما، وكذا والده

وأخته وزوجها ليقول جيتام:

مفيش حاجة كده للغلبان اللي بيبحك . . إنشالله تعتبريني زي

أمك وأنا موافق .

الجميع يضحك بينما يشير جيتام لوالده وأخته وزوجها قائلاً:

أخيراً بابا وأختي وجوزها ظهروا في الأحداث . . طول

عمرهم ضيوف شرف ف حياتي .

مرودة تلکمه بدلال ثم تسلّم علیهما قائلة:

دول هما الخیر والبرکة .

جیتام (ساخرًا):

هاها . . کلکوا بتقولوا کده ف الأول .

هاتف جیتام یرن فیخرجه من جیبه ویضغط زر الإسیکر قائلاً:

أظن طبعًا حلقة مفیش بعد کده یا أستاذ سمیر .

صوت سمیر عبر الهاتف:

ألف مبروک یا جیتام . . اعمل حسابک بقى إنت ومرودة إن

الدورة البرامجیة الجدیة هتبدأ وهندمج البرنامجین بتوعک

فیها مع بعض .

جیتام:

وهیکون اسم البرنامج إیه؟



فی استدیو البرنامج الجدی

جیتام ومرودة یقفان فی منتصف دیکور مختلف، لبرنامج جدید، إذ نرى الاستدیو أرضیاته سوداء بینما جوانبه وردیة ونرى العدیة من الصور التی تجمع بین الرجل والمرأة فی مختلف جوانب الحیاة، سواء لوحة زفاف لرجل وامرأة، وأخرى لرجل یرجل خلف زوجته علی

البحر، وثلاثة لزوج وزوجة يلعبان مع أطفالهما في مساحات خضراء شاسعة، ونلاحظ أن هذه الصور تزين جنبات البرنامج..
البرنامج به جمهور مختلط من الرجال والنساء، بأعمار مختلفة ومتفاوتة.

مرورة (بابتسامة رقيقة):

تيستروجين..

جيتام (متابعًا بابتسامة ماثلة):

يعني هرمونات الذكورة وهرمونات الأنوثة متلخبطين على بعض.

مرورة:

وعشان ما ينفعش نفضلهم.. هنحل مشاكلهم باكج واحدة في برنامج واحد.

جيتام:

بالمناسبة دي أنا عندي سؤال محيرني يا ريت كل الجمهور يشاركني إجابته.

مرورة:

سؤال إيه؟

جيتام:

هو الحب كيميا ولأ خطة ولأ قسمة ونصيب؟

جيتام ينظر لمروة ويسألها ساخرًا:
هو الحب نزل ف الجدول؟
مروة (ضاحكة):

مش عارفة.

جيتام ومروة ينظران للكاميرا ويتابعان
جيتام ومروة (في آن واحد):

واضح إن الموضوع كبير أوي فعلاً . . نلتقي بعد الفاصل
فاصل البرنامج ينزل

النهاية



للمزيد من الكتب الحصرية ، زورونا على
موقع عصير الكتب

www.Book-juice.com

ونتظّر لرائكم عن رايكم فى الروايه

على جروب عصير الكتب

[FB.Com/groups/Book.juice](https://www.facebook.com/groups/Book.juice)

شكر خاص

إلى الملكة العظيمة، التي علمتني معنى الحب
والرومانسية في زمن المسخ، وأول من احتضنتني في
عالم الأدب وعلمتني متعة القراءة وسحر الكتابة..
أمي..

وإلى الرجل الصالح الطيب الذي تعلمت منه
ما يعجز القلم عن وصفه، ويستحيل على العقل
والقلب حصره..
أبي..

وإلى مولاتي وساحرتي الجميلة، التي تلهمني
بعينها وجوارحها أجمل مشاعر خلقها الله
في أرضه..
زوجتي الحبيبة، أم جنى.



الكاتب في سطور شريف عبدالهادي

- تخرج شريف عبدالهادي في كلية الآداب، قسم إعلام، شعبة صحافة، جامعة حلوان، وعمل كاتبًا صحفيًا، وناقداً فنيًا بالعديد من الصحف والمواقع الإلكترونية، مثل موقع «بص وطل» الإلكتروني، وجريدة «روز اليوسف»، وموقع وإذاعة «حُریتنا»، وجريدة «اضحك للدنيا»، وجريدة «صوت الأمة»، ومجلة «إحنا»، وغيرها من الصحف والمجلات.
- كذلك عمل بإعداد البرامج التلفزيونية والإذاعية في العديد من القنوات الفضائية ومحطات الراديو، مثل قنوات «الحياة»، و«التحرير»، و«النهار»، و«مودرن حرية»، و«نايل دراما»، و«القناة الأولى المصرية» وإذاعة «نجوم FM»، و«راديو مصر»، و«الشرق الأوسط»... وغيرها.
- ويُعد فيلم «تيستروجين» عمله الثالث بعد فيلم «كوابيس سعيدة»، ورواية «أبائيل».

أحدث إصدارات

الأستاذ

شريف عبدالمادي

- كوابيس سعيدة.
- تيستروجين.

